

"PROTESTANT"

Inki kele disongidila
ya ndinga yai?



INKI KELE DISONGIDILA YA NDIINGA YAI: "PROTESTANT"?

Edition ya Iya

Musoniki: Maman Lorella Rouster, Missionnaire,
Ministères pour Chaque Enfant

Musungiki: Kitambila Wasini, Evangeliste Communautaire, CUEBZ

octobre, 1987

Distribué par:
Ministères pour Chaque Enfant
mamalorella@yahoo.com

MAMBU YA IKELE NA KATI YA MUKANDA YAI:

	Dititi
Inki kele disongidila ya ndinga yai: "Protestant"?	3
Bamambu nana ya kele kiteso mosi.....	3
Bamambu tatu ya diswaswani	3
Bamambu ya ntete ya diswaswani: Kiyeka.....	6
Keti Pape ikele na kiyeka?.....	12
Inki vandaka kiyeka ya Simon Pierre na dibundu?.....	13
Keti tradition ikele na kiyeka?.....	20
Bamambu ya zole ya diswaswani: Mpulusu.....	26
Inki ikele nzila ya mpulusu?.....	26
Inki ikele nsuka ya kuguluka ya bantu?.....	36
Bamambu ya tatu ya diswaswani: Bisambu	45
Mbundana keti mesa ya Mfumu ikele inki mutindu?.....	45
Inki kele mfunu ya mbundana?.....	49
Nkailu ya Yesu ikele inki mutindu?.....	50
Inki mutindu mfunguna ya masumu lenda salama?.....	55
Banganga-Nzambi ikele banani?.....	59
Inki disongidila ya zina yai—"Santu" to "Saint"?.....	65
Inki ikele mpila ya mbote na kulomba?.....	70
Inki ikele mpila ya mbote na kuzitisa Marie, Mama ya Yesu?	75
.....	75
Yesu ikele Centre ya lukwikilu na beto. Yesu kele nene!.....	78
Decision na mono sambu na Yesu.....nsuka ya mukanda	
Bangiufula na mono sambu na dibundu.....nsuka ya mukanda	
Decision na mono sambu na dibundu.....nsuka ya mukanda	

Malongi yai ikele na bacassette mpe. Sonika na Ministeres pour Chaque Enfant na address na luyantiku ya mukanda yai.

Beto yamba bangifula na nge. Ata nge ikele membre ya konso dibundu, to membre ya dibundu ve, beto zola sadisa nge. Kana malongi ya mukanda yai me pesa nge mpasi na ntima, to kana nge zola solula sujet yai diaka, sonikila beto. Adresse ya Ministeres pour Chaque Enfant ikele na luyantiku ya mukanda yai.

Inki Kele Disongidila ya Ndinga Yai "Protestant" ?

Kana beto ke tuba nde: "beto kele baprotestant", yau zola tuba inki? Inki kele disongidila ya ndinga yai "protestant"? Inki diswaswani kele kati ya lukwikilu ya beto baprotestant ti mabundu ya nkaka?

Beto ta longuka mbote bangivula yai yonso na kati ya mukanda yai. Mono kele ndima nde beto ta baka mvutu ya mbote.

Beto yindula ntete ndinga yai "protestant." Ndinga yai "protestant" kele basika na francais, "protester." Yo zola tendula nde kubuya. Beto baprotestant ke buya inki? Mbala mingi, beto ke banzaka nde beto baprotestant ikele bantu ya kele ndima. Beto kele ndima Yesu. Beto kele ndima ndinga ya Nzambi yonso. Beto kele ndima Mpeve ya Nzambi. Beto kele ndima bimpa ya Yesu, lufwa, kutelema, ti kutombuka na Yandi. Ya kieleka beto baprotestant ikele bantu yina ya kele ndimaka bandinga yonso ya kele katuka na Nzambi. Ebuna kana bantu ke bingaka beto "baprotestant," yo zola tendula nde, bantu yina ke buyaka?

Kana muntu zola kukwikila ti kundima malongi ya kieleka, yandi fweti buya malongi yonso ya kele na nzila ya nkaka. Kana mono ke ndima nde kima yai ikele mpembe, mono ta buya kana muntu songa mono nde yau ikele mbwaki. Kana yau ikele mpembe, yau lenda vanda mbwaki ve. Kana mono ndima nde kima yai kele mpembe mono fweti kubuya kana muntu ya nkaka kwisa kuzabisa mono nde kima yai kele mbwaki. Keti yo kele mpidina ve?

Kana mono zola kusimba malongi nde Nzambi ikele Mpeve, ebuna mbala mosi mono fweti buya (protester) malongi nde Nzambi ikele mbisi keti nti. Kana mono ndima nde bantu ikele bankwa masumu, mono fweti buya malongi ya kele nde bantu yonso ikele mbote kaka. Kana muntu kundima malongi mosi, yau kele kieleka nde, yandi ta buya malongi yonso yina ke kwenda ve nzila mosi ti malongi ya kieleka ya yandi mene ndima?

Kana beto yindula histoire ya dibundu, beto fweti tuba nde, na mambu mingi dibundu me vila nzila ya Nzambi. Ebuna na bamvula yai 1400 AVJC ti na nima na yo, beto ta mona nde ndambu ya bantu yantikaka kuyindula mambu ya moyo ya dibundu. Bantu bonso Jean Wycliffe, Jean Huss, Martin Luther, Jean Calvin ti ya nkaka, bo monaka inki bamambu ya dibundu ya ntangu yina vandaka kusala ti kulonga, ti ba ya nkaka monaka na kieleka yonso nde dibundu vandaka ya kifuluka na mambu ya imbi ya kuluta. Beto zaba nde bampangi yai yantikaka kulonguka mingi yina ya dibundu vandaka kulonga na bantu ti yina ya Bible vandaka kulonga. Bo monaka nde mambu ya dibundu vandaka kusala ti kulonga, yo vandaka kwenda ve nzila mosi ti ndinga ya Nzambi. Nzambi bulaka na bambuta yai, nde bo lenda landa ve na mpimpa ya mutindu yina, na ntwala ya ndinga ya Nzambi. Yo yina bau monaka nde bo fweti kubuya keti kuprotester malongi yina yonso ya imbi, ya kimuntu.

Bantu yai ya ntete vandaka ba katolika. Bo vandaka yindula nde, bau kele longa malongi ya kieleka. Diaka bau yindulaka nde, bau lenda sadisa dibundu na bo na malongi ti bisalu ya mutindu yina. Bambuta yina ya beto tangaka mazina na zulu, bau zolaka kuvutula dibundu na nzila ya kieleka kansi dibundu buyaka mabanza na bau, dibundu monaka yo bonso mambu ya imbi ya zola kubebisa dibundu.

Bo buyaka malongi ya dibundu, sambu yau vandaka kwenda nzila mosi ve ti malongi ya Bible. Bampangi yai vandaka balongi ata dibundu katolika katulaka bau, bau bikaka ve na kulonga ndinga ya Nzambi. Bantu mingi ya nkaka landaka malongi na bau. Beto ke mona yai kele luyantiku ya dibundu ya baprotessant. Baprotessant mene basika ti na kati ya dibundu ya katolika.

Bamambu Nana ya Kele Kiteso Mosi

Beto zola tala mambu yai ya kele diswaswanu na kati ya baprotessant ti mabundu ya nkaka. Ntete yo kele mfunu mingi na kuzabisa na beno nde: kele na bima ya nkaka ya kele kwenda nzila mosi na kati ya lukwikilu ya bakatolika ti ya baprotessant. Beto ta zola kulunguka ba mambu yina. Tala Bamambu ya kele kukwenda kiteso mosi kati ya lukwikilu ya bakatolika ti baprotessant:

1. Malongi ya trinite: beto kele kwikila nde Nzambi kele kaka mosi, Yandi kele na mapersonne tatu keti trinite: Nzambi Tata, Nzambi Mwana, ti Nzambi Mpeve ya-Longo.

2. Beto yonso kele ndima nde yesu kele kieleka Nzambi. Yandi butukaka na nkento mosi ya bakala mene zaba ntete ve, zina na yandi Marie. Beto yonso kele ndima bimpa ya Yesu salaka ya kuluta mingi: Yesu fwaka na zulu ya kulunsi sambu na masumu na beto, Yandi telemaka na lufwa ti Yandi kwendaka na zulu.

3. Beto yonso kele ndima nde Nzambi salaka bantu mbote; na kifwani na Yandi, kansi bantu solaka na kusala mambu ya mbi. Sambu na mambu na bo ya imbi, bo kumaka bantu ya masumu.

4. Beto yonso kele ndima nde Bible kele ndinga ya Nzambi.

5. Beto yonso kele ndima nde kisika ya kitoko, ya mbote kele vingila beto na zulu na nima ya lufwa.

6. Beto yonso kele ndima nde kele na kisika ya mpasi ya lufwa, ya ndola ya beto kele binga nde bilungi.

7. Beto yonso kele ndima nde Yesu ta vutuka diaka.

8. Beto yonso kele ndima nde Nzambi ta tedimisa banitu na beto na lufwa.

Bamambu Tatu ya Diswaswani

Kieleka beto me mona nde, kele na bima mingi ya beto kele kwikila kiteso mosi ti bakatolika. Beto zola zaba inki kele diswaswanu kati na baprotessant ti bakatolika mpe mabundu ya nkaka? Protestant disongidila na yo kele: "bantu yina kele kubuya." Ngivula na beto kele yai: inki baprotessant kele buya?

Ata malongi na beto baprotessant ti bakatolika ikele mingi kiteso mosi, bamambu tatu ya diswaswanu kele na nzila ya lukwikilu na beto ti mabundu ya nkaka. Kati na bamambu yai tatu, lukwikilu na beto kele kiteso mosi ve.

1. AUTORITE KETI KIYEKA. Nani keti inki ikele kiyeka sambu na dibundu? Malongi na beto yonso kele katuka wapi? Nani kele kisina ya lukwikilu na beto? Kana mambu kele, kiyeka ya kuzenga yo fweti katuka wapi?
2. MPULUSU: NZILA TI NSUKA NA YO. Inki mpila muntu lenda kuvuluswa? Keti mpila ikele ya kuzaba na moyo yai nde ya kieleka nge me vuluswa? Inki mutindu muntu lenda vanda mbote ti Nzambi? Kana muntu kutuba nde yandi mene vuluswa, yo zola tuba inki? Inki kele nsuka na yo?
3. BISAMBU: NZILA TI NSUKA NA YO. Inki ikele mpila ya mbote ya kukumisa Nzambi? Inki mpila Nzambi ikele zodila beto na kukumisa Yandi? Inki kele mpila ya bisambu ya mbote ya kele pesaka Yandi lukumu ti kiese?

Na mambu yai tatu beto ta mona diswaswanu mingi na kati ya baprotessant ti mabundu ya nkaka. Beto ke solula ve kaka malongi tatu ya diswaswanu, kansi BIMVUKA tatu ya bangundu keti malongi ya diswaswanu. Nge mosi fweti zenga kana nge mona diswaswanu yai mfunu mingi.

YINDULA DIAKA:

Ndinga yai protestant kele katuka na ndinga ya _____,

Disongidila na yo na kikongo kele _____.

Beto zola kundima malongi ya _____, yo yina beto fweti buya (protester) molongi ya _____.

Sonika awa bandinga tatu ya kele songa diswaswanu ya malongi kati na baprotessant ti bakatolika.

1. _____
2. _____
3. _____

Bible *Ndinga ya Nzambi*

BETO NDIMA :
Malongi yonso na beto fweti katuka na Ndinga ya Nzambi.

Bible *Ndinga ya Nzambi*

BETO PROTESTER :
Malongi yonso ya ikele ve bonso malongi ya Bible.

Mambu ya Ntete ya Diswaswani -- Kiyeka

6

Beto bakristo fweti tula inki bonso fondasio na insi ya lukwikilu na beto? Beto baka mbandu yai: Kana bantu zole kutunga bafondasio ya diswaswani, beto ta mona mpe mutindu zole ya bainzo ya diswaswani kati na bantu yai zole. Konso nzo ta landa mutindu fondasio na yo kele.

Kana bantu zole kukwenda na bisika zole ya diswaswanu, sambu na kuyula banyuvula na bantu zole ya diswaswani, bo mpe ta baka bamvutu zole ya diswaswani. Keti yo kele mpidina ve? Yo kele mutindu mosi na lukwikilu na beto baprotessant. Beto kele kwikila mutindu ya nkaka, sambu beto kele na kifulu ya mbote na kuyuvula, sambu na malongi ya lukwikilu na beto.

Malongi na beto fweti katuka wapi? Na mvutu na ngyufula yai, baprotessant ti mabundu ya nkaka ikele na diswaswani mosi ya nene. Diswaswani yo yai: Par exemple, bampangi na beto bakatolika kele tubaka nde: Biyeka kele tatu sambu na lukwikilu na bo. 1. Pape (Mfumu ya dibundu ya ke bikalaka na Rome). 2. Tradition (bisalu, bangindu ti malongi ya bambuta ya ntama ya dibundu). 3. Bible, kansi Bible kele na kiyeka yonso ve. Sambu na yai, bambuta ya dibundu ya katolika, kele banzaka ve nde kiyeka yonso ya malongi na bo fweti basika kaka na Bible. Bo ke ndima mbala mingi na kutula kisika mosi malongi ya Bible ti yai ya bambuta na bo ya dibundu kele longi bo. Bo kele baka mabanza ya malongi ya bambuta ya dibundu bonso mambu ya kieleka sambu na lukwikilu na bau.

Kansi, sambu na beto baprotessant, beto kele zaba nde kiyeka ya lukwikilu na beto kele kaka mosi: Bible kele kisina ya lukwikilu na beto, yo kele ndinga ya Nzambi. Beto kele ndima nde Bible yonso kele ya kulunga sambu na mambu ya lukwikilu na beto ti ya luzingu na beto.

YINDULA DIAKA:

Inki kele bamambu tatu ya kele na kiyeka sambu na lukwikilu ya bakatolika?

1. _____
2. _____
3. _____

Inki kele kiyeka ya nene, kiyeka mose kaka, sambu na lukwikilu ya

baprotessant? _____

Songa ba mambu zole ya kele na kiyeka sambu na lukwikilu ya bakatolika, kansi baprotessant kele landaka yo ve?

1. _____
2. _____

Songa inki kele kiyeka mosi ya kele kwenda nzila mosi na lukwikilu ya bakatolika ti baprotessant?

Tala diaka paragraphe ya tatu na diti yai. Tuba fioti inki kele diswaswani ya kele monika na mutindu ya beto ke mona Bible?

Beto zola kulonguka diswaswani yai zole. Ntete, baprotessant kele baka Bible bonso kiyeka kaka mosi, yina ya bau kele na yo sambu na lukwikilu na bo. Bo kele na kiyeka ya nkaka ve na zulu ya Bible. Sambu na yo, baprotessant kele na mabanza ve ya kubaka Bible bonso kiyeka mosi na kati ya biyeka yai tatu ya bakatolika kele na yau. Bible yo mosi kele na kiyeka sambu na lukwikilu na baprotessant.

Kima ya zole ya beto kele ndima kele nde konso mukristo kele na Mpeve ya Nzambi (Rome 8:9). mukristo lenda longuka Bible mbote na ngolo ya Nzambi, na nzila ya Mpeve na Yandi. Beto kele ndima ve nde kaka bantwadisi ya dibundu lenda bakisa mbote-mbote malongi ya Bible, kansi bakristo ve. Yina kele kieleka ve. Bible kele sambu na bantu yonso.

Tala na 2 Timothee 3:15. Bible lenda pesa nge inki?

Na kati ya Bible nge ta mona mayele yina ta gulusa nge, kana nge landa yo. Mayele yina ta songa nde beto fweti tula ntima mu Yesu (Bisalu 16:31). Keti Bible ta lunga sambu na kusonga nge nzila ya mpulusu

Kana Bible ta lunga, keti kiyeka ya nkaka ikele mfunu?

Sambu na inki?

Bible, Ndinga ya Nzambi, lenda pesa nge mayele yina ta gulusa nge. Mayele yina ya Bible ta pesa nge, yo ta lunga sambu na kugulusa nge. Ebuna, mfunu ya lusadusu ya nkaka ikele ve na mambu ya mpulusu. Tala 2 Timothee 3:16. Kiyeka ya Bible katukaka na nani?


Kiyeka ya Bible katukaka na Nzambi, Yandi mosi. Yo yina, kiyeka na yau ikele yina ya Nzambi Yandi mosi kibeni. Diswaswani ikele ve. Mambu yonso ya Bible ke longa beto, ikele Nzambi Yandi mosi ke longa beto.

Yindula nzila yai: (vs. 16) "Mukanda yina, yo ikele mfunu sambu na kulonga bantu mambu ya kieleka." Kaka na mambu ya mpulusu ve, kansi na mambu yonso mpe, Bible ke longa beto malongi ya inki mpila?

Mpila ya beto lenda mona diswaswani sambu na kiyeka yo yai:



BETO NDIMA YAU



BETO PROTESTER (BUYA) YAU

- Yesu ikele kibeni Nzambi.
- Menga ya Yesu me lunga.
- Yesu me telema na lufwa.
- Muntu lenda zaba.
- Yesu me kangula nzila.
- Yesu pesa moyo.
- Nzambi zola sadisa beto.



BETO NDIMA :
Malongi yonso na beto fweti katuka na Ndinga ya Nzambi.

- Muntu lenda zaba ve,
- Misse continuer nkailu ya Yesu.
- Sambila Sainte Marie kambelo
- Mbotika pesa moyo
- IKELE VE!



BETO PROTESTER :
Malongi yonso ya ikele ve bonso malongi ya Bible.

Beto ke mona nde Bible ikele na bamambu yonso yai:

- Kiyeka sambu na kuguluka ya muntu.
- Kiyeka ya Nzambi yandi mosi.
- Kiyeka sambu na mambu ya kieleka.

Beto baprotestant kele ndimaka nde malongi yonso ya beto kele na yo mfunu fweti katuka na Bible.

Yindula bandinga yai: "Sambu na kusungika bifu" (vs. 16). Bible kele songa bakristo mpila ya mbote ya kupindula luzingu ya bantu na mpila mosi ya mbote. Yo ikele kiyeka sambu na LUZINGU ya bantu.

Yindula nzila yai: "sambu na kubongisa bantu" (vs. 16). Ntete, luzingu ti mabanza na beto ya vandaka kisaka-saka. Bible kele na kiyeka ya kubongisa luzingu na beto ti kutula yo na nzila mosi ya mbote, kana beto landa malongi na yo.

Verset 16 ke tuba: "Mpe sambu na kulonga bantu na kuzinga luzingu mosi ya mbote keti ya kinzambi." Bible kele songa beto inki mpila luzingu na beto lenda pesa nzambi kiesee. Bika beto landa kiyeka na beto.

YINDULA DIAKA:

Bible kele tuba nde yo kele na kiyeka sambu
na _____ ti _____ na beto
sambu yo kele kiyeka ya Nzambi Yandi mosi.

2 Timothee 3:17 "Mpidina muntu ya Nzambi ta nunga keti ta vanda me yilama mbote-mbote." Inki mpila beto lunga yilama mbote na meso ya Nzambi?

Beto ta yilama na meso ya Nzambi kana beto landa kiyeka na beto yina ikele Bible, Ndinga ya Nzambi. Verset 17 ke tuba: "Mpe yandi ta vanda na mpila ya mbote ya kusala konso kisalu ya mbote." Na kati ya baverset yai beto me mona, biyeka sambu na beto bakristo ikele ikwa? _____

Inki ikele kiyeka yina? _____

Sambu na inki yo ikele kiyeka? _____

Beto mene mona kiyeka mosi mpamba na ba verset yai ya beto mene longuka. Yo kele BIBLE, ndinga ya Nzambi. Beto me mona nde yo ta lunga, yo yina mfunu ikele ve sambu na kiyeka ya nkaka. Keti beto me mona kiyeka na nkaka ya beto tula na zulu ya

Bible? _____

Beto tala Kusonga (Apocalypse) 22:18-19. Ntangu Nzambi pesaka bantu nsuka ya Bible imene, Yandi tubaka nde bo fweti
 _____ ve na zulu na yo, mpe _____ ve na yo.
 Kifu mosi kele ve na Bible, mpe yo kele ve ata fioti. Bible kele ya kulunga. Kana nge yika keti kukatula kima, na zulu ya kima yina vandaka ya kulunga ntete, keti yo ta vanda kaka kiteso mosi?

Kana kima kele ya mbote mingi, yo kele mfunu diaka na kubongisa yo. Kana muntu zola kuyika keti kukatula ndambu, yo ta vanda kitoko diaka ve keti ya kulunga.

Beto yindula fioti ndambu ya ntalu. Beto zaba nde 2+2=4. Ntalu yai ikele kitoko ye, kieleka. Kana beto katula kitini mosi, keti yo ikele kitoko diaka? 2-2=4 Nge banza inki?


Beto me katula kaka kitini mosi ya fioti-fioti, kansi ntalu yina ikele kieleka diaka ve. Kana kima ikele kieleka ti kitoko, muntu lenda katula yo ve!

Beto monaka nde 2+2=4. Bika beto yika kima mosi ya fioti. 12+2=4. Nge mona inki mutindu?


Kana beto longuka ntalu mbote, beto ta mona mbandu ya mbote. Mbandu yai kele songa nde kana mambu yonso kele na ndonga mpe ya kulunga, yo kele mfunu ve na kuyika keti kukatula. Kana beto kumeka na kuyika, keti kukatula kima mosi, ata yo kele kima mosi ya fioti, nge ta mona nde, ntalu yonso ta vanda diaka ya kulunga ve. Tala diaka Kusonga 22:18-19. Na baverset yai, inki ikele ya kulunga?

Ndinga ya Nzambi yonso kele ya kulunga mpe ya mbote. Sambu yo kele ya kulunga, Nzambi kele tuba nde beto fweti
 _____ ve, mpe _____ ve na ndinga na yandi.
 Kana dibundu keti ntwadisi ya dibundu me yika malongi ya nkaka, yina ikele na kati ya Bible ve, keti Nzambi ikele kiese sambu na yo?

Nzambi ta vanda kiese na yo ata fioti ve, sambu yo kele kwenda ve nzila mosi ti mambu yina ya Nzambi mene tulaka nsiku.



Katula ve na yo!



Kuyika ve
na zulu na yo!

Keti Pape ikele na kiyeka?

Bampangi na beto bakatolika ke tubaka nde, ntangu ntwadisi na bo, Pape, ke tuba "cathedra" (yo zola tendula position officielle na kiti na yandi ya kimfumu), nde yandi kele konda kifu na ntangu yina. Bo ke kwikilaka nde malongi yonso ya yandi ke pesa na ntangu yina ikele ya Nzambi. Ebuna bo kele baka Pape bonso nde yandi kele na kiyeka mosi mpe na zulu ya Bible. Bakatolika ke tubaka mpe ke ndimaka nde Pape kele na kiyeka na Nzambi kati na dibundu na kusonga na dibundu malongi ya mpa, malongi yina ya kele na Bible ve. Bo ke ndima nde Pape lenda " kuyika malongi ya nkaka na zulu ya malongi ya Bible. Dibundu ya katolika kele zola nde bakristo na bo yonso kundima ndinga ya Pape, bonso ndinga ya Nzambi.

Bakatolika yonso ke zabaka ve malongi ya dibundu na bo mbote-mbote. Kansi mambu yai mono me sonika ikele malongi officiel ya Eglise Katolika. Yula ntwadisi ya katolika keti yo kele mpidina ve!

Inki beto baprottestant fweti banza sambu na malongi yai? Beto me tuba nde, beto kele ndima malongi yonso ya kele na kati ya Bible, ndinga ya Nzambi. Tala malongi ya Kusonga 22:18-19 diaka. Inki mutindu Nzambi ke mona malongi yai ya dibundu ya katolika?

Nzambi me tuba nde Yandi me manisa Ndinga na Yandi, imene. Yandi me tuba nde beto fweti yika malongi ya nkaka na zulu na yo ve. Yo yina, Nzambi ke na kiese ve kana muntu, ata ntwadisi ya dibundu, yika malongi ya nkaka na zulu na yo. Beto me mona nde Ndinga ya Nzambi ikele ya kulunga. Yo yina, kana muntu yika na zulu na yo, yo ikele bonso yandi ke tuba nde Ndinga ya Nzambi me pesa ke lunga ve. Yo ikele bonso yandi ke tuba nde beto kele na mfunu ya ndinga ya nkaka mpe na zulu na yo. Kana muntu yika na Ndinga ya Nzambi, tuba nde yandi ke fwa nsiku ya Nzambi. Tuba nde yandi mpe ke sala masumu ya nene na meso ya Nzambi. Inki mutindu beto baprottestant banza sambu na malongi yai nde: Pape lenda yika malongi ya nkaka na zulu ya ndinga ya Nzambi (Bible)?

Malongi na beto baprottestant ikele na bangindu zole ya nene. 1. Bangindu ya mbote (positif). Malongi ya mbote yina ya beto fweti kwikila, ya beto fweti simba sambu na luzingu na beto, ti ya beto fweti kundima. 2. Bangindu ya imbi (negatif). Malongi ya imbi yina ya beto fweti kubuya keti kuprottester.

Beto fweti kundima ti kusimba mbote malongi ya Bible bonso ndinga ya Nzambi ya kieleka, sambu na beto bakristo. Beto kundima ti kusimba malongi mbote-mbote nde yo kele lunga sambu na moyo na beto, mpe sambu na kuguluka na beto na nzila ya Nzambi. Yo yina beto fweti buya (protester) malongi ya Pape kele yika na zulu ya ndinga ya Nzambi.

Beto mpe fweti kubuya mabanza ya kele tuba nde: Pape kele na kiyeka ya kuzenga lukanu ya malongi sambu na yina kele tadila lukwikilu ya bakristo. Beto fweti kubuya bangindu ya bantu yonso ti mikanda yonso, yina ya kele tuba nde bo lenda yika mambu ya nkaka ya mpa na zulu ya malongi ya Bible.

Kana yandi zodila bandunda ya mbote, yandi fweti katula ntangu yonso matiti ya imbi. Yo ikele mpidina ve?

Inki vandaka kiyeka ya Simon Pierre na dibundu ya ntete?

13

Disongidila ya ndinga "protestant" ikele "bantu yina buya." Beto fweti buya malongi yonso ya kele na nganda ya Bible. Kansi beto fweti kundima ti kusimba mbote malongi yonso ya kele basika na kiyeka na beto, Bible, NDIINGA YA MFUMU NZAMBI.



BETO NDIMA:
Malongi yonso na beto fweti
katuka na Ndinga ya Nzambi.

Bampangi na beto bakatolika ke tubaka nde Simon Pierre vandaka Pape ya ntete. Bo ke longaka nde kiyeka ya Pierre katukaka mbala mosi na Yesu Kristo, yandi mosi. Bo ke longaka nde, Pierre vandaka Pape ya Ntete. Ebuna Pierre pesaka kiyeka na yandi na Pape ya zole. Pape mosi na mosi na nima ya lufwa na yandi, yandi pesaka kiyeka na Pape ya nkaka, tii bubu yai beto kele na Pape ya nkaka, ata ba yina ya ntete mene fwaka. Tii bubu, bakatolika kele ndima nde kiyeka ya Pape kele Yesu muntu pesaka yandi yo.

Sambu na kubakisa mbote-mbote mambu yai, bika beto tanga baverset yai ya bampangi na beto bakatolika ke banzaka nde bo ke landa malongi ya Bible. Baverset ya ntete kele yai ya Matthieu 16:13-19. Beto ta longuka bangyuvula zole ya nene:

1. Nani yina kele ditadi ya kuluta mfunu (roc), ya Yesu zola tunga dibundu na yandi na zulu na yo?
2. Inki kele kiyeka ya Yesu kele pesa Pierre na baverset yai ya beto mene tanga?

Tanga Matthieu 16:13-19 yonso. Na nima, yindula verset 18. Bampangi na beto bakatolika kele tubaka mingi sambu na mambu yai nde Yesu songaka nde Yandi ta tunga dibundu na Yandi na zulu ya Simon Pierre. Inki Yesu zolaka kutuba na Pierre na bandinga yai? Yandi zolaka tuba nde Pierre kele nani?

Na makutu, yo vandaka kuwakana bonso petras, disongidila ditadi.

Beto yonso ke zabaka nde matadi kele mutindu na mutindu. Matadi ya nkaka kele nene, ya nkaka ya fioti-fioti, bonso yina ya bana ke losaka bandeke. Ya nkaka kele matadi ya nene, bonso yina ya bo ke sadilaka sambu na kusala fondasio ya nzo. Inki kele ditadi ya Yesu zola kutunga dibundu na Yandi na zulu na yo? Yo fweti vanda ya inki mutindu--ya fioti, keti ya nene, ya ngolo?

Beto zaba nde ditadi yina ta lunga na kusimba dibundu fweti vanda ditadi mosi ya nene, ditadi mosi ya ngolo, bonso ditadi ya fondasio ya nzo. Ditadi yina--keti yo lenda vanda Simon Pierre? Yandi vandaka ditadi. Zina na yandi disongidila ditadi. Kansi yandi vandaka ditadi ya inki mutindu? Inki nge ke banza sambu na Simon Pierre, yina ta tula keti-keti nde yandi kele ditadi ya ngolo, ya kusimba dibundu ya mvimba ya Yesu Kristo.

Mbala ya nkaka nge ke zaba ve nde Simon Pierre buyaka Yesu mbala tatu, na ntangu bantu vandaka kusambisa yandi na ntwala ya lufwa ya Yesu. Kana beto tala kapu yai, ya Matthieu 16, beto ta mona nde Pierre vandaka ve ya kieleka ditadi ya ngolo ya fondasio. Tala verset 21-23. Inki nge lenda tuba ntangu yai sambu na Pierre?

Na baverset yai, Yesu tubaka nde Yandi fweti kwenda nswalu na Yerusalem. Ebuna kuna bantwadisi ya leta ti ya Bazwif ta monisa Yandi mpasi, mpe bo ta fwa Yandi. Kansi Yandi ta telema na lufwa na nima ya bilumbu tatu. Pierre buyaka mambu yai yonso. Yandi tubaka nde: "Mambu yina ta bwila nge ve." Pierre awa kele buya ndinga ya Yesu Kristo!! Na ba verset yai Yesu kele tubila Pierre inki sambu na mambu yina ya yandi tubaka?

Yesu bingaka Pierre nde "Satana," sambu na ntangu yina, mabanza ti bandinga ya Simon Pierre vandaka bonso ndinga ya kele katuka na Satana. Keti yo kele kieleka nde Pierre vandaka ditadi ya ngolo sambu na kusimba dibundu ya Yesu?


Beto kele mona awa nde, Pierre yandi lungaka ve ata fioti na kuvanda ditadi yina. Yo kele kieleka nde, Pierre vandaka kaka bonso ditadi ya fioti, mpe ya ngolo ve.

Tanga verset 18 diaka. Kana mpila vandaka sambu na nge na kutanga yo na ndinga Grek, na ndinga ya ntete, mpila Matthieu sonikaka yo, nge ta mona nde zina ya Pierre kele Petros (masculin, un cailloux). Ndinga "ditadi" yina ta simba dibundu ya Yesu ikele petras (feminin, une pierre). Ditadi yina ikele Simon Pierre, ikele ve kiteso mosi ti ditadi yina ta simba dibundu ya Yesu Kristo.

Ebuna beto fweti sosa na bisika ya nkaka sambu na kuzaba, ditadi yina ta simba dibundu ya Yesu ikele nani? Tala Matthieu 7:24-27. Ditadi na kingana yai ikele inki?

Ditadi yina ya ta simba nzo na kingana yai ikele Yesu Kristo, Yandi mosi. Konso muntu yina ya kele landa ndinga na Yandi, yandi kele bonso muntu ya mayele, yina ya tungaka inzo na zulu ya ditadi. Tanga 1 Pierre 2:6-8. Ditadi yai ikele inki mpila? Yo ikele Nani?

Ditadi yai ikele ditadi ya ngolo yina ke simbaka nzo. Ditadi na baverset yai ikele YESU Kristo YANDI MOSI!



Tala mpe Rome 9:33. Kana muntu tula ntima na ditadi yina, nani ta monisa yandi nsoni ve?

Konso muntu yina ta tula ntima na Yandi, yandi ta mona nsoni ve. Paul ke tuba yo mpe na mukanda na yandi na dibundu ya kolinto (1 Kolinto 10:4). Yandi ke tuba nde ditadi yango kele nani?

Kana Pierre vandaka fondasio ya dibundu, beto zolaka kumona malongi yina ya bisika ya nkaka na Bible. Kansi beto ke mona nde, ya kieleka ditadi yai ya ngolo ya fondasio kele Yesu Yandi mosi.

Tala diaka Matthieu 16. Konso ntangu, kana beto zola na kubakisa Bible mbote-mbote, yo kele mfunu na kutala contexte. Inki mambu ya kulutaka na ntwala Yesu kutuba kingani yai ya ditadi? Tanga verset 13-17 mbote. Baverset yai kele songa beto mutindu Simon Pierre tubaka kitemwe sambu na Yesu, na kutuba kana Yesu kele nani. Pierre ndimaka nde Yesu kele Mesia. Mwana ya Nzambi ya moyo. Sambu na bandinga yai ya Pierre, Yesu monaka yo inki mutindu?

Yesu vandaka na kiese sambu na bandinga yai. Yandi tubaka nde Nzambi, Yandi mosi, me songa Pierre mambu yai. Bambuka nde, na baverset yai yonso mambu ya nene ikele Yesu Kristo, ti ngyuvula ya kuzaba Yandi ikele nani. Ebuna kana beto tendula nde ditadi yina ya kele simba dibundu kele Yesu Kristo, Yandi mosi, yo kele kwenda mbote ti baverset yai yonso ya kele na kingani yai ya ditadi. Konso muntu ya me ndima Yesu, bonso Simon Pierre, yandi mene kota na dibundu ya Yesu. Lufwa lenda simba dibundu yai ve!

Inki kiyeka ya Yesu ke pesa na Pierre na baverset yai? Tanga verset 19. Kana beto zola zaba, ntendula ya bana-nsapi yai, yau kele mbote beto zaba inki Pierre salaka ti yo. Inki kielo Pierre kangulaka ti bana-nsapi yai ya Yesu pesaka yandi?

Tanga Bisalu 10. Awa Pierre vandaka ya ntete na kuzabisa nsangu ya Yesu Kristo na bantu yina vandaka bazwif ve. Na bilumbu lutaka na ntwala, balonguki vandaka kulonga ndinga ya Nzambi kaka na dikanda ya bazwif. Kielo vandaka ya kukanga, sambu na bantu yai vanda bazwif ve. Na kati ya bantu yai yonso ya vandaka Bazwif ve, nani vandaka muntu ya ntete na kukangula ntima sambu na kuyamba nsamu mbote ya Yesu? Na ntwala ya ntangu yai, bakristo samunaka kaka na Bazwif. Kielo ya nene yai, na bantu yina vandaka Bazwif ve, yo vandaka ya kukanga. Inki vandaka zina ya muntu ya ntete na kuwa Nsangu ya Mbote na kati na bo yina vandaka Bazwif ve?

Pierre samunaka Nsangu ya Mbote na Corneille ti bantu na nzo na yandi. Yo yina, Corneille kumaka muntu ya ntete na kundima Nsangu ya Mbote, na kati ya bo yina vandaka Bazwif ve. Beto tala na verset 27, beto ke mona nde, yandi mpe bingaka bampangi na yandi mingi, sambu na yai inzo na yandi ya mvimba fulukaka ti bantu sambu na kuwa Nsamu ya Yesu. Tala verset 43.

Pierre longaka bo nde, Nzambi ta lolula masumu ya konso muntu yina ya kele tula ntima na Yesu. Tala verset yina mbote. Keti nge ke mona nde Pierre yandi mosi lolulaka masuimu ya bantu yai, bonso nganga kele kusala?

Ikele ve! Kati na baverset yai, beto ke mona nde Pierre lolulaka masumu ya bantu yina ve, Kansi yandi songaka bo nzila ya mpulusu na Yesu. Malongi yonso ya yandi longaka ikele kaka malongi ya bakristo yonso lenda pesa.

Awa na sika yai, beto mene tanga nde Pierre salaka mambu mosi yina ya bakristo yonso salaka ve. Yau kele mambu ya beto lenda sala bubu yai ve. Pierre kangulaka kielo ya lukwikilu sambu na bantu yina vandaka ve bakristo. Makabu yai, Yesu pesaka yau kaka na Simon Pierre, sambu muntu mosi mpamba lenda vanda muntu ya ntete na kulonga na kimvuka ya bantu. Bana-nsapi yai vandaka ve kiyeka ya kulolula masumu ya bantu, bonso nganga. Yo vandaka ve kiyeka ya kulolula masuimu na zina ya Yesu, na nima bantu ndima masumu na bo na makutu na yandi. Ikele ve! Kana yo vandaka mpidina, keti baverse ta vanda ve na kati ya Bible na kusonga nde Pierre salaka mambu yina? Sosa ngolo. Nge ta mona yo ve ata fioti na Bible.

Kiyeka ya Pierre, ya Yesu pesaka yandi yo vandaka kaka sambu na kulonga ndinga na Nzambi, na bantu yina vandaka Bazwif ve, na mpila nde kielo ya lukwikilu na Yesu lenda kukanguka sambu na bo.

Tala na Luc 24:47. Beto bakristo fweti kuzabisa bantu nde bo kusala inki?

Bonso Simon Pierre, beto mpe fweti zabisa bantu na kubalula ntima, sambu Nzambi lenda lolula bo. Kiyeka yai Yesu me pesa na bakristo yonso.

Inki kuvandaka kiyeka ya kieleka ya Pierre na kati ya dibundu? Pierre yandi mosi tubaka inki sambu na yo?

- Tala: 1 Pierre 1:1 Pierre vandaka _____
- 2 Pierre 1:1 Pierre vandaka _____
- 1 Pierre 5:1 Pierre vandaka _____

Pierre tubaka nde Yandi vandaka ntumwa yina sadilaka Yesu Kristo, mpe mbuta mosi na kati ya bambuta ya nkaka ya dibundu. Pierre tubaka ve nde Yandi vandaka Pape, ntwadisi ya dibundu ya mvimba, mfumu na bo yonso!

Na kati ya bantumwa, nani ya nkaka tubaka sambu na kiyeka ti position ya Pierre? Keti bo tubaka nde Pierre vandaka na zulu na bo na kuyala bo? Tala Galatie 2:11-14. Nani tubilaka Pierre na meso ya bantu?

Ntumwa Paul tubilaka Pierre, sambu yandi monaka mambu ya imbi na luzingu ya Pierre. Kana Pierre vandaka na kiyeka ya kuyala bantumwa yonso, keti nge ke banza nde Paul lenda vanda na kikesa na kutubila yandi mambu ya mutindu yina?

Ikele ve! Mpila ya Paul tubilaka Pierre, yo ke songa nde bo yonso zole vandaka kiteso mosi—bantumwa na kati ya dibundu. Pierre vandaka ve na kisika ya luzitu kuluta bo ya nkaka. Pierre yalaka dibundu ve bonso Pape. Nge ke banza inki?

Tala kapu 15 ya Bisalu ya Bantumwa. Awa beto ke zola kutala mambu ya kimvuka ya ntete ya bambuta ya dibundu, na mpila ya mbote ya kuzenga mambu na kati ya dibundu. Beto lenda zaba, inki vandaka kiyeka ya Pierre na kati ya dibundu.

Tala Bisalu 15:7. Keti Pierre vandaka muntu ya ntete na kutuba, keti yandi vandaka kukangula masolo na bo?

Kana beto longuka mbote kapu yai, beto ta mona nde, Pierre tubaka kaka na nima ya masolo na bo yonso. Awa beto me mono ve sika ya kele songa nde Pierre vandaka mfumu. Beto me mona ve nde yandi muntu kukangulaka masolo na kimvuka na bo. Tala Bisalu 15:12. Keti Pierre vandaka muntu ya nsuka na kutuba?

Kana beto longuka mbote kapu yai, beto ta mona nde, Pierre tubaka kaka na nima ya masolo na bo yonso. Awa beto me mona ve sika ya kele songa nde Pierre vandaka mfumu. Beto me mona ve nde yandi muntu kukangulaka masolo na kimvuka na bo.

Tala Bisalu 15:12. Keti Pierre vandaka muntu ya nsuka na kutuba?

Pierre vandaka ve muntu ya nsuka na kutuba. Na masolo na bo, beto ke mona nde Paul ti Barnabas, bo tubaka na nima na yandi. Ndinga ya Pierre vandaka ve bonso ndinga ya Nzambi ya fweti kuzenga mambu yonso. Pierre vandaka kaka ntwadisi mosi ya dibundu, na kati ya bantwadisi ya nkaka ya vandaka na kusolula mambu yina.

Tala Bisalu 15:13. Pierre zengaka mambu yai, to muntu ya nkaka?

Yo vandaka ve Pierre, kansi Jacques yina zengaka mambu yina, ebuna bantwadisi yonso ndimaka lukanu na yandi (15:22).

Bisalu 15 ikele kapu mosi ya mfunu, sambu na kati na yo beto lenda tala mbote-mbote inki mpila dibundu ya ntete zengaka makambu. Beto me mona mpe nde kele na bantu ya nkaka tubaka na ntwala ya Pierre, mpe bayankaka tubaka na nima na yandi. Ya kieleka, yo vandaka Jacques yina zengaka mambu na mpila nde bo yonso ndimaka lukanu na yandi. Ebuna, yo ikele pwelele nde Pierre twadisaka kimvuka yai ve ata fioti. Pierre yalaka bantwadisi ya nkaka ve. Beto ke mona awa mbandu ya Pape ve.

Tanga na Galatie 2:9 Banani kuvandaka bantwadisi tatu na dibundu ya Yeruzalem?

Bantwadisi yai tatu vandaka na dibundu ya Yeruzalem bo yai: Jacques, Pierre, ti Jean. Pierre vandaka kaka mosi na kati na bo tatu.

Inki Bible kele longa beto sambu na mambu ya kiyeka ya Pierre? Bible kele songa ve ata kisika mosi nde Pierre vandaka Pape. Ebuna, kana yandi vandaka ve Pape, yandi vandaka na mpila ve na kupesa kiyeka ya Pape na bantwadisi ya nkaka yina landaka yandi. Simon Pierre vandaka ve mutungi ya ntete ya dibundu. Yandi vandaka ve fonatio ya dibundu. Mutindu mosi bubuyai, Pape kele ve fondasio ya dibundu ya Yesu.

"SAMBU YA KIELEKA, NZAMBI ME TULAKA YESU KRISTO BONSO
FONDASIO MOSI MPE YO MOSI MPAMBA. EBUNA, BO LENDA
TULA FONDASIO YA NKAKA VE NA KISIKA YINA!"

I Korinte 3:11


YINDULA:

YINDULA: Na I Pierre 5:3, Pierre ke tuba nde basielo to bambuta ya dibundu ya Yesu, bo fweti sosa ve na kuyala bantu. Ntwadisi ya ntete na kati ya dibundu na kutuba nde yandi vandaka na kiyeka na kuyala dibundu ya mvimba vandaka Pape Gregoire ya ntete, na mvula 590 APJC! Mfinama na bamvula nkama sambanu (600), dibundu vandaka ve na muntu bonso Pape yina banzaka nde yandi fweti yala yo ya mvimba. Ntangu Gregoire tubaka nde yandi vandaka na kiyeka na kuyala, keti yandi landaka luzolo ya Yesu?

Yandi landaka luzolo ya Yesu ve, sambu Yesu zolaka ve nde bantwadisi ya dibundu na yandi kusosa kuyala bantu. Simon Pierre vandaka ve mfumu yina yalaka dibundu, sambu yina vandaka ve luzolo ya Yesu.



Lukwikilu Protestant



Lukwikilu Catholique


Beto me mona nde Yesu pesaka ve kiyeka na Simon Pierre na kuyala bonso Pape. Yo yina bapape yonso kele kuyala ve na kiyeka ya Yesu Kristo. Ya kieleka, beto baprotessant kele buya mabanza yina ya ke tuba nde: Pape ikele na kiyeka na kuyala dibundu keti bakristo. Beto me tuba nde kiyeka na beto ikele kaka mosi, ndinga ya Nzambi.

Mabundu ya nkaka me yika malongi ya bambuta ya dibundu (tradition) bonso kiyeka na bo. Yo yina, bika beto tala mbote inki Bible ke tuba sambu na mambu yai tradition.


Tradition keti malongi ya bambuta, yo vandaka na ntangu ya Yesu mpe. Na ntangu yina. bimvuka ya mikanda ya Bazwif vandaka zole:

1. TORA keti Kuwakana ya Ntama (Ancien Testament). Mikanda yai, Bazwif ya ntama yonso ndimaka yo bonso ndinga ya Nzambi.

2. TALMUD keti ntendulu ya Bible. Yo vandaka mabanza na banlongi sambu na Bible. Yo fulukaka na bansiku ya nkaka ya bambuta yikaka na zulu ya ndinga ya Nzambi.



Bo sonikaka mikanda mutindu yai na ntangu ya Yesu. Mikanda na bo vandaka ba-rouleau.



TORA— Mikanda ya Ndinga ya Nzambi ya Kuwakana ya ntama.
NDINGA YA NZAMBI

TALMUD— Mikanda ya malongi ya bambuta ya Bazwif.
NDINGA YA BANTU

Ntete, bantu monaka Talmud bonso mpila mosi ya kuteba ndinga ya Nzambi. Bo zabaka mbote nde kaka ndinga ya Nzambi vandaka kiyeka na bo.

Na kati ya bimvuka yai zole ya mikanda, Tora ti Talmud, inki vandaka ndinga ya Nzambi?


Mikanda 39 ya Tora vandaka ndinga ya Nzambi, sambu Mpeve ya Nzambi muntu tulaka ndinga na Yandi na ntima ya bamitubi na Yandi. Talmud vandaka mikanda bantu yikaka na nima, mikanda ya malongi ya bambuta sambu na mikanda ya Tora. Na kati ya bimvuka ya mikanda yai zole, Tora ti Talmud, inki vandaka na kiyeka ya kieleka, yina ya bantu ya Nzambi fweti landa malongi na yo?

Ndinga ya Nzambi vandaka TORA, kitini ya ntete ya Bible. Ebuna, yo mpe vandaka kiyeka sambu na bantu ya Nzambi. Kansi, TALMUD vandaka ndinga ya muntu. Yo vandaka TRADITION. Yo vandaka ve kiyeka na meso ya Nzambi.


Lukanu ya bambuta ya Bazwif vandaka ntete mbote na kusonika Talmud. Bo zolaka na kukeba mikanda ya Tora mbote-mbote na mpila nde bantu kubalula yo ve mutindu ya nkaka. Yo yina, bo yantikaka na kuyika bansiku bonso lupangu na lweka ya Tora, na mpila na kukeba yo. Ntete, bo zabaka mbote nde mikanda yai Talmud vandaka kaka ndinga ya bantu, yau vandaka na kiyeka ve. Bo monaka Talmud bonso mukanda ya lenda kutendula mbote malongi ya Tora, ti kutula bansiku sambu na kuyidika mbote-mbote malongi na yo, na mpila nde bantu kubumba yo mbote.

Kansi bamambu ya mpasi kwisaka kumonika na nima. Bo yantikaka na kufwanisa bimvuka ya mikanda yai zole. Na mabanza na bo, Tora yina vandaka ndinga ya Nzambi, yo kumaka kiteso msoi ti Talmud yina vandaka ndinga ya bantu, bambuta. Kiyeka ya Talmud kumaka kiteso mosi ti yina ya Tora na mabanza na bo. Kiyeka ya bambuta kumaka kiteso mosi ti yina ya Nzambi Yandi mosi. Inki verset kele songa beto mabanza ya Nzambi sambu na mambu yai? Beto mene longuka yo ntete.

Kisika mosi na Bible yina ya ke songa beto pwelele mabanza ya Nzambi kele na mukanda ya Kusonga (Apocalypse) 22:18-19. Ba baverset yina, Nzambi ke pesa beto lutumu na kuyika to na kukatula ve, VE, VE! na zulu ya ndinga na Yandi. Bambuka:



Kuyika ve
na zulu na yo!



Katula ve na yo!

Ya kieleka, baverset yina kele manisa bangindu yonso ya kiyeka, beto fweti kuzaba nde konso ndinga ya beto ke baka bonso kiyeka, yo kele yika mabanza ya mpa na zulu ya ndinga ya Nzambi. Muntu, keti malongi ya bantu lenda vanda na kiyeka ve na zulu ya ndinga ya Nzambi. Beto ke mona nde bamambu ya mutindu yai, kele baka kiyeka na kisika ya Nzambi. Bible kele binga yo masumu.

Inki Yesu tubaka sambu na mambu yai? Beto tala na Matthieu 15:1-9. Na verset ya ntete ti ya zole, beto zola zaba: Sambu na inki bafarize kele na makasi?

Balonguki ya Yesu yobisaka maboko ve na ntwala ya kudia, na mpila ya bambuta na bo. Ebuna, bafarize bakaka makasi mpenza. Kuyobisa yai ya maboko vandaka ve mambu ya bunkete sambu na bo, kansi yo vandaka mambu ya bo fweti kusala. Talmud, mikanda yina vandaka mabanza ya bantu, vandaka kusonga na bantu nde bo fweti yobisa maboko na bo na ntwala ya kudia. Makasi ya bafarise vandaka ve sambu balonguki vandaka na maboko ya mvindu, kansi sambu bo yobisaka ve na mpila nde Talmud tubaka. Bo landaka ve mpila ya bambuta na mambu yina. Tala verset 3 na Matthieu 15. Inki vandaka mvutu ya Yesu?

Yesu yulaka bo, "Sambu na inki beno ke zola ve kulanda ndinga ya Nzambi?" Yesu vandaka ve na makasi sambu bo vandaka kulanda ndinga ya muntu, ti yina ya bambuta ya dibundu, kansi Yesu bakaka makasi sambu bafarize zolaka ve kulanda ndinga ya Nzambi, bonso kiyeka sambu na lukwikilu na bo. Yesu na bisalu na Yandi awa na nsi-ntoto, bakaka ve Talmud, yai ya vandaka mabanza ya bantu, bonso ndinga ya kele na kiyeka na lukwikilu ya bantu. Yesu bakaka Tora bonso ndinga na kieleka ya Nzambi ya kele na kiyeka sambu na moyo ya bantu yonso ya ke landaka ndinga ya Nzambi.

Bantu yai vandaka kubaka mabanza ya bantu (tradition) bonso ndinga ya vandaka na kiyeka kiteso mosi ti ndinga ya Nzambi. Tala Matthieu 15: 7-9 diaka. Yesu monaka bisambu na bo inki mutindu? Sambu na inki?

Yesu tubaka awa nde, kana beto longa ndinga ya muntu bonso yo vandaka kiyeka kiteso mosi ti ndinga ya Nzambi, Nzambi ta tala bisambu na beto bonso mambu ya mpamba! Kana mpidina, beto ke landa ve ndinga na Yandi, mpe beto kele na lulendo na kutula mabanza na beto bonso mabanza ya Nzambi.

Yesu tubaka nde kifu ti masumu ya nene na bo vandaka na kutu]a ndinga ya bantu na kiyeka, kiteso mosi ti ndinga ya Nzambi. Bubuyai, Yesu kele tala bansiku ti malongi ya bantu mene yika ya kuluta mingi na kati ya bambula yai kiteso ya 2000. Keti nge banza nde mabanza na Yandi me soba sambu na bansiku ya bambuta? Keti nge ke banza nde bubuyai Yesu ta ndima malongi ya bantu na kuvanda na kiyeka na lukwikilu ya bantu bonso ndinga ya Nzambi?

Yesu lenda ve kupindula mabanza na Yandi ata fioti, sambu Yandi kibeni ikele Nzambi. Mukanda ya Hebreu 13:8 ke tuba nde, "Yesu Kristo ikele kiteso mosi ntangu yai bonso mutindu ya Yandi vandaka mazono, ebuna Yandi mpe ta vanda kiteso mosi mvula na mvula. Ata bubuyai, Yesu kele kundima ve bansiku, keti mabanza ya bantu, bonso bandinga ya kele na kiyeka na lukwikilu ti na luzingu ya bantu bonso ndinga ya Nzambi.

Beto tala na Kolose 2:8, "Beno _____, mbaimbai bantu ta kumisa beno bampika na bo na _____ ya mpamba- _____ ya _____ yina ke katukaka na mambu yina ya _____ ke longaka, mpe na bampeve yina ke yalaka beto, kansi yo ke _____ na malongi ya _____ ve."

Na francais, beto ke tanga na verset yai, "sur la tradition des hommes." Verset yai ke tuba inki sambu na mambu yai ya kubaka malongi ya bantu bonso malongi ya kele na kiyeka na lukwikilu ti luzingu ya bantu?

Ntumwa Paul songaka bakristo nde beto fweti keba sambu malongi ya bantu, ti ya bambuta ya dibundu yai ya beto lenda binga "tradition," mbala mingi yo ikele na mpila ve na kubenda bantu na mabanza ya Kristo. Keti nge ikele kubaka verset yai bonso nde Ntumwa Paul zola kutual malongi ya bantu na kiyeka mosi ti yai ya Bible?

Ikele ve ata fioti. Ntumwa Paul songaka bo na kukeba na mambu ya tradition. Bible, ndinga ya Nzambi, ikele kiyeka na beto bakristo. Yo ikele juge ya tradition yonso ya bambuta na beto. Bible ikele pwelele. Tradition kele lunga ve na kuvanda na kiyeka na lukwikilu na beto ata fioti

Paul monaka nde bansiku ya bambuta vandaka na kigonsa na kubenda bantu na bampila yina kele kwenda mbote ve na mabanza ya malongi ya Yesu. Beto tala 2 Timothee 4:3-4. Keti na bilumbu ke kwisa, bantu yonso ta zola kuwila kiyeka ya Nzambi?

Ikele ve. Ntangu bo ta buya malongi ya kiyeka ya Nzambi, bo ta landa inki?

Tradition ikele inki? Tradition ikele mabanza ya bantu. Bantu ta vila nzila ya Nzambi sambu na kulanda tradition na bo mosi. Bo ta

sosa balongi yina ta longa bo _____ yina bo zola wa,

kansi ndinga yina ya bantu ta vanda bingana ya _____

Sambu na inki nge ke banzaka nde tradition kele mbala mingi malongi ya luvunu?

Tradition ikele kaka mabanza ya bantu. Ata bantu ya mayele mingi ikele mayele ve bonso Nzambi. Beto yonso ke salaka bifu. Beto yonso ikele bankwa-masumu. Mabanza na beto ikele mabanza ya kieleka ve. Ebuna, kifu ti imbi lenda kota mingi na kati ya tradition, sambu yo ikele ve ndinga ya Nzambi, kansi ndinga ya bankwa-masumu kaka. Tala Proverbes keti mukanda ya Bingana 30:5:

"Konso ndinga yina kele basika na munoko ya Nzambi, yo ikele mbote ti kitoko yonso."

Sambu ndinga ya Nzambi yonso kele mbote ti kitoko, sambu na yai, beto lenda kuyika ve ndinga ya nkaka na zulu ya ndinga ya Nzambi. Bible kele fondasio mosi ya ngolo sambu na lukwikilu ti luzingu na beto. Beto lenda yika ve mabanza ya bantu, ata yina ya ntwadisi ya nene Pape, ata tradition ya bambuta.

NDINGA YA NZAMBI, YO MOSI KELE NA KIYEKA SAMBU NA LUKWIKILU TI LUZINGU NA BETO!

REVISION: Beto baprotestant kele kundima kaka kiyeka mosi mpamba,

kiyeka yango yo yai: _____

Beto fweti _____ na zulu na yo ve, mpe _____ ve na yo,

sambu yo mosi ikele ya kulunga.

Yo yina, sambu beto ke ndima malongi yai, beto kele kundima ve, keti beto kele kubuya nde _____,

sambu Bible yo mosi kele kiyeka na beto, yo yina malongi yonso ya beto


fweti katuka na yo.

Keti nge me bakisa malongi yai? Sonika kidimbu X na zulu ya foto nge ke buya sambu na lukwikilu na nge. Disongidila ya kidimbu yai X, yo yai: Ikele ve! Mono buya malongi yai!

Sonika kidimbu yai 0 na lweka ya foto ya nge ke ndima bonso lukwikilu na nge. Kidimbu yai 0 kele songa nde, nge solaka, keti nge ndimaka malongi yai.

Foto yai ya kele na nsi, yo kele songa dibundu ya Yesu. Beto kele mona nde dibundu yai bo me tunga yo na zulu ya Bible, sambu Bible ikele kiyeka mosi mpamba sambu na beto baprotessant, ti malongi yonso na beto fweti katuka kaka na yo.

Bible ikele ya kukangula na foto yina, sambu beto kele zola nde bantu yonso kukangula Bible ti kulonguka malongi na beto. kana yo ikele ya kieleka bonso malongi ya Bible. Yesu Kristo kele fondasio ya dibundu sambu Yandi kele ditadi ya ngolo yina ya Nzambi mene tunga dibundu na zulu na Yandi. Yai yonso ikele malongi ti lukwikilu na beto baprotessant.



Mambu ya Zole ya Diswaswani -- Mpulusu

Kuyula kuluta mfunu, na kuyuvula muntu lenda yula nde: Inki mpila mono lenda kuguluka sambu Nzambi kundima mono? Inki mpila mono lenda kuguluka sambu mono lenda kota na zulu kifulu ya Nzambi kele?

Luyantiku ya kikristo kele basika na nguvula yai: Inki mutindu mono lenda kukuma mukristo? Kana muntu kusala kifu na mambu yai, mbala ya nkaka yandi kele ntete mukristo ya kieleka ve, ata yandi kutuba nde yandi kele mukristo. Kana yandi sala kifu na mambu yai, mbala ya nkaka yandi ta kota na zulu ve. Yo yina. yo kele mfunu mingi na beto kubakisa mbote-mbote mambu yai kuguluka na beto na Yesu, sambu yo kele mbote beto kubakisa yo ya kieleka, inki kele nzila ya Nzambi.

Beto baprotestant ti banduku na beto bakatolika, beto pesa mvutu ya diswaswani na nguyuvula yai, inki mutindu muntu lenda vuluswa. Beto pesa mvutu kiteso mosi ve ata fioti!

MALONGI KATOLIKA, YO YAI:

Inki mutindu muntu lenda kuguluka?

Bo Bakatolika tuba nde mpulusu ikele lufutu nde Nzambi lenda pesa muntu sambu na bisakramento ya dibundu nde yandi me baka na moyo na yandi, sambu na bisalu ya mbote yandi me sala na moyo na yandi, ti sambu na lukwikilu na yandi. Kansi bo ke tubaka nde yo kele mambu ya mpasi na kuzaba ya kieleka na moyo yai nde, muntu mene kuguluka. Beto fweti sala ngolo na kuzaba kana Nzambi ta mona nde bisakramento, bisalu ti lukwikilu na beto me lunga, keti kana yo me lunga ve. Bo tuba nde, kana muntu kutuba nde yandi kele zaba nde yandi mene kuguluka, yina kele masumu ya lulendo. Bo ke tubaka mpe nde, bantu mingi ta kota ve mabala mosi na zulu ya Nzambi. Bo ke longaka nde, bantu ya nkaka fweti kwenda ntete na kifulu yai ya bo ke bingaka nde "kombelo" (purgatoire na francais). Sambu na kifulu yai, be ke tubaka nde yo kele kifulu ya tiya bonso bilungi, kansi mpasi na yo kele ya mvu ya mvu ve. Ebuna bantu ya kele kwenda kuna ntete bo kele songa nde, yo kele kisika sambu na kumona ntantu ye mpasi ya masumu na bo. Bo kele longa mpe nde beto bantu ya kele kuzinga lenda kulomba sambu na bo, na mpila nde Nzambi lenda nswalu kundima bo na zulu.

Bo kele tuba diaka nde, kana ndola ya muntu yonso mene lunga sambu na masumu yonso ya yandi salaka, na nima na yau, muntu yai ta bikisa kombelo mpe yandi lenda kota na zulu ntangu yai. Kansi bo kele kutuba nde: bo kele kubakisa ya kieleka yonso ve, inki ntangu muntu ke kotaka na zulu. Yo kele pesa bo mabanza ya mbote ntete ve, keti mvutu ya mbote.

Bakatolika ke tubaka diaka nde, muntu ke bakaka moyo ya mpa na Yesu, ntangu yandi kele kubaka mbotika, yo zola songa nde mbotika yina mene pesa muntu ya mene baka yo moyo ya kimpeve. Beto ke mona diaka mambu yai, na mbotika ya bana ya fioti, bo ke banzaka nde kana bana baka mbotika, bo kele pesa bo moyo ya Nzambi. Kansi sambu na mambu yai yonso bo kele tuba nde muntu lenda zaba mambu ya kuguluka na yandi mbote-mbote ntete ve awa na ntoto.

Bo kele kutuba diaka nde, yo kele mbote mingi na muntu kusala ngolo sambu na kukota na zulu, ata yandi zaba yo ve mbote-mbote. Yai yonso kele malongi ya bambuta ya dibundu ya katolika kele longa, yo kele malongi ya nene sambu na lukwikilu na bo, malongi officiel.



Beto me mona mutindu ya malongi ya bakatolika kele longa sambu na mambu ya kuguluka ya muntu, mpe inki mpila ya Nzambi lenda kundima muntu. Kansi awa beto zola tala inki mpila beto baprotestant kele tuba sambu na mambu yai.

MALONGI YA BETO BAPROTESTANT, YO YAI:

Inki mutindu muntu lenda kuguluka?

Beto baprotestant kele mona malongi yai na mpila ya nkaka kibeni. Beto ke tubaka nde menga ya Yesu Kristo, yina ya yandi pesaka na zulu ya kulunsi kele lunga na kukatula masumu na beto, beto yonso ya mene kwikila yandi. Nzambi me ndima nkailu ya Yesu, ebuna konso muntu ya ta tula ntima na menga ya Yesu Kristo, Nzambi ta ndima yandi sambu na lukwikilu na yandi na Yesu.

Beto baprotestant ke longaka nde bisakramento ti bisalu ya mbote, yonso yina lenda ve kuyika ata kima mosi na kuguluka na beto. Kuguluka kele ve mambu ya bisalu na beto ya mbote ya mutindu na mutindu. Yonso kele mambu ya kutula ntima na bisalu ya Yesu salaka sambu na beto. Beto kele kwikila nde lufwa ti kutelama ya Yesu mene lunga na ntwala ya Nzambi na kuguluka na beto. Ebuna konso muntu yina ya mene kwikila, yandi lenda zaba ya kieleka awa na ntoto yai, na ntangu yai, na moyo yai, nde yandi mene vuluswa, mpe nde Nzambi mene ndima yandi.

Ebuna, konso muntu yina ya mene kwikila, yandi lenda vanda na kiese ti na kikesa na ntwala ya Nzambi sesepiyai, ti na ntangu ya lufwa na yandi. Beto fweti kubuya mabanza yonso yina ya kele tuba nde na nsuka ya moyo ya muntu awa na ntoto, bifulu kele tatu, nde kombelo kele kisika ya kele na kati-kati ya zulu ti bilungi. Yai kele malongi ya kieleka ve, sambu Bible kele longa beto kaka mambu ya zulu ti bilungi.

Beto lenda ve kundima malongi yai ya kele tuba nde bantu yina ya mene kwikila fweti kumona mpasi sambu na masumu na bo. Beto lenda ve kundima nde bo lenda kwenda na kifulu bo ke binga kombelo. Yesu monaka mpasi na kiska na beto! Nkailu na Yandi me lunga na kukatula masumu yonso na beto!

Beto lenda ve kubaka mbotika bonso luyantiku ya moyo ya kinzambi (kimpeve), sambu beto kele mona na kati ya Bible nde konso ntangu bantu yina ya ndimaka bakaka mbotika na nima ya kupindula ntima na bo. Beto lenda kundima nde kaka kutula Yesu ntima kele kupesa muntu moyo ya mpa, ya kimpeve. Ya kieleka, beto bayai ya mene tula ntima na Yesu, beto kele kundima ya Nzambi, mutindu yo kele kutuba nde kana beto kufwa, beto ta vanda mbala mosi na ntwala ya Nzambi. Beto bakristo kele na moyo ya mvula na mvula kaka na ntangu yo yina ya beto mene ndima Yesu, moyo yai kele pesa beto luzolo ti ngolo na kusala luzolo ya Nzambi. Yo yina, beto kele na kikesa na ntwala ya Nzambi. Yai yonso kele malongi na beto baprotestant.

Bika beto kulonguka inki Bible kele tuba sambu na kuguluka ya beto bantu ya masumu. Tala na Bisalu (Actes) 10:43. Awa Simon Pierre ke tuba nde Nzambi ta lolula bantu ya masumu. Yandi kele kutuba nde Nzambi ta bikisila konso muntu yina sala inki?

Nzambi ta bikisila muntu yina na ngolo ya nani?

ZULU

LUFWA

Kikesa Ngemba
Kiese

Bisalu ya mbote bonso
kupesa makabu songa luzolo
sambu na Nzambi.

← Mbotika songa bantu nde muntu me lejā kuma mukristo.

Moyo mvu ya mvu sesepiyai!

Mukristo!

Balula ntima ti tula kivuvu yonso kaka mu Yesu.

Kota na moyo mpilayai.
Lukwikilu Protestant

Keti ntumwa Pierre ke tuba nde Nzambi ta lolula beto sambu na bisakramento ya dibundu? Na kati ya bisakramento ya dibundu?

Keti Pierre ke tuba nde Nzambi ta lolula beto sambu na bisalu na beto ya mbote?

Ikele ve ata fioti! Nzila keke kaka mosi yina ya Nzambi lenda kulolula muntu ya masumu. Inki nzila yina?

Beto fweti tula ntima na Yesu, ebuna, kaka na ntangu yaina, Nzambi ta lolula beto na ngolo ti na zina ya Yesu, sambu menga na Yandi me lunga na meso ya Nzambi. Kubaka ndolula, yo ikele ve mambu ya bisakramento. Yo ikele ve mambu ya bisalu. Yo ikele ve mambu ya kundima masumu na ntwala ya ngangwa. Nzambi keke lolula beto bakristo masumu yonso kaka na ntangu yina ya beto keke tula ntima na Yesu.

Bansiku vandaka ve na mpila ya kugulusa muntu. Bansiku yai vandaka bansiku ya Nzambi pesaka na Moise, "Sala yai...kansi sala yai ve." Kana beto kulanda bansiku mbote na moyo na beto, beto keke sala bisalu ya mbote. Kansi inki ya Nzambi keke tuba sambu na mambu yai? Kulungisa ya bansiku lenda kukatula muntu ve na kimpika ya masumu. Beto zaba mbote nde Nzambi ta lolula masumu ya konso muntu ya ta tula ntima na Mwana ya Yandi Yesu Kristo. Muntu yango fweti ndima nde menga ya Yesu imene lunga sambu na kukatula masumu na yandi yonso.

Beto tala na Bisalu 16:30-31. Awa polisi yina talaka boloko yufulaka Paul ti Silas ngifula mosi ya mfunu. Yandi yulaka bo nde, inki mpila muntu lenda kuguluka? Beto kuwa mvutu ya bantumwa pesaka yandi na verset 31. Inki keke nzila mosi kaka yina ya muntu lenda baka moyo ya mpa ya kimpeve?

Nzila keke kaka mosi nde, muntu fweti tula ntima na Yesu Kristo. Beto keke ndima mpe nde nziula yai ya kuguluka ikele kiteso mosi na yai ya Pierre tubaka na Bisalu 10:43 ti ya Paul tubaka na Bisalu 13:38-39. Yo keke mpidina ve?

*Yesu
ikele
nzila!*



Mukanda yai Bisalu ikele mukanda ya histoire ya dibundu ya ntete, mpila yo vandaka na ntangu ya bantumwa ya Yesu. Kana yo vandaka mambu nde mambu ya kuguluka ya muntu ke kwisaka na muntu na kati ya bisakramento (mbotika, mbundana), beto zolaka kumona yonso mbote na mukanda yai ya Bisalu ya Bantumwa.

Kana yo vandaka mpe bisalu ya bantu vandaka mpe kusadisa bo mpe na kupesa moyo, yo zolaka mpe kumonika na malongi ya bantumwa. Kansi inki beto ke mona? Beto ke mona kaka nde, bantumwa longaka, bisalu ya mbote ya muntu lenda sala, yo lenda kukatula masumu ve, kansi Nzambi ta gulusa konso muntu yina ya ta tula ntima na Yesu.

Na mukanda yai ya Bisalu, beto me mona nde kuguluka keti kubaka moyo ya mpa kele kwisa na mungu na: (tula circle (O) na lweka na ya mvutu ya mbote ti bikisa bamvutu ya imbi).

MBOTIKA BISAKRAMENTO LUKWIKILU MU YESU KAKA

MESA-MFUMU MBONGO MAKABU BISALU YA MBOTE

Kana nge tulaka cercle (O) na lweka ya "Lukwikilu mu Yesu Kaka," nge me tuba bonso Bible ke tubaka. Kana nge tulaka cercle na mvutu ya nkaka, vutuka diaka na luyantiku ya dilongi yai. Yantika diaka na kutla baverset ya Bible ya beto tangaka.

Beto tala mukanda ya ntumwa Paul sonikaka na bakristo ya Rome. Sambu na mambu ya kuguluka, inki kuvandaka lukwikilu ya bakristo ya Rome? Tanga Rome 3:22. Beto kele mona nde mpila kele kaka mosi ya Nzambi lenda kundima muntu. Inki kele nzila yina ya Nzambi kele ndima muntu?

Awa beto kele tanga kaka bonso beto mene tanga na mukanda ya Bisalu, nde kele kaka na nzila mosi yina ya Nzambi lenda kundima beto, yo kele yai: kana beto tula ntima na Yesu.

Tala Rome 3:23-26. Menga ya Yesu ta katula inki?

Ntangu Yesu fwaka na zulu ya kulunsi sambu na masumu na beto, Yandi pesaka moyo na Yandi bonso makabu ya menga, yina ya Nzambi ndimaka. Mbala ikwa Nzambi kele tuba nde Yandi ta ndima bantu yina ya kele kutula ntima na Yesu, na baverset yai?

Baverset yai kele longa beto ngolo nde Nzambi ta ndima bantu kaka kana bo kutula ntima na Yesu. Nzambi ke tuba mbala tatu na baverset yai nde beto lenda vanda na kikesa ya kieleka, mpe beto fweti ndima nde Yandi mene ndima beto kaka na ntangu yina ya beto mene tula ntima na Yesu. Kaka na ntangu yo yina, menga ya Yesu mene katula masumu na beto, sambu Nzambi ndimaka makabu yina ya Yesu pesaka na zulu ya kulunsi.

Tala Rome 3:28. Awa Paul kele tuba pwelele nde kuguluka ikele ve na inki?

Kuguluka ikele kaka sambu na inki?

Kuguluka kele ve sambu na bisalu na beto ya mbote ya beto me sala, keti mambu ya kulanda bansiku ya Nzambi. Beto zola zaba, nani na kati na beto lenda landa bansiku yonso ya Nzambi, mpe konso ntangu? Beto kele mona ata muntu mosi ve! Kaka Yesu Kristo, Mwana ya Nzambi, kondaka disumu. Beto kele kaka na mpila mosi, keti nzila mosi mpamba yina ya beto lenda kuguluka:

NZILA YINA KELE LUKWIKILU NA YESU KRISTO!

Beto fweti kubikisa mabanza yina ya kele longa beto nde kele na banzila ya nkaka ya lenda kusadisa beto na kuguluka, sambu na yai, beto fweti tula kivuvu na beto yonso kaka na Yesu.

Tala na Rome 5:1. Nzambi me ndima beto bakristo sambu na inki?

Nzambi me ndima beto bakristo kaka sambu na lukwikilu na beto na Mwana na Yandi, Yesu Kristo. Ebuna, beto kele na inki?

Ntangu yai, beto bakristo (bakwikidi) ikele na ngemba ti Nzambi! Beto vandaka ntete na mvita ya ngolo ti Nzambi. Beto vandaka bambeni ya Nzambi sambu na masumu na beto. Kansi Nzambi mene ndima beto, sambu na lukwikilu na beto na Mwana na Yandi. Menga ya Yesu me katula kimbeni yina, ebuna yo mene natila beto ngemba ti Nzambi. Beto fweti kubaka ngemba yai ve na ntangu kele kwisa, bonso na ntangu ya lufwa na beto. Kansi beto kele baka ngemba sesepiyai, kaka na ntangu yina ya beto mene tula ntima na Yesu Kristo.

Tala na Rome 5: 9-10. Nzambi kele kundima beto kana beto kwikila, sambu na inki?

Kristo ta gulusa beto inki mutindu?

Beto ta baka ve ndola yina ya Nzambi zolaka kupesa beto na....

Ata beto vandaka ntete bambeni ya Nzambi, beto me
ti Yandi sambu na lufwa ya Yesu.

Nzambi me ndima beto, sambu na lufwa ya Yesu na kisika na beto. Menga ya Yesu imene lunga na meso ya Nzambi. Yo yina Kristo ta gulusa beto ya kieleka na mambu yonso ya tala lukwikilu na beto. Beto ta baka ve ndola ya makasi ya Nzambi. Ata beto vandaka bambeni ya Nzambi, beto me wakana ti Yandi, sambu na menga ya Yesu.

Tala na Rome 10:9-10. Awa beto ke mona nde, bantu fweti ndima na ntima nde "Yesu ikele Mfumu" na bo. Kana ya kieleka bo mene tula ntima na Yesu, Mfumu ta _____ bo _____ ve.

Baverset yai kele tendula inki disongidila, kutula ntima na Yesu. Beto zaba nde kundima yai, yo fweti vanda ya kele katuka na nsi ya ntima kibeni. Yo kele ve kaka mambu ya ntu mpamba. Mambu yai kele mambu na nge mosi na kubakisa yo ya kieleka. Yo kele ve mambu ya ntu mpamba.

Zaba nde kundima yina, yo kele mambu ya nsoni ve. Mukristo ya kieleka, yandi ta vanda na kiese na kundima lukwikilu na yandi na meso ya bantu.

Inki mambu ya kuluta mfunu ya bakristo ya Rome kusalaka sambu na kuguluka? Tula cercle (0) na mvutu ya mbote.

MBOTIKA BISAKRAMENTO TULA NTIMA NA YESU BISALU YA MBOTE

KULANDA BANSIKU YA NZAMBI KUPESA MAKABU KUBAKA MESA-MFUMU

KUNDIMA MASUMU NA NGANGA KUDILA MINGI KUMONA MPASI

Beto kele mona nde mvutu kele kaka mosi mpamba ya mbote. "Tula ntima na Yesu" ikele mvutu ya Bible. Bamambu yai ya nkaka yo kele ve na kati ya malongi ya Nzambi sambu na kuguluka ya bantu. Kana nge tulaka cercle na mvutu ya nkaka, vutuka diaka na luyantiku ya kapu yai, ti tala baverset yonso diaka.

Beto tala Galatie 2:16. Nzambi ke ndimaka muntu ve sambu yandi _____, kansi Nzambi ke ndimaka muntu kaka sambu _____.

Tala verset yai mbote. Mbala ikwa Nzambi ke tuba mambu yai?

Nzambi tuba mbala zole kaka na kati ya verset mosi nde Yandi ndima muntu ve sambu na bisalu ya mbote to sambu yandi ke landaka bansiku, kansi kaka sambu yandi ke tula ntima na Yesu. Kana bantu ya nkaka ke tubaka nde bisalu ya mbote ikele mfunu sambu na kuguluka, verset yai ke tuba inki sambu na bo?

Kana beto kutala verset yai, beto ta mona nde Nzambi ke ndima bantu ve sambu bo kele landa bansiku. Mpila ikele kaka mosi yina ya Nzambi lenda kundima bantu. Yandi kele ndima bo kaka kana bo kutula ntima na Yesu Kristo! Beto ke mona mambu yai mbala zole na verset mosi kaka, sambu beto lenda zaba yo mbote-mbote. Kana muntu keti dibundu konga nde, bantu lenda kuguluka na bisalu na bo ya mbote, tuba nde, bo me sala kifu mosi ya nene. Nzambi ke ndima malongi ya mutindu yina ve, bo ke tuba mambu ya luvunu.

Beto fweti zaba nde malongi ya Nzambi ke tuba nde, bisalu ya mbote, yina ya kulanda bansiku yo kele ve nzila ya bantu lenda kuguluka. Ndinga ya Nzambi ke tuba mbala mosi nde, Nzambi lenda ndima bantu ve sambu bo kele landa bansiku, mpe na mpila ya bo kele meka na kuzinga luzingu ya mbote. Nzambi kele ndima bantu kaka kana bo ndima mpe kutula ntima na Mwana na Yandi Yesu Kristo. Sonika na kisika yai, mambu yina ya kele lunga ve na kugulusa muntu:

Kana nge me sonika nde bisalu ya mbote, keti kulanda bansiku kele lunga ve sambu na kugulusa muntu, nge mene tuba bonso Bible kele tuba.

Tala Efeze 2:8-9. Nzambi me gulusa beto sambu na _____
na beto mu Yesu. Kuguluka yina ikele ve mambu ya bisalu ya mbote nde
beto me sala kansu yo ikele kaka _____ yina
ya Nzambi me _____ beto.

Tala na baverset yai, Nzambi kele songa beto nde Yandi ta gulusa beto kaka sambu na lukwikilu na beto na Yesu. Kuguluka ikele ve sambu na mambu yina ya mbote ya beto mosi mene sala. Mpulusu ikele MAKABU YINA YA NZAMBI ME PESAKA BENO. Keti muntu fweti sala sambu na kubaka makabu?

Ikele ve! Makabu ikele yina ya muntu ke pesa kima kaka ya mpamba, kaka na luzolo. Yai kele mpila ya kuguluka mpe ikele.

Beto ke bakaka lufutu kana beto kusala mambu ya mbote. Kansu kuguluka ikele makabu ya Nzambi ke pesaka ya mpamba, kaka sambu na luzolo ya mbote na Yandi.

Kuguluka ikele ve mambu ya bisalu na beto ya mbote, sambu na yai beto lenda kudisonga ve. Lulendo ikele ve. Yonso ikele makabu ya Nzambi. Beto me guluka sambu na lukwikilu na beto mu Yesu Kristo, kansu beto me guluka ve ata fioti sambu na bisalu ya mbote beto me sala. Mpulusu ikele makabu. Makabu ikele ve yina nge lenda baka sambu nge me sala. Nge fweti baka makabu kaka sambu na luzolo. Ikele ve nge ya fweti futa sambu na makabu, kansu muntu ya nkaka futa ntalu yonso ya makabu, ebuna yandi pesa yo na nge ya mpamba kaka na luzolo.

Tala na Efeze 1:13. Beto ke bakaka Mpeve ya Nzambi inki ntangu?
Inki beto fweti sala sambu na kubaka Mpeve ya Nzambi?

Ntete beto fweti kutula ntima na Yesu Kristo. Ebuna, na ntangu yina, Nzambi ta pesa beto kidimbu ya Mpeve na Yandi. Mambu ya nkaka ikele ve. Bantu yonso ya ke tulaka ntima na Yesu, bo kele na Mpeve ya Nzambi kaka na ntangu yina. Kidimbu yina, yo kele songa nde, ya kieleka beto mene kuma bantu ya Nzambi, bakristo.

Mbala mingi na Bible, pizio ikele kidimbu ya Mpeve ya Nzambi. Na zulu ya dessin ya pizio yai, sonika inki mutindu muntu lenda baka Mpeve ya Nzambi.



Rome 8:9 ke tuba nde "Muntu yina ke na Mpeve ya Kristo ve, yandi kele muntu ya Kristo ve." Bible ke songa beto nde konso muntu, ntangu yandi kele ndima Yesu Kristo, yandi kele baka Mpeve ya Nzambi na kuzinga na kati na yandi.

Beto fweti zaba nde, kubaka Mpeve ya Nzambi, yo kele ve mambu ya bisakramento ya dibundu. Sambu na yai, Mpeve ya Nzambi lenda kwisa ve na muntu na nzila ya mbotika, na nzila ya bisakramento. Beto tala inki kele malongi ya Bible: Konso muntu ke bakaka Mpeve ya Nzambi kaka na ntangu ya yandi mene ndima Yesu Kristo.

Tala Efeze 3:12. Sambu beto me tula ntima na Yesu, beto lenda sala inki?

Sambu beto me tula ntima na Yesu, beto ke na inswa na kutelema na meso ya Nzambi na kikesa yonso, sambu, beto zaba nde Yandi me katula masumu yonso na beto. Na ntwala beto ndimaka Yesu, yo vandaka mpidina ve. Ntete beto vandaka na boma ti na nsoni na kutelema na ntwala ya Nzambi.

Mambu mosi ya kiese sambu na lukwikilu na beto ya yai: Yo mene katula boma ti nsoni na ntwala ya Nzambi. Ntete, beto monaka nsoni mingi na ntwala ya Nzambi sambu na masumu na beto. Beto zabaka nde, beto me salaka mbi mingi na meso ya Nzambi. Yo yina, beto vandaka na kikesa ve. Beto bandaka na boma mingi sambu na jugement ya Nzambi.

KANSI, na ntangu ya beto ndimake Yesu ti ya beto tulaka Yandi ntima, Yandi katulaka masumu yonso na beto! Yo yina, beto me baka kikesa sambu na kisalu yai ya Yesu ya kuluta nene. Beto ikele na inswa ya kutelema na meso ya Nzambi na kikesa yonso.

Tala na Bible na nge, penepene na nsuka ya Kuwakana ya Mpa na I Jean 5:11-14. Moyo ya mvula na mvula ikele na nani?

Tanga diaka. Moyo mvu ya mvu ikele kaka mu Yesu Kristo. Muntu ya nkaka lenda sadisa nge ve na mambu yai--ata basantu ve, ata Mwense Marie ve. Moyo ikele na kati ya Yesu kaka.

Verset yai ke tuba nde na kati na beto bantu, nani ikele na moyo? Nani ikele na moyo ve?

Kana beto tala verset yai mbote, beto mona nde Nzambi keke kabisa bantu na bambu zole: ba yai ndima Mwana-Nzambi ti ba yai ndima Yandi ve. Moyo ya mvula na mvula ikele kaka na Yese Kristo. Bantu yonso ya keke ndima Yesu ve, bo keke na moyo mpe ve. Ebuna bimbuka zole ya bantu, ikele bayai ya keke na moyo, ti ba yina ya keke na moyo ve. Bo ya ke na moyo ve, tuba nde bo ikele na lufwa ya kimpeve tii bubuyai. Beto lenda tuba diaka nde raison mosi mosi ya bo sonikaka Bible ikele sambu na kupesa beto nzila na kuzaba nde, beto keke na moyo ya mvula na mvula.

Beto me mona nde bisalu ya mbote lenda gulusa muntu ve. Kuguluka ikele mambu ya lukwikilu mpamba, lukwikilu na mambu yonso ya Nzambi mene sala sambu na beto. Sambu na yai, inki keke mfunu ya bisalu ya mbote? Inki mutindu beto baprotasant ke talaka bisalu ya mbote?

Tanga Efeze 2:8-9 diaka. Baverset yai ke songa mbote nde muntu lenda guluka kaka na lukwikilu, kansi sambu na bisalu na yandi mosi ve. Ntangu yai, tanga verset 10. Yo ke songa nde nsuka ya kimvuka yai ya beto keke ti Kristo Yesu, yo ikele nde beto lenda kusala mambu mingi ya mbote.

Beto mene longuka nde, ntangu muntu keke tula ntima na Yesu, Mpeve ya Nzambi keke kwisa kukota na ntima na yandi. Mpeve ya Nzambi kati na beto bakristo keke pesa beto luzolo mpe ngolo na kusala yina ya te pesa Nzambi kiese. Bisalu ya mbote lenda kutula muntu kukuma mukristo ve. Muntu ke kumaka mukristo kaka sambu na lukwikilu na Yesu Kristo. Kansi, na nima muntu me kuma mukristo, yandi me baka Mpeve ya Nzambi. Yo yina, yandi ta zola kusala yina ta pesa Nzambi kiese. Bisalu ya mbote fweti monika mingi na luzingu na yandi, kansi bisalu yina yo keke ve sambu na muntu lenda kuguluka. Yo keke sambu yandi mene baka moyo ya mpa ntama. Bisalu ya mbote keke ve nzila ya lenda gulusa muntu, kansi yo keke songa nde muntu yai mene guluka. Bisalu ikele ve NZILA ya mpulusu, kansi NSUKA keti RESULTAT ya mpulusu.

Beto lenda longuka mbote diaka mpila ya beto baprotestant ti bampangi na beto bakatolika ke tuba sambu na bisalu ya mbote Beto longuka kituni yai:

Mbala ya nkaka nge ke kwikilaka nde bisakramento ta gulusa nge. Mbala ya nkaka nge ke kwikilaka nde, nge bakaka moyo ya mpa ntangu nge bakaka mbotika. Keti nge ke banzaka nde, nge lenda sala ngolo sambu na kulungisa bansiku ya Nzambi, sambu na kuvanda muntu ya mbote, nge banza nde Nzambi ta ndima nge sambu na makabu ya nge ke pesaka konso ntangu, sambu nge ke kwendaka na bisambu konso ntangu? Mbala ya nkaka nge ke sambilaka basantu, bawanzio, Santa Marie, nge ke banzaka nde bo ta sadisa nge na ntangu ya lufwa na nge. Nge ke vandaka kutula kivuvu (ntima) nde mambu ya muntinu yai lenda kugulusa nge.

Nge me mona malongi ya Bible, Ndinga ya Nzambi. Bible nde, mambu yai yonso ta sadisa nge ve ata fioti sambu na kuguluka. Kana nge zola tula ntima na Yesu, nge fweti kubikisa ntete mabanza yonso ya ntama nde muntu ya nkaka lenda mpe kusadisa nge. Ntete nge vandaka kusosa kuguluka na bamambu yai yonso. Bubuyai ikele ntangu ya mbote na kubalula ntima, na kutula ntima yonso kaka na Yesu Kristo, ebuna nge ta guluka. Tala diaka bansilulu ya Nzambi nde beto me mona na kapu yai.

Kana nge me balulaka ntete ntima ve na Yesu, kansi sesepiyai nge kele zola kutula ntima kaka na Yesu, lomba na ntima na nge bonso kele kisambu yai:

TATA NZAMBI, MONO KELE ZABA NDE, MONO MENE SALA MBI MINGI NA MESO NA NGE. MONO KELE ZABA BUBUYAI NDE, MONO LENDA VE KUDIGULUSA. MONO KE BIKISA SESEPIYAI, MABANZA NA MONO YONO, YINA YA VANDAKA NDE, BISALU NA MONO YA MBOTE TA LENDA KUGULUSA MONO. MONO ZOLA KUBIKISA MABANZA NA MONO YONSO SESEPIYAI, YA KELE TUBA NDE, BASANTU TA SADISA MONO. MONO ZOLA TULA NTIMA KAKA NA YESU KRISTO. MONO KELE KWIKILA NDE, MENGA NA YANDI MENE LUNGA SAMBU NA KUKATULA MASUMU NA MONO YONSO. GULUSA MONO SESEPIYAI. KOTA NTIMA TI LUZINGU NA MONO SESEPIYAI. MATONDO SAMBU NA PARDON YA MASUMU NA MONO. NA ZINA YA YESU KRISTO. AMEN

Keti nge lombaka bonso yai bubu? Kana yai vandaka mbala ya ntete nge me balula ntima, zaba nde, Yesu Kristo me kota ntima na nge. Nge me guluka! Nge mene kuma mukristo! Kana nge balula ntima sambu na malongi yai nge ke longuka, mono ke lomba nge na kukatula dititi ya nsuka ya mukanda yai. Vutula yo na beto awa na Ministeres pour Chaque Enfant sambu beto lenda yangalala ti nge, sambu beto lenda lombila nge mpe sadisa nge diaka na kikristo na nge.

*Tula ntima na
Mfumu Yesu Kristo*



Beto mene longuka malongi ya Bible. Yo yai: muntu ke gulukaka na ntangu yandi ke bikisa mabanza ya ntama nde mambu keti muntu ya nkaka ta tula yandi mbote ti Nzambi. Ebuna yandi fweti balula ntima, ti tula kivuvu kaka mu Yesu Kristo mpamba sambu na kugulusa yandi. Ebuna yandi ta kota na kinduku ti Nzambi.

Kana muntu me guluka, yo ke zola tendula inki? Inki yo zola tuba sambu na moyo yai ya muntu kele na yo na insi ntoto? Inki yo zola tendula sambu na moyo ya muntu na nima ya lufwa? Nsuka ya kuguluka ikele inki? Inki kele diswaswani kati na beto baprotestant ti mabundu ya nkaka sambu na bangiufula yai?

Bampangi na beto na mabundu ya nkaka ke longaka nde muntu LENDA KUZABA VE na moyo yai nde yandi me guluka. Bo me sonika mikanda mingi na kutuba nde muntu lenda bakisa mambu yai ya kieleka yonso kaka kana yandi kufwa na nitu yai ya kimuntu.


Bampangi yai ya nkaka, bo mpe ke ndimaka nde, bo ke baka moyo ya kimpeve na kati ya mbotika. Yai ikele malongi na bo. Bo mpe ke ndimaka nde: moyo yina ikele kima ya bo ke losa kukonda mpasi. Bo ke longaka mpe nde masumu mingi ke nataka lufwa ya kimpeve. Kana muntu sala masumu ya mutindu yina, yandi mpe mene losa moyo na yandi ya kimpeve. Bo ke longaka mpe nde, yandi lenda baka diaka moyo yai na nzila ya bisakramento ya dibundu. Bo ke tubaka diaka nde, kaka ndambu ya bantu fioti na dibundu kele mbote na ntangu ya lufwa na bo, na mpila nde bo lenda kota mbala mosi na zulu.

Ebuna, sambu na kukatula masumu yina me bikala na kati ya bantu mingi, bo fweti kota na kisika bo kele binga nde "kombelo". Kuna tiya ikele bonso na bilungi, bo kele malongi na bo. Bantu kuna kele mona mpasi sambu na kukatula masumu na bo ya fioti-fioti. Bo ke longaka nde: Bantu yai ya kele na moyo awa na ntoto lenda kusadisa bayina ya mene fwa, na lombila bo Nzambi, mpe bo ke futaka mbongo na banganga-Nzambi na bo sambu na kusala misa ya bafwa (messe de morts), na zina ya mpangi yina ya me fwa, sambu Nzambi kukatula mpangi yina na kombelo mpe kukotisa yandi na zulu. Kansi bo ke zabaka ve kana bantangu ya muntu yango fweti sala na kombelo na mpasi yina. Mpila kele ve na kuzaba kana yandi mene basika na kombelo, mpe me kota na zulu.

Ebuna, kana beto landa mbote-mbote nsuka ya lukwikilu ya bampangi yai, beto mona nde na bantu mingi yo ikele boma mpenza. Na mambu yai, ata bo sala ngolo, mpe ata bo sala mambu yonso ya bo ke zaba na kusala, bo ke zabaka na kieleka yonso ve nde Nzambi me ndima bo ya kieleka. Bo ke bikalaka kaka na boma ti keti-keti. Yai yonso ikele malongi ya bampumu ya nene ya mabundu ya nkaka, par example, Dibundu Katolika, ke ndimaka.

*Malongi Katolika —
Mpila ya kuzaba nde
nge me guluka ikele ve
na moyo yai.*

Mawa Boma Keti-Keti



Na mutindu ya malongi yina, beto Baprotestant ke monaka yo yonso mutindu ya nkaka kibeni. Bika beto longuka mbote Bible sambu beto kuzaba mbote-mbote malongi na yo sambu na nsuka ya lukwikilu na beto.

Nge lenda kangula Bible na nge, mpe nge kangula na mukanda ya I Jean 5:11-13. Keti beto yina me ndimaka Yesu Kristo lenda vanda na mpila ya kuzaba nde beto ikele na moyo ya mvula na mvula?

Ndinga mosi yina ya kele pesa beto kikesa na verset yai ikele ndinga yai "KUZABA." Nzambi twadisaka bantu na kusonika Bible na mpila nde beto lenda zaba mbote-mbote nde beto mene guluka, beto kele na Sambu na mambu ya kuguluka ya beto, keti-keti kele ve na ndinga ya Nzambi ya kele na Bible. Bible kele longi nde, muntu yina me ndimaka Mwana-Nzambi (Yesu), yandi ke na moyo. Bible ke pesa baklisto kikesa mingi. Mambu ya keti-keti sambu na kuguluka ya muntu, yo kele malongi ya ndinga ya Nzambi ve. Bible tuba nde muntu yina ndima Yesu ikele na moyo ya mvula na mvula. Keti moyo ya mvula na mvula ikele na nsuka?

Kana moyo ikele ya mvula na mvula, yo lenda suka ve. Kana yo kusuka, yo kele diaka moyo mvu ya mvu ve, kansi moyo kaka ntangu ya fioti. Kana yo ke tuba nde "mvula na mvula," yo ke zola kutuba bantangu ikwa?

Moyo ya mvula na mvula ikele na nsuka ve. Mvula na mvula disongidila nde kima yina konda nsuka. Yo ta bika kiteso mosi kaka ntangu yonso. Yo ta mana ve. Nsuka na yo ta vanda ata fioti ve. Ebuna, kana mukristo ikele na moyo ya mpila yina, keti yo lenda mana sambu na masumu na yandi? Sambu na inki?

Moyo ya mvula na mvula ikele na nsuka, keti mpila ya kumana ve. Kana nsuka na yo ikele yo ikele mvula na mvula ve. Yo ikele kaka ntangu fioti. Yesu me tuba ve nde Yandi ta pesa beto moyo kaka sambu na bantangu fioti, kansi kana mukristo sala masumu, moyo yai lenda kumana. Ikele ve! Inki mutindu ya moyo Nzambi mene pesa beto bakwikidi? Tala na Jean 3:16

Yesu kwisaka sambu beto kufwa ve na kimpeve, kansi sambu beto kuvanda na moyo mvu ya mvu. Beto lenda vanda ve na ntembe, mpe na boma sambu na moyo na beto. Bible kele longi beto nde, beto zaba beto ikele na moyo ya mpa na kati na beto, mpe nde moyo yina kele mvula na mvula.

Keti Bible kele longa beto nde, beto fweti kuingila lufwa na kuzaba ya kieleka kana beto ikele na moyo?

Kana beto ke kwikilaka malongi ya Bible, beto lenda vanda na kikesa sesepiyai nde beto kele na moyo ya mpa ntangu yai ya beto kele na luzingu. Ebuna beto lenda vanda ve na boma sambu na lufwa, sambu beto me kwikilaka ndinga ya Nzambi.

Inki kjima ya kele kwisila beto na nima ya lufwa? Keti bakristo fweti kwenda na kisika ya ndola bonso nde, kambelo? Tala na Jean 3:18, 3:26, ti 5:24. Bimvuka ya bantu ikele ikwa na meso ya Nzambi? Inki bimvuka yina?

Bimvuka ya bantu ikele kaka zole: 1) bantu yina ya me ndima Yesu Kristo, ti 2) bo yina ya me ndima Yesu ntete ve. Beto fweti zaba ne, kimvuka ya tatu ikele ve.


Tanga diaka. Inki ikele nsuka ya bimvuka yai zole?

Bayina yonso ya me ndima Yesu, bo ikele na moyo sesepiyai, kansi bo yina ya me ndima Yesu ve, bo ta baka ndola. Nzambi me zenga ntama nde Yandi fweti wila bo makasi sambu bo me ndima ve Mwana na Yandi. Yo yina Nzambi fweti pesa bo ndola.

Keti Bible ke tuba mpe sambu na kifulu ya tatu na kati-kati ya zulu ti bilungi--kifulu bonso kombelo?

Kana nge longuka Bible ya mvimba mbote, nge ta mona ve kifulu yina ya bo kele binga nde, kombelo. Na malongi ya Bible yo ikele ve. Bible kele tuba ve ata kifulu mosi, ya bantu ta baka ndola ya dioti ya beto lenda tuba nde, yo kele kombelo. Bantu ikele ve yina ta kwenda ve na zulu to na bilungi. Bantu yonso ta baka moyo sambu bo me ndima Yesu, to bo ta baka ndola sambu bo me buya Yandi. Ata mbala mosi ve Bible tuba nde kisika mosi ya ndola ya ntangu fioti, bonso kambelo ikele. Malongi yai ya kambelo kele basika ve na Bible, Ndinga ya Nzambi. Yo ikele mabanza ya bantu, na malongi ya mabundu ya nkaka. Ndinga ya Nzambi kele buya malongi ya mutindu yina.

*Konso muntu yina
me ndima Mwana
yina (Yesu) na
ntima na yandi,
yandi ke na moyo
ya mvula na mvula.*



Tala na Luc 16:19-31. Na kati ya kingana yai, Yesu ke tuba nde bisika na nima ya lufwa ikele ikwa? Tango yo.


Na kati ya kingana yai, Yesu kele songa beto nde na nima ya lufwa, bifulu kele kaka zole sambu na muntu. Bifulu yai zole ikele kaka bonso yina ya Jean 3 kele longa. Kifulu ya ntete kele kifulu ya mbote, yina ya Bible kele tuba ikele penepene na Abraham, Tata ya lukwikilu. Bawanzio ya Nzambi ke bakaka bantu na kisika yina. Kisika ya nkaka ikele kisika ya mpasi, ya tiya, ya ndola.

Beto ke bingaka kifulu yina _____ ti ya nkaka _____.

Kifulu ya ntete, kele kifulu ya mbote, ya kitoko, kifulu ya Nzambi ikele, mbala mingi, beto kele binga yo ZULU to BWALA YA NZAMBI.

Kifulu ya zole kele kifulu ya mpasi, ya tiya, ya ndola, kuna lukumu ya Nzambi kee monikaka ve. Mbala mingi beto binga yo BILUNGI to ZANGA YA TIYA. Yo ikele kifulu ya Nzambi salaka ntete sambu na Satana ti bawanzio na yandi.

Mbandu: Mwana na kingana ya Luc 16 kwendaka na bilungi, kansi nsukami kwendaka na zulu.



Malongi ya Yesu Kristo kele tuba nde:

Na nima ya lufwa ya muntu, bifulu ikele kaka zole. Yo ikele yai:

← ZULU, BWALA YA NZAMBI,

kana ve,

BILUNGI, ZANGA YA TIYA



Tala Luc 16:26. Sambu na inki bantu ikele ve na kifulu mosi sambu na kubasika na yo, kana ve na kukota na kifulu ya nkaka?

Na kati ya bifulu yai zole, kele na dibulu mosi ya nene ya kele kabula bo. Sambu na yo, Bible ke songa betp pwelele nde kifulu ya muntu ke kotaka na nima ya lufwa ikele kifulu ya kubikala kuna mvu ya mvu. Muntu lenda kubasika diaka ve na kifulu yina ya yandi mene kota na ntangu ya lufwa, kana na zulu, keti na bilungi. Ikele ve nde lombilu ya bantu lenda basisa yandi. Muntu lenda mona diaka mpila ya kubasika ve. Kulomba ya bantu, sambu na mpangi ya mene kufwa, lenda kukatula muntu ve na kifulu ya yandi mene kota na ntangu ya lufwa. Beto fweti zaba nde na nima ya lufwa, muntu ke kotaka na zulu, kana ve na bilungi. Yandi fweti kubikala na kifulu yina ya yandi mene kota mvu ya mvu.

Tala na Jean 10:27-29.
Mameme ya Yesu ikwa ta vila?

Ata dimeme mosi ve ya Yesu ta vila. Yesu Yandi mosi me tuba nde: "Bo ta fwa ve. Ata muntu mosi ve ta botula bo na maboko na mono." Kana beto simbaka Nzambi, beto lenda vanda na boma nde mbala ya nkaka beto ta lunga ve na kusimba ngolo mpenza. Kansi Nzambi muntu ke simba beto na ngolo na Yandi mosi. Yandi ke tuba nde "ata muntu mosi ve lenda botula bo na maboko na mono mpe ya Tata." Keti baverset yai ke tuba sambu na kupesa boma, nde mbala ya beto lenda kusala imbi, ebuna beto ta losa moyo yina ya Nzambi me pesa beto?



Malongi
Protestant:
**Bible pesa
beto mpila
na kuzaba!**

... beno kuzaba nde,
beno ke na moyo ya
mvula na mvula."

I John 5:13

Baverset yai yonso kele songa beto mambu ya beto lenda kutula ntima, mpe beto fwet zaba nde, moyo ya mpa ya Nzambi kele pesa na betto bakristo, yo lenda vila ve ata fioti.

Tala na Bisalu 16:31. Nzambi mene sila inki sambu na bantu yina yonso ya kele tula ntima mu Yesu?

Nzambi mene sila nde, "nge TA guluka." Beto lenda tula ntembe ve ata fioti Mambu ya nkaka kele ye, kaka kutula lukwikilu na Yesu. Bible ke tuba ve nde, "mbala ya nkaka nge ta guluka. Bible tuba kaka, nge TA guluka." Kana beto kele zaba nde Nzambi ikele kieleka, beto lenda kutula ntima na nsilulu yai ya Yandi. Kaka na ntangu nge tula ntima mu Yesu, ntangu yo yina mpe nge guluka mpenza.

Beto tala na I Jean 5:12. Awa beto kele mona nde, muntu yina ya mene yamba Yesu na ntima na yandi, yandi kele na moyo ya mpa inki ntangu?

Yandi IKELE na moyo ya mpa KAKA NA NTANGU YINA, ya yandi mene yamba Yesu na ntima na yandi. Kana nge mene baka Yesu na ntima na nge, nge fweti zaba na kieleka yonso nde; nge me baka moyo ya mpa, sambu Yesu ikele moyo, bonso Yandi mosi tubaka (Jean 14:6).

Tala na Luc 16:27-31. Inki mpila ya nkaka beto lenda zaba nde bantu lenda soba kifulu na bo na nima ya lufwa ve?

Mvwama zolaka na kubasika. Yendi sosaka mpila ya kuvutuka sambu na kusonga bampangi na yandi ya bikalaka na moyo nde kifulu ya ndola ikele, na mpila nde bo kwisa ve kuna yandi ke mona mpasi. Kansi, Nzambi ndimaka ve ata fioti. Mbuta Abraham tubaka nde bo kuna na ntoto kele na Bible, Ndinga ya Nzambi, sambu na kuzabisa bo mambu yonso ya kele tadila luzingu ya muntu na nzila ya Nzambi. Kana bantu ndima yo ve, bo ta ndima mpe ve, ata muntu yai katuka na bafwa kukwenda kulonga bo.

Kana yo ikele mpidina, inki beto fweti kutuba sambu na malongi ya kele tuba nde, kifulu ya bantu ta baka ndola ntangu fioti ikele? Inki beto lenda kutuba sambu na malongi ya kele tuba nde bantu yina ya mene kota na kombelo, bo lenda basika kuna mpe kukota na zulu?

Malongi ya kambelo kele kwenda ve nzila mosi ti malongi ya Yesu. Bible kele longa beto nde, na nima ya lufwa ya bantu, bisika kele kaka zole mpamba. Kifulu yai ya malongi ya bantu kele tuba sambu na bantu ya nkaka ya mene fwa, yo kele ve, kombelo ikele ve. Malongi yai ya kambelo katukaka ve na Ndinga ya Nzambi. Yo katukaka na mabanza ya bantu. Bible, Ndinga ya Nzambi, kele tuba yo na mpila ya nkaka.

Diaka malongi ya Bible kele tuba nde, kana muntu kota na kifulu mosi, na kati ya bifulu yai zole ya Bible kele longa beto (zulu ti bilungi), yandi fweti bikala kuna mvu ya mvu. Mpila kele ve ata fioti na nima ya lufwa muntu kusoba kifulu na yandi.

Beto baprotessant ndima ve malongi ya kombelo, sambu beto ke mona yo contre malongi ya Bible

Beto bantu ya mene tula ntima na Yesu, beto ta kwenda na inki kisika? Tala Jean 14:1-3.

Yesu tubaka nde beto ta vanda na "inzo ya Tata," kifulu mosi ti Yandi. Beto ta vanda ve ntama ti Nzambi, kansi kifulu mosi ti Nzambi Yandi mosi!

Tala na 2 Korinte 5:1. Kana nitu yai kufwa, inki nzo ya Nzambi ta pesa beto?

Kana mukristo mosi kufwa, yandi fweti kwenda mbala mosi na kifulu ya Nzambi kele. Kana beto bika nitu yai ya beto kele na yo, zaba mbote nde, beto fweti kukwenda mbala mosi kuvanda na kifulu ya Nzambi. Kele kaka na ntangu yina, ya beto kele katuka na nitu yai ya kimuntu.



Malongi ya kombelo kele zola tuba nde, beto fweti mona mpasi--ntete mapi ya masumu na bo, sambu na kukatula yo na nima ya lufwa na bo. Tala na Ba-Hebreu 9:28. Sambu na inki Kristo kupesaka nitu ti menga na Yandi bonso makabu na zulu ya kulunsi?

Yesu kufwaka sambu na kukatula masumu YONSO ya bantu yonso yina kele tula ntima mu Yandi. Menga na Yandi imene lunga! Nzambi me ndima yo!

Kana menga ya Yesu me lunga mpenza, keti kombelo ikele diaka mfunu sambu na kukatula masumu?

Kombelo ikele diaka mfunu ve ata fioti, sambu Yesu Yandi mosi me katulaka masuma YONSO na beto.

SOMMAIRE:

Sambu bantu kubakisa diaka mbote-mbote malongi ya kitini yai, beto mene longuka nde beto Baprotestant kele ndima ve kifulu yina ya bantu kele ku binga nde, kombelo. Kifulu yai ikele ve. Bible kele kulonga ngolo na mambu yai nde: na nima ya lufwa bifulu ikele kaka ZOLE: ZULU, kifulu ya bantu yina ya me ndima Yesu na ntima, kana ve BILUNGI, kifulu ya bantu ya buya Yesu. Bible kele longa beto nde: na nima ya lufwa ya muntu, yo kele na mpila ve ata fioti, muntu na kusoba kifulu na yandi. MPILA IKELE VE!

Kansi, mpila ikele ya bantu lenda zaba nde bo ta kwenda na zulu. Beto lenda ve kuinga lufwa sambu na kuzaba inki kifulu ya beto ta kwenda. Ntangu beto kele balula ntima, mpe kutula kivuvu na Yesu Kristo, beto kele kundima lusilu ya Nzambi ya kele tuba nde, Yandi mene pesa beto moyo ya mvula na mvula, beto mene kuma bantu ya dikanda na Yandi mosi. Yandi mene sila beto nzo ya mbote na zulu na ntangu beto kele kubika nitu yai. Beto fweti vanda na boma ve ata fioti, kansi beto lenda zinga kaka na kikesa yonso na ntwala ya Nzambi. Yai ikele malongi na beto baprotestante.



Bo yina ke na moyo—

Bo me butuka diaka. Jean 3:3

Bo me ndima Yesu na ntima na bo.
Jn. 3:15-16

Bo ke na moyo ya mvula na mvula.

Bo me guluka. Jean 3:17

Boi ke na ndola ve. Jean 3:18, Jean 5:24

Bo ke na moyo ya mvulu na mvula. Jean 3:36

Bo me basika na lufwa. Jean 5:24

Bo me kwisa na Yesu ti Yandi me yamba
bo. Jean 6:37

Bo ta tambula na mpimpa diaka ve.
Jean 8:12

Bo kele kuwa ndinga ya Yesu ti kulanda
mpe Yandi, mpe Yandi kele zaba bo bonso
bantu na Yandi. Jean 10:27

Bo ta fwa ve. Jean 10:28
Muntu lenda botula bo ve na Nzambi.

Bo ta vanda kifulu mosi ti Yesu na nzo.
Yandi mene kuyidika kifulu sambu na bo.
Jean 14:1-3

Bo mene kwisa na Nzambi na nzila ya Yesu
Jean 14:6

Bo ke na Mpeve ya Nzambi. Bo ikele
bantu ya Yesu. Rome 8:9

Nzambi me ndima bo. Rome 5:9

Bo kele na ngemba ti nzambi. Rome 5:1

Nzambi me katulaka bo na masumu.
Rome 6:22

Bo me kuma bantu ya mpa. Mambu na bo ya
ntama me mana. Mambu ya mpa me kwisa.
2 Korinte 5:17

Bo yina ke na moyo ve—

Bo me butuka diaka ve.

Bo me ndima Yesu ve na ntima na bo

Bo ta fwa ya mvula na mvula.

Bo me guluka ve.

Nzambi me zenga ndola na bo ntama.

Nzambi ta wila bo makasi.

Bo me bikala na lufwa.

Bo me kwisa na Yesu ve.

Bo ke tambula na mpimpa kaka.

Bo kele kulanda ndinga ya Yesu ve,
mpe Yesu kele zaba bo ve bonso
bantu na Yandi.

Bo ta fwa. Nzambi kele simba bo
ve.

Bo ta vanda sikamosi ti Yesu ve.
Bo mpe ta kota ve na nzo na Yandi.

Bo me meka na kukwisa na Nzambi
na nzila ya nkaka, kansi na nzila
ya Yesu ve. Nzila yina kele
kulunga ve, mawa.

Bo ke na Mpeve ya Nzambi ve. Bo
ke bantu ya Yesu ve.

Nzambi me ndima bo ve.

Bo kele na ngemba ve ti Nzambi.

Bo ikele na masumu na bo kaka.

Bo ikele na masumu na bo ya ntama
kaka.

continué

Bo yina ke na moyo -

Nzambi me tedimisa bo na lufwa ti Kristo.
Efeze 2:1, 4-5

Bo ke na kimvuka ti Kristo. Efeze 2:6

Bo yina ke na moyo ve -

Bo kele bonso bantu ya kufwa na
mambu ya kimpeve sambu na masumu
na bo.

Bo ke na kimvuka ti Kristo ve.
Bo kele landa luzolo ya Tata na bo
Satana. Jean 8:44

Mambu ya Tatu ya Diswaswani -- Bisambu

Inki mpila ya mbote beto lenda zitisa Nzambi? Mono banza nde bampangi ya nkaka zola mpe na kukumisa Nzambi. Beto yonso ikele na luzolo yina, kansi inki mpila ya beto ke sadilaka yo keke luswaswani mingi. Inki diswaswani ikele na kati na beto Baprotestant ti bampangi ya nkaka sambu na mambu ya bisambu?

Mbundana keti Mesa ya Mfumu ikele inki mutindu?

Na bisambu ya bampangi ya nkaka, mbundana keke centre ya bisambu na bo. Yo ikele mfunu mpe na kati ya bisambu na beto Baprotestant. Beto zola kutala bangiuvula tatu sambu na mbundana. Yo yai:

1. Mampa ti vinu ya mbundana ikele inki mpila?
2. Inki mfunu ya mbundana?
3. Yo ke sadisa beto inki mpila?

MAMPA TI VINU YA MBUNDANA IKELE INKI MPILA?

Beto tala na Matthieu 26:26-28. Inki Yesu zolaka kutubaka sambu na mampa ti vinya? Yo keke songa ihiki?

Yesu tubaka nde mampa vandaka kidimbu ya nitu na Yandi, ti masa ya vinya vandaka kidimbu ya menga na Yandi yina keke songa kuwakana ya Nzambi ti bantu. Na francais, yo keke tuba "ceci est mon corps," yai ikele nitu na mono; "ceci est mon sang," yai ikele menga na mono. Keti nge bambuka ntangu ya nkaka nde Yesu tubaka nde, "Mono ikele....."? Sonika yo awa.

E, mbala mingi Yesu vandaka kutuba na nzila na kubaka kima ya nkaka na kifulu ya kima ya nkaka, sambu na kukangula mabanza ya ntima ya bantu. Mbala mingi Yandi tubaka nde kima mosi VANDAKA kima ya nkaka, sambu na kusonga inki mpila kima mosi ikele BONSO kima ya nkaka. Beto lenda mona bambandu mingi na luzingu ya Yesu, kati na malongi na Yandi. Yandi nde, Mono ikele mwini ya ntoto yai, Mono ikele nzila, Mono ikele mampa ya moyo, mono ikele vinya ya kieleka, mono ikele kielo keti munoko ya lupangu, mono ikele mvungi ya mbote. Jean-Baptiste mpe tubaka nde: "Tala! Yandi ikele mwana-dimeme ya Nzambi." Yesu tubaka mbala mingi mutindu yai, mpe balonguki zabaka mbote inki Yandi zolaka kutuba.

Banduki na beto ya nkaka, bo ke kwikilaka nde, ntangu ya Yesu vutulaka matondo sambu na mampa, na mpimpa ya Mesa ya Mfumu ya ntete, mampa yina kitukaka KIBENI nitu ti menga na Yesu. Bo ke kwikilaka nde ntangu Yesu tubaka, "Yai ikele nitu na mono," Yandi tubaka nde mampa yina BALUKAKA, na mpila nde yo vandaka mampa diaka ve, kansi yo kumaka kima ya nkaka mpenza. Bo ke banzaka nde, yo kitukaka NITU, MOYO TI MPEVE ya Yesu Kristo, Yandi mosi kibeni.

Kansi, kana beto landa mabanza bonso beto ke sala konso ntangu ya nkaka, inki beto fweti tuba sambu na bandinga yai ya Yesu? Inki Yesu zolaka kutuba na bandinga yai?

Ntangu Yesu tubaka nde, "Mono ikele nzila" (Jean 14:6), keti beto lenda tuba nde Yandi kitukaka kibeni nzila kibeni, yina ya bantu lenda luta na makulu keti na kaminio? Yo kele yina ve! Kansi awa beto bakisa nde Yesu zolaka kutuba nde Yandi ikele BONSO nzila.

Na nkanda ya Matthieu 26:26, na kati ya bandinga yai ya Yesu, Yandi zolaka kaka kutuba nde, mampa yai ikele BONSO nitu keti IKELE KIDIMBU ya nitu na Yandi.

Ntangu Yesu tubaka nde, "Yai ikele nitu na mono," kaka na ntangu yina, nitu na Yandi vandaka wapi?

Mvutu na beto kele nde, nitu na Yandi vandaka kuna, na ntwala na bo, sambu Yesu tubaka bandinga yai na nitu na Yandi. Kana beto kele ndima nde, nitu na Yandi vandaka na ntwala na bo, nde bo vandaka na kumona yo na meso na bo, beto kele ve na mpila na kutuba nde mampa yina vandaka nitu na Yandi mpe. Keti Yesu vandaka na banitu zole?

Mpila ikele ve. Ntangu balonguki waka Yesu, bo banzaka ve nde mampa yina vandaka Yandi kibeni. Beto baprotestant kele ndimaka nde, balonguki bakisaka mabanza ya Yesu, sambu na mampa ti vinia, nde yo vandaka kaka kidimbu mpamba. Yo kele kiteso mosi na vinu, bo zabaka nswalu nde yo vandaka kaka kidimbu ya menga, yina ya nde Yesu pesaka na kilumbu ya ntwala sambu na masumu na beto. Ntangu Yesu tubaka "Yai ikele menga na mono," menga na Yandi vandaka kumonika. Inki mpila balonguki ta banza nde vinu yai vandaka menga na Yandi kibeni? Bo banzaka mutindu yina ata fioti VE.

Na verset 26, Yesu pesaka Nzambi merci. Yandi tubaka bandinga ya beto kele tanga awa. Tii bubuyai, banduka na beto ya nkaka banza nde mampa ti vinu kitukaka nitu ya Yesu kibeni. NA NIMA ya kulomba na Nzambi imene, Yesu tubaka (verset 29) "katuka ntangu yai, mono ta kunwa INKI diaka ve?"

Yesu zolaka kutuba sambu na vinu. Yesu tubaka nde yo vandaka VINU, ke songa nde na nima ya Yesu mene lomba Nzambi, vinu yina yo kitukaka ve Yesu Kristo, Yandi mosi. Yo bikalaka kaka VINU ntangu yonso, ata yo vanda vinu ya mfunu mingi, sambu yo ikele kidimbu sambu na bakristo na kubambukisa bontalu ya menga ya Yesu Kristo. Na beto Baprotestant, beto kele tuba bonso Yesu Yandi mosi tubaka nde yo ikele VINU.

Yindula diaka. Inki beto ke salaka na ntangu ya Mesa ya Mfumu sambu na mampa ti vinu?

Beto ke diaka ti kunwa yo. Beto lenda kundima ve mabanza yai ya kele kutuba nde na ntangu ya beto ke diaka mampa ti mbundana, nde yo kele nitu ya Yesu Kristo kibeni ya beto ke diaka konso kilumbu. Kana beto tubaka yo, beto ta vandaka kutuba mpe nde beto ikele KUDIA Yandi konso ntangu ya beto baka mbundana. Yo ikele mpidina ve?

Raison ya nkaka nde beto Baprotellant BUYA keti PROTESTER malongi nde mampa ya communion ikele Yesu, mpe nde na kubaka yo ikele na kubaka Yesu, yo yina.

Tala na Jean 1:11-12. Inki mpila ya muntu lenda KUBAKA keti KUYAMBA Yesu Kristo bubuyai?

Beto ke yambaka Yesu ntangu yina ya beto kele ndima Yandi na ntima na beto. Ntangu yina, beto tula kivuvu yonso na Yesu kaka, ebuna beto kituka bana ya Nzambi. Na kubaka to na kuyamba Yesu, yo kele ve mambu ya divumu, kansi yo kele mambu ya NTIMA ti MOYO na beto. Tala Jean 6:35. Yesu vandaka kutuba nde Yandi ikele inki?

Kana beto tala na verset 35, kuna beto ta mona diaka Yesu kele tuba kingana nde, Yandi kele mampa yina ke pesaka moyo. Mampa yai beto kele kudia yo inki mutindu?

Beto ke yambaka Yesu na ntangu yina ya beto kele ndima Yandi na ntima na beto. Na ntangu ya beto kele kutula kivuvu na Yesu kaka, beto kele kituka bana ya Nzambi. Sambu na yai, Yesu ikele bonso madia ya mbote, mpe bonso masa ya kitoko, yina ya kele fulusa muntu yina ya kele dia mpe ya kele kunwa yo. Yesu ke pesaka lusadusu yina ikele na nsuka ve. Na verset 47-48, Yesu kele tuba nde beto fweti kudia mampa yina ke pesaka moyo ya kimpeve. Keti Yandi tubaka nde beto fweti baka Yandi na kati ya mbundana?

Ikele ve. Yesu ke solula mbundana awa ve, kansi Yandi tubaka nde beto baka moyo ntangu beto ndima Yandi. Kana beto ndima Yesu, beto me dia mampa yina ke pesaka moyo ya kimpeve. Tala verset 63. Na kati ya mabanza yai, keti Yesu ke tuba nde beto baka mampa ya moyo na kinsuni keti na kimpeve?

Yesu songaka mbote-mbote awa nde Yandi vandaka na kutuba na mambu ya kimpeve. Awa Yesu ke solula ve mambu ya mbundana, kansi Yandi ke zola tuba nde, beto ke bakaka moyo na ntangu beto ke ndimaka Yandi.

Sambu na baraison yai yonso ya beto me solula, beto Baprotellant kele pesa mvutu yai na ngiufula ya ntete:

1. Mampa ti vinu ya mbundana zola kutendula inki?

BETO KELE KUNDIMA nde mampa ti vinu ya mbundana ikele kaka kidimbu ya nitu ti menga ya Yesu Kristo, yina ya Yandi pesaka bakristo sambu beto lenda bambuka bilumbu yonso mpila Yandi fwaka sambu na masumu na beto, sambu na kupesa beto moyo ya mvula na mvula.

Sambu beto ke ndimaka malongi yai ya kieleka, BETO FWETI BUYA KETI PROTESTER malongi yonso ya kwenda nzila mosi ti yo ve. Beto kele kubuya malongi yina ya kele kutuba nde, mampa ti vinu kele kukituka nitu ti menga ya Yesu Kristo kibeni.



Ee, mono ke mona nde mbundana kele kubambukisa beto bakristo mutindu Yesu fwaka sambu na kupesa beto moyo.



Mampa ya mbundana IKELE YE Yesu!

← IKELE VE! →



Vinu ya mbundana ikele ve Yesu.

Inki keke mfunu ya mbundana ?

Inki ikele mfunu ya mbundana? Tala mvutu na nkanda yai: I Korinte 11:24-25

Beto ke kwisaka na mesa ya Mfumu sambu na kuyindula keti na kubambuka Mfumu Yesu. Ntangu beto ke tala mampa ti dikopa ya vinu yina, beto keke yindula inki mpila Yandi pesaka menga ti moyo na Yandi sambu na kufuta mfuka ya masumu na beto

Bampangi na beto Bakatolika ke tula mbundana na mfunu mingi na bisambu na bo sambu bo ke banza nde yo ikele Yesu kibeni, ti nde bo ke baka Yandi mosi na kati ya mesa ya Mfumu. Beto baprotestant ndima yau ata fioti ve, kansi beto mpe mona mesa ya Mfumu mfunu na kati ya bisambu na beto.

Beto ke tuba nde, muntu fweti KUYAMBA Yesu na ntima na yandi na lukwikilu. Na ntangu yina, muntu mene kuma mukristo. Yandi mene baka mpe moyo. Na nima, yo keke mfunu sambu na muntu yai ya mene ndima Yesu, kubambuka na nzila ya mesa Mfumu mpasi yina Yesu monaka sambu na masumu na beto.

Beto lenda tuba nde luswaswanu ya nene keke monika na mpila nde bampangi na beto ya nkaka ke kwikilaka nde mampa ya mbundana ikele Yesu kibeni. Ndambu ya kuluta mfunu na bisambu na bo, yo ikele kufukimina mampa, to samba mampa ya nganga na bo me consacre to me pesa na Nzambi ti sakumiuna (sampula). Kikuma na bo ke fukamaka na bisambu, na ntangu bo kota nzo ya bisambu, ikele nde dibundu na bo ke longaka nde mampa ya mesa ya mbundana mene kituka kieleka nitu ya Yesu mpe menga, moyo ti mpeve ya Yesu kibeni. Bo ke fukiminaka mampa yina sambu bo keke kwikilaka nde yo keke Yesu kibeni. Sambu na inki be baprotestant ke buyaka malongi ya mutindu yina?

Na beto Baprotestant, beto fweti buya yo sambu beto kwikila ve nde mampa yina ikele Yesu. Beto keke kwikila nde bubuyai, Yesu ikele na zulu, mpe Mpeve na Yandi ke zinga na kati ya banitu na beto bakristo. Kana mampa yina ikele Yesu ve, beto lenda tuba nde, yo mene kuma kiteki kana bantu keke sambila yo bonso Nzambi. Yo keke mbote ve beto kufukimina mampa ya mbundana, kansi beto tala yo, ebuna beto sambila Yesu ma ntima na beto yonso.

Na inki nzila mbundana keke sadisa beto ?

Beto Baprotestant keke kaka na mabanza mosi mutindu beto mene tuba na luyantiku nde: Mbundana keke sadisa beto na kubambuka Yesu Kristo ti na kuyindula mpila ya Yandi fwaka sambu na masumu na beto na zulu ya kulunsi. Beto ke kwikilaka ve nde kubaka mbundana keke kuyamba Yesu na ntima. Beto ke yambaka Yesu na ntima na lukwikilu. Beto ke kwikilaka ve nde yo pesa beto nlemvo to mambote ya Nzambi sambu na beto. Nzambi songa nlemvo na konso muntu yina tula ntima na Yesu. Beto lenda vanda na lukwikilu yai ve nde yo pesa bantu moyo ya mpa, sambu muntu ke bakaka moyo ya mpa kaka na ntangu yina ya ntete ya yandi mene tula ntima na Yesu Kristo. Lusadusu ya kieleka ya beto lenda baka na mbundana, yo yai: beto keke bambuka Yesu na nzila ya kuvutula matondo na Yandi sambu na makabu ya Yandi pesaka sambu na kuguluka beto na masumu, mpe kusamba Yandi na ntima ya kieleka.

Nkailu ya Yesu pesaka ikele inki mutindu?

Mesa ya Mfumu kele inki? Bampangi ya nkaka na beto tuba nde misa na bo kele diaka kimenga ya menga ya Yesu. Bo ke tubaka diaka nde, ntangu nganga Nzambi na bo ke tubaka bandinga sambu na kusampula mampa ti vinu, yo ke kitukaka kieleka Yesu kibeni. Ebuna, malongi na bo kele longa nde, ntangu nganga na bo ke niangulaka yo na zulu, yo kele sambu yandi kele pesa menga ya Yesu na Nzambi mbala ya nkaka diaka bonso yina ya Yesu kibeni pesaka na zulu ya kulunsi. Bo ke kwikilaka nde, na ntangu ya misa, bo kele kupesa diaka nkailu ya nitu ti menga ya Yesu na Nzambi. Bo ke tubaka nde, Nzambi kele zola mpila yina. Bo ke banzaka nde, misa ikele nkailu ya Yesu ya bo kele pesa diaka. Yo yina bo kele banza nde yo ikele na ngolo ya kusadisa bo. Bo kele tuba nde, Nzambi ke zolaka yo, mpe ke ndimaka yo.

Beto Baprotellant fweti buya mabanza yai yonso. Sambu na inki? Tala na Ba-Hebreu 1:3. Lungisa mabanza ya banzila yai:

"Ntangu Yandi (Yesu) _____ masumu na _____
Yandi kwendaka na _____ na kuvanda na kiti ya
kimfumu, na diboko ya kibakala ya Nzambi-Mpungu."

Tala verbe "katulaka." Yesu katulaka masumu na beto na zulu ya kulunsi. Na ndinga ya Grek, ndinga ya ntete ya Kuwakana ya Mpa, verbe yai kele songa kisalu ya muntu mene sala. Mbala mosi imene, lusadisu yina salamaka na ntangu mosi imene. Ebuna, muntu yina ta sala yo diaka ve. Kaka na ntangu mosi imene, muntu yina mene manisa mpenza kisalu yina. Yandi lenda ve kusala yo konso ntangu, to kusala yo diaka mbala ya zole, sambu yandi me manisa yo.

Yindula nkailu ya Yesu pesaka na zulu ya kulunsi. Kana Bible kele longa beto nde, Yesu katulaka masumu na beto kaka mbala mosi, na ntangu yina ya Yandi kufwakaka na kulunsi, ebuna kana yo ikele kisalu ya yandi salaks mbala mosi imene, mpe kukonda mpila ya kusala yo mbala na mbala, ebuna inki beto fweti kutuba sambu na mabanza yai ya misa ya kele tuba bo kele tambika kimenga ya Yesu na kulunsi mbala ya nkaka?

Sambu na malongi yai ya mfunu ya kele tadila makabu ya Yesu pesaka na zulu ya kulunsi, malongi ya Bible kele kwenda ve nzila mosi ti malongi yai ya mabundu ya nkaka. Sambu na makabu ya Yesu kupesaka, Bible kele longa ve ata fioti mambu ya kupesa makabu mbala na mbala. Sambu na inki beto kele kusala ve bonso mabundu ya nkaka na nzila yai? Sambu menga ya Yesu mene LUNGA LUNGA LUNGA na kukatula masumu yonso na beto! Aleluya!

Tala diaka Ba-Hebreu 1:3. Na nima Yesu mene katula masumu na beto imene, Yandi salaka inki na nsuka?

Yandi tombukaka na zulu, ebuna Yandi VANDAKA na zulu ya kiti ya kimfumu. Yesu vandaka. Yo zola tendula inki? Beto yindula fioti mabanza yai. Keti banganga-Nzambi ya kuwakana ya ntama, bo vandaka na zulu ya kiti sambu na kusala kisalu na bo? (Tala Ba-Hebreu 10:11)

Ikele ve. Banganga ya kuwakana ya ntama vandaka ve, kansi bo telemaka na kisalu na bo. Sambu na inki? Sambu bo manisaka kisalu na bo ve. Yo fikaka masumu na beto bantu, kansi yo lungaka kukatula yo ve. Bo pesaka bankailu mingi ya menga. Yo vandaka kupesama mbala mingi, kansi makabu yina yonso, yo lungaka ve na kukatula masumu na beto bantu.

Kansi, beto kele mona nde, na nima Yesu pesaka nkailu ya menga na Yandi, Yandi VANDAKA. Yo ke zola kusonga inki? Yo ke zola kusonga nde kisalu na Yandi kumanaka. Nkailu ya Yandi kupesaka na kulunsi mene kulunga sambu na kukatula masumu na beto yonso. Nzambi ndimaka yo ya kieleka. Yo yina mambu ya kusala yo mbala na mbala ikele ve, sambu yonso kele ya kulunga. Tala na Ba-Hebreu 7:27. Makabu ikwa Yesu pesaka sambu na masumu na beto?

Yesu pesaka makabu MOSI, kaka mbala mosi. Bible kele tuba yo mbote-mbote: "Yandi pesaka makabu na Nzambi MBALA MOSI MPAMBA, ntangu Yandi kudipesaka Yandi mosi."

Keti Yesu kele bonso banganga ya Kuwakana ya Ntama yina fweti pesa nkailu mbala mingi, mbala na mbala?

Yesu ikele ve bonso bo. Makabu ya Yesu pesaka KELE YA KULUNGA, ebuna mpila kele ve ya kusala yo mbala na mbala. Yo kele diaka mfunu ve muntu kusala yo mbala na mbala, sambu mambu yonso ya yo me salamaka. Banganga-Nzambi ya Kuwakana ya Ntama, bo vandaka kupesama ntangu yonso makabu mbala zole. Ya ntete, sambu na masumu na bo mosi, na nima, sambu na masumu ya bantu. Kansi na Bible, beto ke mona nde, Yesu pesaka nkailu mosi mpamba. Yo zola kusonga inki?

Yesu vandaka na mfunu ve ya kudipesa nkailu ya masumu. Yandi mosi vandaka muntu ya kununga, ya kukonda kifu, sambu yandi vandaka kibeni Nzambi. Yandi salaka ata disumu mosi ve. Nkailu ya Yesu pesaka, yo vandaka sambu na masumu ya beto kaka.

*Kristo mpe kudipesaka
makabu KAKA MBALA
MOSI MPAMBA sambu
na kukatula masumu
ya bantu mingi.
BA-HEBREU 9:28*



*Nkailu yai
ikele ya
kulunga !*

Yesu kotaka mbala ikwa na kupesa makabu na Nzambi? Tala Ba-Hebreu 9:12.

Banganga-Nzambi ya Kuwakana ya Ntama vandaka kukota konso kilumbu, sambu na kupesa makabu. Kansi Yesu kotaka kaka mbala mosi. Menga na Yandi mene lunga! Mfunu kele ve Yandi kupesa makabu mbala zole, mpe mbala na mbala. Tala na Ba-Hebreu 9:27-28. Yesu pesaka makabu ya menga mbala ikwa?


Makabu ya Yesu pesaka kele kaka mbala mosi: yina ya Yandi pesaka na zulu ya kulunsi. Malongi yai ya Bible kele longa beto nde, makabu ya Yesu kele kaka yina mbala mosi ya Yandi pesaka. Malongi yai fwet vanda mfunu mingi na mabanza ya Nzambi, sambu Bible kele tuba yo mbala mingi.

"MAKABU KAKA MBALA MOSI MPAMBA!" Yina kele kieleka ndinga ya Nzambi. Kana Ndinga ya Nzambi kele kutuba mpila yina, keti misa ikele ya kieleka nkailu to makabu ya Yesu?

Ikele ve. Bible tuba nde nkailu kaka yai mosi ya kulunsi, yo mene lunga. Beto baprotessant kele ndima ve malongi yina kele tuba nde banganga-Nzambi fweti kupesa nkailu ya Yesu mbala na mbala, bonso bo vandaka kusala na Kuwakana ya Ntama. Malongi yai zole--malongi ya kupesa nkailu ya misa mbala na mbala, ti malongi ya kele longa beto nde nkailu ya Yesu pesaka na kulunsi, yo mene lunga,-- malongi yai zole kwenda nzila mosi ve. Yo yina, yo kele mfunu muntu KUSOLA inki malongi yina ya yandi fweti kukwikila.

*Bible Kele Kundima ve
nde misa kele kupesa
diaka nkailu ya Yesu.*

*Kristo mpe kudipesaka makabu
KAKA MBALA MOSI MPAMBA sambu
na kukatula masumu ya bantu
mingi. BA-HEBREU 9:28*



Tala na Ba-Hebreu 10:10 ti 10:14. Keti nge kele mona mabanza ya nkaka awa?

Baverset yai kele tuba nde Yesu pesaka makabu kaka mbala mosi mpamba. Tala Ba-Hebreu 10:19. Inki ya menga ya Yesu mene sala sambu na beto yina me kwikila Yandi?

Na ntangu ya Kuwakana ya Ntama, kifulu ya kuluta nsiku vandaka ndambu ya ntete ya Nzo-Nzambi, kuna bo vandaka kubinga nde, kifulu ya kuluta busantu, kuna vandaka kumonika presence ya Nzambi. Kuna bantu lendaka kukota ve ata fioti. Kansi bubu, beto bakristo ikele na inswa ya kukota na kifulu ya Nzambi Yandi kele kibeni Yandi mosi.

Tala na Jean 19:30. Ntangu Yesu fwaka na zulu ya kulunsi, Yandi tubaka inki?

Yesu tubaka, "IMENE!" Ntalu ya kuguluka na beto, Yandi mene manisa yo. Yandi mene futa ntalu yonso ya masumu na beto. Makabu yonso ya kulunga, Yandi imene futa yo. "IMENE!" kele ve ti kima ya nkaka ya beto lenda kusala na zulu na yo. Tala na Matthieu 27:51. Na ntangu ya Yesu fwaka, inki mambu ya kuyituka ya salamaka na kati ya Tempelo ya Nzambi?

Rido keti lele ya ngolo vandaka kukanga munoko ya kifulu ya kuluta nsiku. Rido yina vandaka kukanga bantu nzila ya bo kukota ve, sambu bantu ya masumu ,kana bo kota kuna na ntwala ya Nzambi kibeni, bo ta fwa.

Kansi, kaka na ntangu ya Yesu kufwaka na zulu ya kulunsi, rido yina PASUKAKA, katuka zulu tii na insi. Nzambi Yandi mosi pasulaka yo na kusonga nde menga ya Yesu mene fwana na kukatula masumu na beto. Sambu na yai, Yandi mene kangula nzila sambu na beto ya mene ndima Yesu, beto kwisa na kikesa na ntwala na Yandi mosi Nzambi.

Bamvula lutaka mingi, bambisi bamillion kufwaka sambu na kupesa makabu na kati ya Tempelo. Ata mbala mosi ve rido pasukaka, sambu menga ya bambisi yai lungaka ve. Kansi ntangu Mwana ya Nzambi kibeni pesaka menga na Yandi ya ntalu, Nzambi ndimaka yo. Tala na Efeze 2:13, 18 ti 3:12. Inki kima ya kuluta nene ya menga ya Yesu mene sala na beto?

Beto vandaka ntete ntama ti Nzambi sambu na mbi na beto. Yo yina, mpila vandaka ve na kutelema na ntwala ya Nzambi. Kansi, beto me kuma penepene ti Yandi sambu na menga ya Yesu, sambu menga yina me katulaka masumu na beto. Ebuna, beto lenda telema na meso ya Nzambi. E, na kikesa yonso! Beto ke kwisa na lunungu ti na ngolo na beto mosi ve, kansi na lunungu ti na ngolo ya Yesu Kristo. Menga ya Yesu vandaka ya kulunga na meso ya Nzambi.

Kana yo kele mpila yina, keti Nzambi ta vanda na kiese na kumona bantu kele meka na kupesa diaka menga ya Yesu bonso nkailu? Keti mambu yai lenda pesa Yandi kiese?

Beto Baprotellant kele tuba nde, mambu ya mutindu yai lenda pesa Nzambi kiese keti lukumu ata fioti ve. Kana muntu kupesa diaka nkailu ya menga, yo zola tuba nde nkailu yina ya ntete kele lunga ve, mpe nde yandi fweti yika ya nkaka na zulu na yo.

Bampangi, pardo. Kana beto sala mpila yina, yo kele zola songa nde, beto kele na kuvwenza nkailu ya Yesu pesaka na zulu ya kulunsi, yina nde Tata Nzambi ndimaka. Bible kele tubila beto pwelele nde nkailu ya nkaka ikele diaka ve, sambu nkailu mosi ya kulunga vandaka. Nkailu yina vandaka menga ya Yesu yina ya Yandi pesaka mbala mosi kaka na zulu ya kulunsi sambu na beto. Nzambi ndimaka yo, ti Yandi mene pasula rido na Tempelo, sambu na kusonga nde ya kieleka, Yandi mene ndima yo na mpila yina. Beto lenda kupesa nkailu diaka ve, mpe mfunu ikele ve na kusala diaka yo.

Beto fweti kundima kaka nkailu yai mosi ya nene, ya kulunga, ya Yesu mene pesaka na zulu ya kulunsi. Beto fweti kutula kaka ntima yonso mu menga na Yandi. Yo mene lunga sambu na beto! Na Mesa-Mfumu, kuna mpila kele diaka ve ya beto lenda kupesa diaka nkailu. Yo ikele mpila ya beto lenda kubambuka nkailu mosi yai ya Yesu pesaka sambu na beto na zulu ya kulunsi.

SOMMAIRE:

BETO KE KWIKILAKA nde Yesu pesaka nkailu mosi mpamba na zulu ya kulunsi, mpe nde yo mene lunga na kukatula masumu yonso na beto. Mesa-Mfumu ikele mpila ya bakristo kele bambuka nkailu yai mosi.

BETO KELE KUBUYA KETI PROTESTER malongi yai ya kele kutuba nde nganga-Nzambi lenda kupesa diaka nkailu ya Yesu na bisambu to na Mesa-Mfumu. Beto kele kubuya malongi nde misa ikele nkailu.



*Nkailu mosi kele
KULUNGA !*

*Mbala mosi kele
KULUNGA !*

(Nani lenda lolula masumu na beto?)

Beto bambuka nde bapayeni na ntangu ya Kuwakana ya Ntama vandaka kuwa mfunguna ya masumu ya bantu na nzila mosi ya kinsweki, kuna beto kele mona nde banganga ya bapayeni vandaka kulolula masumu na bo. Bantu ya nkaka kele tuba nde banganga ya dibundu na bo ke sala kiteso mosi tii bubuyai. Kansi, mabanza yina katuka ve na Bible.

Na ntangu ya Kuwakana ya Ntama, na ntwala kukwisa ya Yesu, banganga vandaka ya mutindu zole. Beto ta mona nde banganga ya bapayeni kuvandaka, kansi bo vandaka kibeni ve banganga-Nzambi. sambu bo bikisaka nzila ya Nzambi songaka ntama, sambu na kusala na mpila na bo mosi. Na mikanda ya histoire ya ntama, bo kele kusonga nde banganga ya payeni vandaka kuwa mfunguna.

Banganga ya Nzambi ya kieleka mpe kuvandaka, ti beto lenda tanga histoire na bo na kati ya Kuwakana ya Ntama. Na Kuwakana ya Ntama, keti nge me tanga nde banganga-Nzambi waka mfunguna ya masumu?

Mono vilaka ve na kupesa nge verset sambu na ngiufula yina na zulu. Mono pesaka verset ve sambu banganga-Nzambi salaka mpidina ve ata fioti. Nge lenda tanga Kuwakana ya Ntama yonso mbote-mbote, kansi nge ta mona ata mbala mosi ve nde banganga-Nzambi waka mfunguna na kinsweki keti bo tubaka nde bo lenda lolula masumu. Kansi, Bazwif yonso zabaka mbote-mbote nde kaka Nzambi lunga kulolula masumu. Tala na Marc keti Malako 2:5-7. Inki Bazwif kuna yulaka?

Bo yulaka, "Nani lenda bikisila muntu ya masumu?" Bo mpe pesaka mvutu, "Kaka Nzambi, Yandi mosi." Bo zabaka mbote nde, kele ve ti muntu ya nkaka ya lenda bikisila masumu, kansi kaka Nzambi. Bo bakisaka ve nde Yesu bikisilaka muntu yina sambu Yandi vandaka Nzambi kibeni.

Keti na kati ya Bible, kana nge tanga mbote-mbote na Kuwakana ya Mpa yonso, keti nge lenda mona kifulu ya kele kutuba nde balonguki vandaka kuwa masumu ya bantu?

Sambu na ngindu yai, mono vilaka ve na kupesa nge verset. Na kati ya Bible yonso, verset ya mutindu yai ikele ve. Non, Bible kele longa ve nde bantumwa vandaka kuwa mfunguna, ata mbala mosi ve. Na Bible, beto kele kutanga ndambu mingi sambu na bisalu ya Pierre ti Paul, kansi beto kele tanga ve ata fioti nde bo vandaka kuwa mfunguna ya bantu. Beto kele tanga mpe ve nde bakristo kundima masumu na bo ma makutu ya bantumwa. VE!

Beto tala na Bisalu to 8:18-22. Keti Simon Pierre waka masumu ya muntu yina, mpe lolulaka masumu na yandi?

Ikele ve. Pierre salaka mpidina ve sambu kaka Nzambi lenda kulolula muntu ya masumu. Ebuna Pierre tubilaka yandi muntu yina nde, lomba Nzambi. Kaka Yandi ta lolula nge. Pierre yandi mosi lolulaka muntu yina ve.

BANTU YONSO, ATA BANTWADISI YA DIBUNDU, IKELE VE NA INSWA
NA KUWA MFUNGUNA KETI NA KULOLULA MASUMU YA BANTU.

Na malongi ya Bible, mfungana ya bakristo ikele na mpila zole.

1. Mbala mosi na Nzambi kaka.
2. Muntu na muntu na mpila nde beto yonso lenda lombilana.

Ntete, tala Proverbes keti Bingana 28:13.

"Yandi ya fika masumu na yandi, yandi ta toma ve, kansi
yandi yina ta ndima mpe ta yambula yo, yandi ta mona nkenda."

Na verset yai, muntu fweti sala inki sambu na masumu na yandi?

Kana muntu me sala masumu, yandi fweti kusala mambu zole: yandi fweti kundima masumu na yandi, mpe yandi fweti kuyambula yo keti kuzenga na nsi ya ntima na yandi nde." Mono ta sala yo diaka ve." Muntu yai fweti ndima masumu na yandi na nani?

Yandi fweti kundima masumu na yandi nswalu na Nzambi na mbala mosi, sambu masumu yonso ikele ntete mambu ya mbi na meso ya Nzambi. Na verset yai ya beto zola kulonguka, yo kele tuba ve nde beto fweti ndima masumu na beto na muntu ya nkaka to na nganga-Nzambi. Muntu ya nkaka, ata bantwadisi ya dibundu, bo ikele ve na inswa na kulolula muntu, sambu yina ikele inswa ya Nzambi kaka.

Tala I Jean 1:9. Kana beto kundima masumu na beto na ntwala ya Nzambi, Yandi ta sala inki sambu na beto?

Yandi ta lolula beto mpe ta sukula imbi na beto yonso. Yo kele mambu ya kieleka nde, masumu na beto yonso ya beto salaka, Yandi ta katula yo, na mpila nde Yandi kumona yo diaka ve. Ebuna, ntima na beto ta kuma kitoko diaka na meso ya Nzambi.

EBUNA, MFUNGUNA YA BAKRISTO IKELE NTETE NA NTWALA YA NZAMBI
YANDI MOSI.

*I Jean 1:9 Kana beto
ndima masumu na beto...
Nzambi... ta bikisila
beto, mpe yandi ta
sukula beto sambu
na kukatula mambu
na beto yonso ya imbi.*



Tala Jacques 5:16. Inki mpila ya nkaka bakristo lenda ndima masumu na bo?

Beto lenda kundima masumu na beto muntu na muntu, na ntwala ya mpangi yina ya yandi me sala imbi, na mpila nde beto lenda LOMBANA nkenda sambu Nzambi kusadisa beto yonso na mambu na beto yonso ya imbi. Sambu na inki beto kele tuba nde kulomba nkenda yai kele ve bonso kundima masumu na meso ya banganga-Nzambi?

Yo ikele kiteso mosi ve na mpila yina ya mabundu ya nkaka ke salaka, sambu awa, yo ikele ve nde muntu mosi kele ndima na ntwala ya muntu ya nkaka. Bakristo vandaka kundima masumu bo na bo. Beto yonso kele kiteso mosi na meso ya Nzambi. Beto ndima masumu beto na beto na mpila nde beto mpe lenda lombilana. Kulomba nkenda yai ikele ve sambu Nzambi kulolula beto, kansi yo kele sambu bampangi ya nkaka lenda kubakisa inki kele lweka ya beto kele bumolo, sambu bo lenda mona mpila ya mbote ya kulombila beto na Nzambi, mpe beto ta lenda diaka kusadisa bo na kulomba sambu na lweka yina ya bo kele bumolo.

Inki kele malongi ya Bible sambu na kulomba nkenda kana muntu mene sala muntu ya nkaka imbi? Tala na Matthieu 5:23-24.

Kana beto zaba nde beto me sala mbi na mpangi na beto, to kana muntu ikele na mambu ti beto, beto fweti yidika yo, kuwakana sambu na yo na ntwala beto kwisa sambu na kusamba Nzambi. Kuwakana ti bampangi fweti vanda mambu ya kuluta mfunu mingi kati na beto. Sambu na inki mutindu yai ya kulomba nkenda lenda ve kuvanda kiteso mosi ti yai ya kukwenda na ntwala ya nganga-Nzambi?

Nge lenda lomba ndolula na muntu ya nkaka sambu na imbi yina ya nge me sala yandi mosi. Yandi lenda mpe kulolula nge, na zina na yandi mosi. Kansi yo kele ve nde kana yandi mene lolula, yandi mene sala yo na zina ya Nzambi; bonso yina ya Nzambi ke salaka na muntu kana yandi mene kufwa nsiku ya Nzambi.

Ebuna, kana kulomba nkenda yai kele mutindu yai, yo kele ve bonso yina ya banganaga ke salaka na mabundu ya nkaka. Mbala mingi kana bantu ya masumu kukwenda na ntwala ya banganga ya mabundu ya nkaka, mutindu kele malongi ya mabundu na bo; bo ke tubaka nde, banganga yina kele bantu kele kulolula masumu ya bantu. Kansi na baverset yai, Yesu kele tuba nde, kana muntu sala mbi na mpangi ya nkaka, yandi fweti lomba nkenda kaka na muntu yina. Nge fweti kuwakana ti yandi. Sambu na mambu ya kuwakana ti Nzambi, kaka Nzambi yandi mosi kele na inswa ya kuwakana, keti ya kulolula muntu ya masumu. Ebuna mono zola yufula: keti nganga-Nzambi lenda kulolula masumu ya muntu? Malongi ya ndinga ya Nzambi kele longa inki?

Nganga-Nzambi lenda kulolul masumu na nge ve! VE! VE! Malongi ya Bible kele longa ve nde, banganga kele na nswa ya kusala mutindu yina. Yo kele mbote na beto kubakisa nde: bantu yonso ya ke kwendaka na ntwala ya banganga-Nzambi sambu bo katula masumu na bo, mpe ya ke banzaka nde masumu na bo me mana, bantu yai yonso fweti zaba nde masumu na bo kele na bantima na bo tii bubu yai. Nzambi me lolulaka bo ntete ve, kana muntu mene kwisa ve na Yandi.

Kansi, vanda na boma ve. Sambu menga ya Yesu me futaka mfuka yonso ya masumu na beto kana ya kieleka beto me tulaka Yandi ntima, keti me ndimaka Yandi na kati ya ntima.

NZAMBI KELE LUNGA NA KULOLULA MASUMU NA BETO,
SAMBU YESU MENE FUTAKA MFUKA YA MASUMU NA BETO YONSO

NZAMBI MPE KELE NA LUZOLO YA NENE NA KULOLULA BETO.

Inki kele kisalu ya Yesu bubuyai? Tala na I Jean 2:1

Yesu ikele AVOCAT na beto na ntwala ya Nzambi. Yandi muntu ke bondila Tata Nzambi sambu na beto. Yesu, Yandi mosi, kele kulomba ntangu yonso sambu na beto, mpe kele kunwanina beto bakristo.

Beto ikele na inswa na kukwenda na ntwala ya Nzambi sambu na menga ya Yesu. Mpangi, kana nge vandaka ntete kundima masumu na nge na ntwala ya nganga ya dibundu, keti yantika bubu yai nge lenda ndima na mpila yai ya Bible kele kulonga sambu na bakristo?

Keti nge ta bikisa na kukwenda na banganga ya dibundu sambu na kukwenda kaka mbala mosi na Nzambi? Sambu na menga ya Yesu, Nzambi zola kulolula beto, mpe kuwila beto mawa!

Nzambi ZOLA Kulolula nge!

Banganga - Nzambi ikele banani?

Bantu yonso ke zabaka nde diswaswanu ikele na kati na beto Baprotestant ti bampangi na nkaka na mpila ya beto kele bingaka bapasteur na beto. Na lweka ya beto ta mona nde na mabundu ya nkaka, bo ke bingaka bantwadisi na bo kaka "pasteur" ve, kansi "Nganga," keti "Pere." Ebuna, yo kele mbote beto longuka nani ya beto kulenda binga "nganga-Nzambi."

NGANGA-NZAMBI IKELE NANI?

Nganga-Nzambi ikele muntu yina ke pesaka makabu ya kimenga na Nzambi, mpe ya ke kwendaka na ntwala ya Nzambi sambu na bantu bonso muvukisi.

Banganga-Nzambi vandaka na ntangu ya kuwakana ya ntama. Kisalu na bo ya nene vandaka yina ya kupesa nkailu ya menga ya bambisi. Ntete bo pesaka yo na zikwa kaka na nseke, bonso Noe pesaka sambu na kuvutula matondo na Nzambi na nima ya deluge. Na nima, bo pesaka nkailu yina na kati ya Nzo-Nzambi. Bantu ya nkaka vandaka ve na inswa ya kukota na kifulu ya kuluta busantu, kifulu Nzambi mosi kuvandaka. Kaka Mfumu ya Banganga-Nzambi vandak na inswa yina.

Bapayeni vandaka bantu ya buyaka ndinga ya Nzambi. Na kati ya bapayeni kuvandaka mpe ti banganga mpe. Bo mpe vandaka kupesa makabu ya menga. Kansi na kati ya bamambu yai, bo vandaka kusala bamambu mingi ya nkaka, yina ya vandaka kukwenda ve nzila mosi ti ndinga ya Nzambi.

Mubandu ya mambu ya kwendaka nzila mosi ve ti ndinga ya Nzambi:

- Bo vandaka kupesa bantu mbotika sambu na kukota na kimvuka na bo.
- Bo vandaka kutuba nde mbotika ke pesaka moyo.
- Bo vandaka kulosa masa ya "nlongo" to ya "santu".
- Bo vandaka kuwa mfunguna ya bantu ya masumu na kinsweki.
- Bo vandaka kupesa ndolula ya masumu ya bantu yina.
- Bo vandaka kulonga nde kombelo kele sika mpe na nima ya lufwa.
- Bo vandaka kusonga bantu na bo nde bo fweti futa mbongo na banganga na bo, sambu bo lomba, mpe bo pesa makabu na mpila nde Nzambi kukatula moyo ya bantu yai na kombelo.
- Bo vandaka na inswa na kubala nkento ve.


Beto me mona nde banganga na ntangu ya kuwakana ya ntama vandaka na mitindu zole: Banganga-Nzambi ti Banganga ya bapayeni. Banganga-Nzambi ya kuwakana ya ntama, bo vandaka VE bonso banganga ya bapayeni. Ya kieleka, beto kele ve na mpila na kutuba nde banganga ya bapayeni vandaka banganga-Nzambi, sambu mpila bo salaka, yo pesaka Nzambi kiese ve. Kieleka, bo vandaka banganga ya bampeve ya mbi.

Inki mbalula ya nene kotaka na mambu yai ya makabu ya menga kaka na ntangu ya lufwa ya Yesu? Tala Kusonga 1:5 ti Rome 5:10

Menga ya Yesu natilaka beto kuwakana ti Nzambi. Yo vutulaka kinduku na kati na beto ti Nzambi. Kisalu ya banganga-Nzambi yonso ya ntama vandaka na kiyeka yina ve. Tala Kusonga 1:5 diaka. Menga ya Yesu salaka inki sambu na masumu na beto?

Menga ya Yesu me katulaka masumu yonso ya beto bayina ya mene tula ntima na Yandi, Yesu. Nzambi me ndimaka makabu yina ya menga ya Yesu, ata Yandi ndimaka ve makabu yonso ya ntama. Bambuku mambu ya Bible kele tuba sambu na rido, lele yina ya Tempelo ya pasukaka. Kisalu ya banganga-Nzambi na nima ya rido yina, yo kuvandaka na kupesa makabu ya menga. Kansi nkailu ya Yesu kele ya kulunga, ebuna makabu yai ya menga ya bambisi ikele na mfunu diaka ve na ntwala ya Nzambi! Mfunu ya banganga-Nzambi na kupesa makabu ya menga ikele diaka ve. yo mene manaka ntama.

Ntangu yina ya rido pasukaka, yo songaka mambu ya nkaka mpe. Ntete, kisika yina ya kuluta nlongo, kifulu ya presence ya Nzambi kibeni, yo vandaka ya kukanga. Yo vandaka nsiku nde, kaka Mfumu ya banganga-Nzambi vandaka na inswa ya kukota kuna. Mbala mingi yandi mpe kotaka na kikesa ve, kansi na boma mingi. Mpila rido pasukaka, yo ke zola songa nde kielo ikele ya kukangula bubu. Beto yonso kele na inswa ya kukota na ntwala ya Nzambi, na nzila ya Yesu Kristo. Mambu ikele diaka ve na kati na beto ti Nzambi.



Tala na Ba-Hebreu 10:19. Beto bakwikidi me baka na inki inswa sambu na menga ya Yesu?

Beto kele na inswa ya kukota na kifulu ya kuluta nsiku, kifulu yina vandaka na nima ya rido ya Nzo-Nzambi, kisika Nzambi kibeni ikele. Na ntangu beto kele lomba Nzambi, beto mosi kele kota mbala mosi na ntwala ya Nzambi kibeni. Kansi na kuwakana ya ntama, kaka Mfumu ya banganga-Nzambi vandaka na inswa yina. Keti bubu yai beto bakristo kele na mfun ya banganga-Nzambi na kunata beto na ntwala ya Nzambi?

Ikele ve. Malongi yai yonso ke tuba nde menga ya Yesu me kangula beto nzila na kukota na kisika ya Nzambi ikele. Tala Kusonga 1:6 ti 5:10. Bakristo yonso me kuma banani?

Bakristo yonso me kuma banganga-Nzambi. Beto ta kota ti menga na maboko ve, kansi menga ya Yesu mene sukulaka bantima na beto. Nganga-Nzambi kotaka na ntwala ya Nzambi sambu na kulombila bantu na yandi. Nzambi me pesaka beto mpe kosalu ya kulombila bampangi yina ke na moyo ti bamambu ya mutindu na mutindu. Tala I Timothee 2:1. Beto fweti lombila banani?

Beto fweti lombila bantu yonso, mpe bantu yina ke yala beto. Bakristo yonso ikele banganga na kosalu yina. Yo ikele kosalu mosi ya mfunu ve sambu na kimvuka msoi ya bantu, to ya bantwadisi kaka, kansi yo ikele kosalu ya konso mukristo, na kulombila bampangi bonso nganga-Nzambi.

Tala I Pierre 2:5 ti 2:9. Inki makabu ya beto banganga-Nzambi lenda pesa na Nzambi bubu yai?

Beto lenda pesa Nzambi makabu ya menga ya bambisi ve, kansi makabu ya kimpeve. Bakristo yonso ikele banganga. Ebuna, inki mpila ya beto lenda binga bapasteur na beto banganga-Nzambi?

Bapasteur na beto ikele banganga-Nzambi, bonso mpe beto lenda tuba nde bakristo yonso keke banganga-Nzambi nzila mosi ti bo. Yo keke ve nde bo keke na ngolo, kana ve na kiyeka, ya kuluta bakristo ya nkaka. Nge lenda tanga malongi ya kuwakana ya mpa ya mvimba. Keti nge ta mona nde bakristo ya ntete vandaka kubinga bapasteur keti bantumwa "banganga-Nzambi"? Tala kana bapasteur keti bantumwa vandaka kusala kosalu ya banganga-Nzambi sambu na kupesa makabu ya menga, mpe kulolula masumu ya bantu. Inki malongi nge keke mona na kati ya Bible?

Na malongi ya kuwakana ya mpa nge ta mona ve mambu yina ata mbala mosi. Konso ntangu kana kuwakana ya mpa keke tuba sambu na banganga-Nzambi, yo keke pwelele nde yo keke tuba sambu na banganga-Nzambi ya Bazwif ya kuwakana ya ntama, keti yo keke tuba sambu na bakristo yonso. Yo keke pwelele nde yo keke kutuba ve sambu na kimvuka ya bantwadisi. Na kati ya malongi ya kuwakana ya mpa, bantwadisi keke ve bonso banganga-Nzambi ya kuwakana ya ntama, bayina ya vandaka kupesa makabu ya menga. Kansi bakristo yonso keke kusala kosalu ya kinganga-Nzambi na kukwenda na ntwala ya Nzambi mpe na kulomba sambu na bampangi ya nkaka. Makabu ya menga ya Yesu mene lunga na kukatula masumu ya bantu.

Banganga-Nzambi na dibundu ya Yesu ikele kaka banani? (Tala diaka Kusonga 1:6).

Bantu yonso ya mene ndima Yesu Kristo bonso Mfum na bo mpe Mvulusi, bo mene kuma banganga-Nzambi. Tala mbote-mbote na kuwakana ya mpa yonso. Sosa kana nge lenda mona nde banganga ya kuwakana ya mpa vandaka kupesa makabu ya menga. Tala diaka kana bo vandaka kumona nde Mesa ya Mfumu kele bonso makabu. Inki nge kele kumona?

Kana nge sosa na mukanda yai ya mvimba, nge ta mona ve ata kifulu mosi yina ya kele tuba nde Mesa ya Mfumu kele makabu. Malongi yai kele katuka ve na ndinga ya Nzambi. Beto lenda tuba nde, malongi yina kele kwenda nzila mosi ve ti malongi ya Ndinga ya Nzambi.

Ebuna yo kele mutindu yina, malongi yai ya ke tuba nde kaka bantwadisi ya dibundu ikele banganga-Nzambi, mpe nde bo kele na ngolo kuluta bakristo ya nkaka, yo me katuka wapi? Beto fweti zaba nde malongi yai ke katuka ve na ndinga ya Nzambi!

Nge ta bambuka nde na ntangu ya kuwakana ya ntama, na bilumbu yina yitaka kwisa ya Yesu, banganga vandaka ya mutindu zole. Na banzila mingi, beto ta mona nde, bamambu mingi ya mabanza ya mutindu yai katukaka na mumbandu ya banganga ya mbi ya bapayeni, yina zabaka Nzambi ve. Tala mpila bo vandaka kusala yo.

Inki mpila malongi yai ya mbi kotaka na dibundu? Inki mpila bantu ya mabundu ya nkaka yantikaka na kubanza nde kaka bantwadisi na bo vandaka banganga-Nzambi? Inki mutindu bo yantikaka kubanza nde "banganga" na bo vandaka kupesa makabu na Nzambi na ntangu ya mbunana? Inki mpila ya malongi yina kele pindula malongi ya Bible?

Na bamvula 313 na nima ya lubutuku ya Yesu, mfumu mosi ya nene na zina ya Constantin tubaka nde yandi mene kituka mukristo. Na ntangu yai, yonso vandaka na kiese mingi na kati ya dibundu. Kiese ya nene vandaka nde leta ya Rome bikisaka kuzoma bakristo diaka ve. Sambu Mfumu Constantin balulaka mabanza, kuzoma ya bakristo kumanaka. Kansi na mpila ya nkaka, yo vandaka kilumbu mosi ya mawa sambu na dibundu. Na ntangu yina, Mfumu Constantine vandaka kundima ti kusosa mbotika ya bantu mingi bayina ya zabaka Nzambi ve.

Mfumu Constantin monaka mfunu ve na kulomba bantu na kubalula ntete ntima na bo na Yesu mpe kutula ntima na Yandi, kansi luzolo ya Constantine vandaka nde bo fweti baka kaka mbotika ti bo fweti kota na dibundu. Na kati na bo, bantu mingi vandaka kaka payeni. Bo ndimaka ve ndinga ya Bible na mutindu malongi na yo vandaka kulonga. Yo yina, na ntangu yina, dibundu yantikaka kufuluka na bantu yina ya vandaka bakristo ve na kati ya ntima na bo, mpe bamingi na kati na bo pindulaka ntima ve na nzila ya kutula ntima na bo na Yesu.

Na ntangu yina, bantwadisi ya dibundu zolaka nde bapayeni kukota mingi na dibundu. Bo zengaka nde dibundu lenda sala mambu ya nkaka ya bapayeni vandaka kusala, sambu na kubenda bapayeni nde bo lenda kota na dibundu kukonda mpasi. Bampila ya bayeni, bo pesaka bampila yai mazina ya mpa, sambu bampila yai kumonika bonso bampila ya bakristo.

Dibundu vandaka na lukumu mingi, mpe yo fulukaka na bapayeni mingi. Bo kotisaka mpe na dibundu banganga na bo, banganga-payeni ya landaka nzila ya Nzambi ve. Bo kotisaka na dibundu bamambu ya bambuta na bo. Kansi kuna beto ta mona nde, bo vandaka kubinga bo banganga-Nzambi ya bakristo, sambu na kutuba nde, mbotika me kitulaka bo bakristo.

Beto fweti zaba diaka nde banganga-bapayeni vandaka kupesa makabu ya mampa na Mfumu-Nkento ya zulu, kiteki mosi na bo. (Jeremie 7:18, 44-15-30). Kaka na nzila yina, bamambu ya mbi ya bisalu ya banganga-Nzambi ya bapayeni kotaka na dibundu, mpe bo vandaka kusadila Mesa ya Mfumu kaka na mabanza ya makabu ya biteki na bo. Bo ndimaka nde mampa yina vandaka Yesu kibeni, mpe nde bo ke pesaka makabu ya nitu ya Yesu mbala na mbala na Nzambi.

Yai mpe vandaka mpila mosi ya bo vandaka kuzwa mbongo. Sambu kana bantu vandaka kwikila nde nganga-Nzambi vandaka na kiyeka ya kulomba keti sala mambu yankaka yina ta katula mpangi na bo na kambelo, bo mpe ta futa mingi sambu yandi sala yo. Bapasteur zolaka yo mpe, sambu yo pesaka bo kifulu ya lukumu na meso ya bantu. Bantu banzaka nde kaka na ndinga ya nganga-Nzambi, mampa ti vinu ya mbunana kitukaka ya kieleka menga ya Yesu, moyo ti mpeve mpe na Yandi. Bo monaka nganga yina bonso Nzambi kibeni. Bo banzaka nde yandi vandaka na kiyeka ya nene na kati na bo.

Na ntangu yaina dibundu vandaka na kiese na kumona nde bapayeni ti mbongo kotaka mingi na dibundu. Bapasteur vandaka na kiese sambu bo vandaka kubaka lukumu mingi, mpe bo vandaka kubaka mbongo mingi, sambu bantu vandaka kuwa ndinga na bo bonso ya kieleka ndinga ya Nzambi.

Bantu mingi vandaka na kiese sambu na mambu yina, kansi awa mono ke zola kuyula nge ngiufula mosi:

KETI NGE BANZA NDE NZAMBI VANDAKA NA KIESE NA YO?

Mono ke kwikilaka yo ata fioti ve. VE! Malongi ya mutindu yina kele kuvwenza kisalu ya nene ya Yesu salaka sambu na beto. Kisalu ya Yesu salaka mene kulunga mpenza sambu na beto. Kansi na mabundu ya nkaka, bo kele banza nde bo fweti pesa makabu ya Yesu diaka mbala na mbala. Bo me baka menga ya Yesu bonso nde yo kele ya kulunga ve sambu na kukatula masumu ya bantu. Bo ke kangaka nzila sambu beto yonso kukwenda ve na ntwala ya Nzambi na mpila ya Bible kele kulomba beto, na nzila ya menga ya Yesu. Bo me vutula bantu na nzila ya boma diaka. Bo me yambula nzila yina ya bantu lenda kutula ntima, na nzila ya kubakisa nde Nzambi pesaka na konso mukristo, na mpila nde yandi lenda kwisa kaka mbala mosi na ntwala ya Nzambi.

Bampangi, beto kele na mambu ti bo keti na banduku na beto ya mabundu ya nkaka. Beto kwikila nde mingi na kati na bo ikele bantu yina kele kusosa Nzambi na kati ya ntima na bo yonso. Beto mona mambu ti bo ve.

Kansi beto ke mona mambu mosi ya nene na mpila ya malongi na bo kele longa bantu. Beto ke simba malongi ya Bible nde menga ya Yesu imeme LUNGA, beto mpe ke simba malongi ya Bible nde konso MUKRISTO ikele NGANGA-NZAMBI. Ebuna beto fweti BUYA keti PROTESTER malongi yonso ya ke kwenda nzila mosi ve ti malongi yai.

YESU KRISTO ME KANGULA BETO NZILA NA KUKWISA NA NZAMBI! LUKUMU NA NZAMBI!

Bika beto kwisa na ntwala na Yandi na kikesa yonso, mpe na ntima ya kiese ti lutondo. Tanga na Efeze 2:13 ti 3:12.

SOMMAIRE SAMBU NA MALONGI YA BANGANGA-NZAMBI:

BETO KELE KUNDIMA NDE:

Banganga-Nzambi vandaka na ntangu ya Kuwakana ya Ntama. Kisalu ya nene na bo na kupesa nkailu.

Nkailu ya menga ya Yesy kele ya kulunga, yo yina muntu ikele na kiyeka diaka ve ya kupesa nkailu na zulu ya yina.

Bakristo yonso me kumaka banganga-Nzambi ya kieleka sika mosi ti bantwadisi ya mabundu na bo.

Kaka Nzambi Yandi mosi kele na inswa ya kulolula masumu ya bantu.

Bakristo yonso kele na inswa ya kukwisa mbala mosi na meso ya Nzambi.

BETO KELE KUBUYA NDE:

Banganga-Nzambi ikele bubu yai na ntangu ya Kuwakana ya Mpa. Kisalu ya kupesa nkailu ikele tii ntangu yai.

Mesa ya Mfumu kele makabu ya nitu ti menga ya Yesu.

Kaka banganga-Nzambi na kati ya dibundu, bo yai bantwadisi, mpe banganga-Nzambi ya kieleka.

Bantu lenda kulolula masumu ya bantu na zina ya Nzambi.

Bakristo ke na mfunu ya nganga-Nzambi to ya bantu ya nkaka sambu na bamambu na bo kukuma na ntwala ya Nzambi.



Bakristo yonso ikele banganga-Nzambi!

Inki disongidila ya zina yai—"Santu" to "Saint"?

Ndinga yai "santu" ikele na francais "saint(e)". Disongidila na yo kele nde, muntu ya longo mpenza, muntu ya kele na masumu ve. Saint ikele muntu ya ke konda masumu, muntu ya ke salaka kaka mambu ya Nzambi ke zolaka. "Saint" ikele muntu ya kele kulunga mpenza na meso ya Nzambi.

Keti beto bantu ikele mutindu yina?

IKELE VE! Tanga mbote-mbote na Rome 3:10-23. Inki mpila Nzambi ke mona beto bantu?

Nsuka ya mambu yai yonso beto ke mona na Rome 3:23: "Bantu yonso salaka masumu, bo ke na lukumu ya Nzambi mpe ve." Na luzingu na beto, beto mosi kele lunga ve ata fioti na meso ya Nzambi. Mbala ya nkaka beto ke banzaka nde, beto ikele ndambu mbote, kansi ndinga ya Nzambi kele longa nde, "Ata muntu mosi ve salaka mambu yina ya MONO ke zolaka." Kana mambu kele mpila yina, keti beto lenda vanda basantu na luzingu na beto mosi?

Mpila ikele ve. Ata beto sala ngolo beto mosi, beto bankwa masumu ikele ve na ngolo ya kusala mambu yina ya lenda pesa Nzambi kiese. Ata muntu mosi ve ke salaka mambu ya mbote. (Tala verset 12). Na meso ya Nzambi, bantu yonso me salaka masumu, mpe bo kele na nkembo ya Nzambi ve. Keti kele na muntu na ntoto yai ke salalaka masumu ve? Tanga na 2 Korinte 5:21.

Bible kele longa beto nde, kaka muntu mosi mpamba kele konda masumu: Yesu kristo, Mwana-Nzambi. Verset ya beto mene tanga kele kusonga mbote-mbote nde Yesu kuvandaka na masumu ve ata fioti. "kristo vandaka na masumu ve." Yandi mosi kaka kele lunga na meso ya Nzambi. Na Rome kapu 3 na Bible, beto me tanga nde, "bantu yonso me sala masumu."

KANSI, kana beto kutanga na Kuwakana ya Mpa, kuna bet ta mona nde bantumwa ke sonika na bakristo, mpe mbala mingi bo kele binga bo basantu. Kana nge ikele na Bible ya ndinga ya francais, tala na Romains 1:7. Inki mpila Paul bingaka bakristo ya Rome?

Na francais yo kele tuba, "Appeles a etre saints," disongidila nde, bantu ya longo mpenza. Na Kuwakana ya Mpa verset yai ke tuba, "bantu na Yandi mosi," na Bible ya ntama ya bo ke bingaka "Luwawana ya Mpa" yo ke tuba "bazolwa ya Nzambi, ya bingwa kuvanda banlongo." Beto ke zaba nde beto me sala mbi mingi ya kuluta na meso ya Nzambi. Ebuna, inki mpila Nzambi lenda tuba nde beto ikele basantu to banlongo?

Yindula ndinga "mukristo." Kana nge mene tula ntima yonso na Yesu, nge me kota na Yandi, keti mu Yesu Kristo, nge me kuma MU-Kristo, na kati ya Kristo. Nzambi ke tanga masumu na nge diaka ve. Yandi ke tala nge na kati ya Yesu. Zina "santu" ikele kutendula ve mambu ya luzingu na beto ya mbote. Beto ikele ve na luzingu ya mbote. "Santu" disongidila nde Yesu mene katula masumu na beto. Tala na Kusonga 1:5. Inki mpila Yesu katulaka masumu na beto?

Menga na Yandi mene katulaka masumu na beto. Yandi fwaka na kifulu na beto. Yandi futaka mfuka yonso ya masumu na beto. Ebuna, Nzambi ndimaka makabu yina. Yo kele ya kulunga na meso ya Nzambi. Ebuna, yo me katulaka masumu na beto yonso. Nzambi lenda kutala masumu na beto diaka ve, kansi Yandi ke tala beto bakristo inki mpila?

Yandi ke tala beto MU KRISTO. NA KATI ya muntu yina vandaka na masumu ata fioti ve. Ebuna na ntangu nge ndimaka Yesu Kristo na ntima na nge, nge KUMAKA longo na meso ya Nzambi, SAMBU NA KRISTO, MPE NA KATI YA KRISTO. Bakristo yonso ikele basantu (banlongo)! Sonika awa: Bible kele tuba nde banani ikele basantu?

Bakristo yonso, bantu yonso yina me tula ntima mu Yesu Kristo, bo ikele basantu. Bo ikele basantu, banlongo sambu Yesu me katula masumu na bo, me sukula ntima na bo, sambu bo me kota na kati ya Yesu yina ke konda masumu.

BAKRISTO YONSO IKELE BASANTU, BANLONGO! Malongi ya Bible, yo yai. Na traduction ya ntama, Luwawana ya Mpa, bo ke binga bakristo "banlongo" ya Nzambi. Na Kuwakana ya Mpa, bo ke tuba kaka "bakristo", sambu ya kieleka, Nzambi ke tala bakristo yonso bonso ndambu ya nitu ya Yesu keti bonso bo ya ikele long ya ikele santu na ntwala na Yandi.

Tala baverset yai, kuluta mbote na francais ti na Luwawana ya Mpa, ti sonika mpila Paul ke binga BAKRISTO.

Bisalu (Actes) 9:13--

Rome 1:7--

I Timothee 5:10--

I Korinte 1:2--

II Korinte 1:1--

Efeze 1:1--

Filipe 1:1--

Kolose 1:2--

Na baverset yai yonso, bantu Paul ke binga na francais saints (basantu, banlongo) ikele banani?

Bo ikele bakristo, bantu yina vandaka ntangu yina na kati ya mabundu ya Rome, Korinte, Efeze, Galatie, etc... Bo vandaka bantu ya vandaka na moyo ntangu yina. Bo vandaka na kuzinga, sambu Paul ke sonikila bo. Na kati ya mikanda yai Paul me sonikila bo, yandi mpe nganinaka bo sambu na masumu na bo. Bo vandaka basantu sambu na luzingu na bo mosi ve. Moyo ya bo kibeni lungaka ve na meso ya Nzambi, kansi bo bakaka longo ya Yesu Kristo, bo kumaka Balisto. Bo vandaka mpe bankwa masumu bonso beto, kansi bo kumaka basantu na kati ya Yesu. Keti nge mpe me kuma santu?

Kaka nge mosi ti Nzambi lenda pesa mvutu na ngiufula yai. Kana nge me yamba Yesu mu ntima na nge yonso bonso Mvulusi mpe Mfumu na nge, kaka na ntangu yina, nge kumaka mukristo, santu, nlongo ya Nzambi. Kana nge zaba mbote nde nge me baka longo ya Yesu Kristo ntama, sonika zina na nge na nima awa:

Mono, _____ zaba nde mono me tula ntima mu Yesu Kristo,
(zina na nge)

ebuna mono me kuma SAINT(E) _____
(zina na nge diaka)

Basantu ikele ve bantu ya longo kuluta bo ya nkaka, bo ya me lunga bo mosi na meso na Nzambi. Beto yonso kele ya kulunga ve, kansi ntangu beto ndima Yesu bonso Mvulusi, beto kuma Basantu mu Yandi. Basantu ikele ve kaka bantu yina me fwa keti bo yina me kota na zulu. Bambuka yina ya beto longukaka na nzila ya mene luta, Paul ke sonika titre ya "basantu" sambu na bantu yina vandaka na moyo ntangu yina.

BASANTU=BAKRISTO
BAKRISTO=BASANTU

Keti basantu ikele bantu yina ya ke vukisaka bantu ya kele kuzinga ti Nzambi? Tala na I Timothee 2:5. Bantu ya mutindu yai (bantu ya kele kuvukisa bantu ti Nzambi) ikele ikwa?

Mvukisi (muntu yina kele vukisaka Nzambi ti bantu ikele kaka mosi mpamba. Zina na yandi Yesu Kristo. Kana yo kele mpidina, keti basantu lenda vanda bantu ya kele vukisa bantu ti Nzambi (mediateur)?

Ikele ve. Basantu ikele vukisaka bantu ti Nzambi ve, na mpila nde bantu lenda lomba na bo, ebuna bo ta lomba Nzambi sambu na beto. Ikele ve. Kaka muntu mosi ikele na kisika yina na kukwenda na ntwala ya Tata Nzambi sambu na beto. I Timothee 2:5 me songa beto nde zina na yandi ikele Yesu Kristo. Kana beto tala na Ba-Hebreu 12:24, nani ikele mediateur ya Kuwakana ya Mpa?

Mediateur ikele kaka Yesu Kristo, Yandi mosi mpamba. Bible ke tuba ve ata fioti nde basantu ikele bamediateur. Tala na Jean 14:6. Nzila ikele kaka mosi na kukwenda na Tata Nzambi. Zina na Yandi nani?

Yesu tubaka na verset yina nde Yandi vandaka nzila na kukwisa na Tata Nzambi. Yandi mpe tubaka ngolo nde nzila ya nkaka vandaka ve. Ata muntu mosi ve ta kwisa na Tata na nzila ya nkaka.

Keti basantu ikele nzila na kukwenda na ntwala ya Nzambi?

Ikele ve, sambu beto me mona na I Timothee 2:5, na Ba-Hebreu 12:24 ti na Jean 14:6 nde kaka Yesu mpamba ikele nzila na kukwisa na Tata Nzambi.

Ebuna, keti yo ikele mbote na kulomba lusadusu ya basantu yina me fwaka?

Ikele ve. Sosa ngolo na Bible ya mvimba, na kuzaba kana bakristo ya ntete lombaka na basantu yina me fwaka. Nge ta mona yo ve, sambu mambu ya mutindu yina kele kwenda nzila mosi ve ti malongi ya Yesu, ya kele tuba nde, Yandi mosi ikele nzila. Yo kele kwenda ve nzila mosi ve ti malongi ya Bible ya kele tuba

nde, Yesu Yandi mosi mpamba ikele muvukisi (mediateur). Keti nge bambuka—basantu ikele banani?

Basantu ikele bakristo yonso, sambu ntangu beto ndimaka Yesu, Nzambi kele mona beto na insi, keti na kati ya longo ti lunungu ya Yesu. Kansi Bible ke pesaka beto inswa ve na kulomba na bantu. BASANTU IKELE BANTU. Tala na Luc 4:8. Beto fweti lombana na nani?

Lombilu ikele kiteso mosi ti bisambu. Nzambi kele zabisa beto nde, beto fweti samba Mfumu Nzambi na beto, Yandi mosi mpamba. Kana beto lombana na basantu, yo lenda kupesa Nzambi kiesa ve, yo mpe ke fwaka nsiku na Yandi.

Beto longuka mutindu ya Nzambi songaka bantu na Yandi na ntama:

Nge fweti vanda na banzambi ya nkaka ve na ntwala na Mono. Nge fweti sala kiteki na kusamba ve, ata kifwani ya kima na zulu keti na ntoto, keti na masa. Nge fweti fukama na ntwala na bo ve, mpe sadila bo ve, sambu Mono Mfumu Nzambi na nge ikele nkwa kimpala sambu na lukumu na Mono. Exode 20:3-4.

Keti Nzambi zola beto na kulomba bantu ya nkaka?

Nzambi me tuba ngolo mpenza nde Yandi zola beto na kulomba ti kusamba Yandi kaka.

SOMMAIRE YA MALONGI SAMBU NA BASANTU:

BETO KE NDIMA NDE:

Kaka Yesu Kristo ikele longo na meso ya Nzambi, sambu na luzingu na Yandi mosi.

Bakristo yonso ikele basantu ya Nzambi.

Bakristo kuma basantu kaka na ntangu yina ya Yesu kele kota na ntima na bo, na moyo yai ya nsi-ntoto.

Beto fweti kwisa penepene na Nzambi na nzila ya Yesu, sambu kaka Yandi mosi kele muvukisi (mediateur).

Beto fweti lombana ti samba kaka na Nzambi.

BETO KE BUYA NDE:

Bantu lenda zinga bo mosi na mpila nde Nzambi ta ndima bo sambu na luzingu na bo.

Kaka ndambu ya bantu ya mbote-mbote ikele basantu.

Bantu ke kumaka basantu ntangu bo ke kotaka na zulu.

Beto lenda kwenda na Nzambi na nzila ya lusadusu ya basantu.

Beto lenda lombana na basantu.

Bakristo yonso ikele basantu !

Ntangu beto keke kulomba, beto bakristo fweti lomba na nani? Yesu Kristo longaka na balonguki na Yandi na kulomba na nani? Tanga na Matthieu 6:9.

Beto fweti kulomba kwa Tata Nzambi. Yesu tubaka nde, ntangu beto keke lomba, beto fweti lomba mpila yai: "Tata na beto keke na zulu....."

Beto fweti kulomba na Tata Nzambi na zina keti na kiyeka ya nani? Tanga Jean 14:15.

Beto fweti kulomba na zina ya Yesu Kristo. Nzambi me sila nde Yandi ta wa lombilu yonso ya bakristo keke kulomba na zina ya Yesu Kristo, kansi ata mbala mosi ve Yandi me sila nde Yandi ta wa lombilu na zina ya basantu, bawanzio, keti muntu ya nkaka. Inki vandaka malongi ya Yesu sambu na nzila ya kukwisa na ntwala ya Nzambi? Tala Jean 14:6.

Yesu tubaka nde YANDI MOSI keke nzila. Nzila ya nkaka ikeke ve yina ya lenda kunata muntu na zulu ya Nzambi. Kana muntu kumeka kukwenda na ntwala ya Nzambi na banzila ya nkaka, mbandu, na nzila ya basantu, Yesu songaka na ntwala nde, bo lenda kuma ve. Yandi mosi mpamba keke nzila na kukwenda na ntwala ya Nzambi!



*Kulomba na
Nzambi kaka
na zina ya
Yesu!*

Beto fweti samba nani? Tala Luc 4:8.

Beto fweti samba Mfumu Nzambi kaka. Kaka Yandi mpamba ikele nkwa yina lunga sadisa beto, mpe nkwa lunungu na kubaka bisambu na beto. Nzambi me pesa nsiku nde beto fweti samba Yandi kaka. Kana bantu ya nkaka sambila keti lomba na muntu ya nkaka, keti yo ikele masumu?

Lombilu ya mutindu yina kele masumu mosi ya nene, sambu bantu yina kele lemuka ve na lutumu keti nsiku ya Nzambi, yina ya kele kulonga nde, bantu lenda kusamba kaka Nzambi Yandi mosi. Mbala mingi bantu kele lomba na banzila ya nkaka, mpe bo ke banzanka nde kulomba na bo ke pesaka Nzambi kiese, kansi yo ke pesaka Yandi kiese ve, ke zitisaka Yandi ve.

Ebuna beto fweti buya malongi ya basantu ti landa keti ndima malongi ya Bible, mpe beto fweti buya lombilu na Santa (Mwense) Marie, lombilu na bawanzio, keti konso nani ya nkaka. Beto fweti lomba kaka na Tata Nzambi na zina ya Yesu Kristo bonso Ndinga ya Nzambi ke longa beto.

Keti nge ta yantika na kulanda kaka na mpila Bible ke ndima?

*Kulomba
basantu
ve!
Kaka Yesu
mpamba
ikele nzila na
kukwisa na Nzambi.
Jean 14:6, 1 Timothee 2:5*



Inki mpila beto fweti lomba na Tata Nzambi? Yesu longaka balonguki na Yandi inki na Matthieu 6:7-9?

Yo kele nde, ntangu bakristo kele lomba, beto lenda lomba ve ti bandinga mingi ya mvutukila ya mpamba ya beto kele tuba mbala na mbala. Bampani ke banzaka nde, bo fweti tuba bandinga mingi-mingi na ntwala Nzambi, sambu Yandi ta wila bo. Yesu tubaka nde kutula bandinga mingi ve, sambu yo ikele mpila ya mbote ve na kusamba Nzambi. Nzambi ke na mpasi ve na kuwa lombilu na beto. Tata na beto ke zaba mambu yonso na ntwala beto lomba na Yandi. Yandi zaba yonso yina ikele na ntima ti na mabanza na beto.

Bantu mingi ke zolaka na kulomba na chapelet (sepele). Lombilu ikwa na Mwense Maire ikele na chapelet? Keti Nzambi kele ndima lombilu ya mutindu yai? Bambuka Matthieu 6:7-9.

Yindula mambu yai: Konso ntangu muntu lomba na chapelet, yandi kele vutukila lombilu na santa Marie MBALA 50! Yonso ikele kaka kiteso mosi!

Chapelet ikele ve nzila ya mbote ya Nzambi kele ndima nde beto kusamba Yandi keti kulomba na Yandi. Kuna, bo kele kulomba mingi na Marie. kansi Bible ke tuba nde beto FWETI LOMBA TATA NZAMBI KAKA na zina ya Yesu Kristo.

Mambu ya zole kele nde, yo ikele mvutukila ya mpamba. Kisambu yai ya chapelet, fweti kusalama mbala 50 ya kukonda raison.

Lombilu yai, yo ke zitisaka Nzambi ve sambu, yo ke kwenda ve nzila mosi ti ndinga ya Bible.

Sambu na inki bantu kele zola kutuba bambu mingi-mingi ya mpamba na meso ya Nzambi? Keti yo ikele mpasi na kubaka lusadusu ya Nzambi? Matthieu 7:11

Nzambi na beto ke ZOLA na kusadisa beto, bantu na Yandi. Yandi ikele na ntima ya ngolo ve, mpe makutu ya kufwa ve. Lusilu na Yandi kele nde, Yandi ta pesa mpenza bima ya mbote na bo yina ya kele lomba YANDI yo na ntima ya kieleka. Mvutukila mingi ikele mbote ve sambu Nzambi zola kusadisa beto ntangu beto binga zina na Yandi sambu na kupesa Yandi lukumu.

Beto bakristo ikele na kiyeka na kukwisa na Nzambi na inki mpila? Tala na Ba-Hebreu 4:16.



Beto lenda kwisa na ntwala ya Nzambi na kikesa na kiyeka ya zina ya Yesu. Kana beto me kwisa na ntwala na Yandi, beto zaba nde Yandi ta bikisila beto mpe ta sadisa beto. Ebuna, beto bakristo lenda ve bondila na Nzambi bonso nde Yandi ke zola kusadisa beto. Beto fweti kusolula na Yandi bonso banduku, bonso bana ke solulaka ti Tata na bo ya luzolo.

Keti nge ke lomba konso ntangu na mpila yina? Nzambi ta zola nde nge sala inki kusoba na lombilu na nge? Yindula mbote ti sonika yo awa:

Bakristo kele lomba Nzambi sambu na bamambu mingi. Bo kele lomba sambu na kusamba ti kukumisa Nzambi. Bo kele lomba sambu na konso mambu mpe na kusonga Nzambi luzolo ya bantima na bo. Bo lenda lomba sambu na kubaka ndolula ya masumu na bo, mpe bebaka lusadusu ya Mpeve. Kansi mpila mosi bo fweti buya: Bo lenda ve kulomba na bantu yina me fwaka.

Bantu ya nkaka ke lomba sambu na bantu yina ya me fwaka; bo ke banza nde Nzambi ta katula bo na sika yina ya bo ke bingaka kombelo, mpe bo kele banza nde, bantu yina me kwendaka kukatula mbi yonso ya bo salaka awa na ntoto. Na malongi ya Bible, beto kele mona ve ata sika mosi ya kele kutuba nde dibundu ya Yesu vandaka kusamba sambu na bantu yina yonso ya mene fwaka. Sambu na mambu ya kuguluka ya muntu, muntu fweti kuzenga yo kaka yandi mosi na ntangu yandi kele diaka na luzingu.

Keti bakristo ta baka ndola na kombelo? Tanga Ba-Hebreu 8:1-2.

Bakristo ta baka ndola ve, sambu Yesu me katulaka bo na lufwa. Tanga na Jean 3:18. Banani ta baka ndola?

Konso muntu yina ya mene ndima Yesu ve na ntima na yandi, yandi ta baka ndola. Verset yina na zulu ke tuba nde bantu yonso ya kele kundima Yesu ta baka ndola ve! Kana beto baprotasant ke sambaka ve bantu ya me fwaka, yo kele kaka nde kombelo ikele ve. Kifulu yina kele ve na Bible, yo yina beto kele mona mfunu ve na kulomba sambu na bo.

Kana beto lombila bafwa, yo ikele kuvwenza, mpe kubuya kuzitisa ndinga ya Yesu, sambu Yandi mosi tubaka nde, bantu yina yonso ya mene ndima Yandi, bo lenda kubaka ndola ve. Kana beto fweti kulombila bo, bonso nde bo kele na ndola, yo kele monika bonso nde, beto ke baka Yesu bonso muntu ya luvunu.

Mbala ya nkaka nge kele ti bampangi yina ya mene fwaka, yina ya nge ke sambaka sambu na moyo na bo. Keti kana nge sala mambu ya mutindu yina, keti nge ke zitisa ndinga ya Yesu? Keti nge zola bubuyai KUBIKA na kulombila bo? Kana nge kele kundima na kubika mambu yina, sonika bazina na bo awa:

Mbote kana nge lombila bampangi yina kele ti moyo sesepiyai. Ntangu yai bo lenda ndima Yesu, ebuna bo ta zabar nde bo ta baka ndola ve, kansi bo ta vanda na moyo mvu ya mvu.

Sonika zina ya nduku keti ya mpangi mosi ya nge, yina ya mene ndimaka ntete Yesu ve awa:

Kana nge ta yantika na lulombila yandi keti bo sesepiyai bu yandi ikele na moyo, tula kidimbu awa: _____

Kiteso mosi mpe beto bakristo fweti lomba lusadusu na Santa Marie ve na ntangu ya lufwa na beto. Ntete, beto bakristo zaba sika beto ke kwenda. Yesu Kristo me pesa beto lusilu na mambu yina. Tala Jean 3:16. Ebuna, beto ikele na mfunu ya lusadusu ya muntu ya nkaka ve. Kristo imene futa mfuka ya masumu na beto yonso. Tala Kusonga 1:5. Sonika awa sambu na inki yo ikele masumu na kulomba Santa Marie na kusadisa nge na ntangu ya lufwa na nge:

Nge solaka (inki raison)? Yo ikele mingi. Nge lenda tuba nde mfunu ikele ve na kulomba lusadusu ya Marie na ntangu ya lufwa sambu Yesu me sila kuguluka na konso muntu ya ta kukwikila Yandi. Kana nge lomba lusadusu ya Marie na ntangu yina, nge ke songa nde nge me tula ntete ntima ve na lusilu ya Yesu Kristo.

Ebuna, kana beto bakristo kulomba ve sambu na lusadusu na ntangu ya lufwa ya beto, sambu na inki beto kulomba? Ba ya nkaka tuba nde Nzambi ta mona beto mbote kana beto sala mpila yina. Mumbandu, Pape mosi tubaka nde, mbote kana bakristo yonso kusamba mpila yai:

"Ntima ya Marie ya kitoko, vanda kuguluka na mono."

Pape yina tubaka mpe nde, konso ntangu kana muntu kulomba mutindu yina, Nzambi ta katula bilumbu 300 na ntalu ya bilumbu na yandi na kombelo. Na ndambu ya nkaka, Pape yina vandaka kumona nde kulomba yina lenda kunatila keti kupesa beto kununga, sambu Nzambi kundima beto na mpila yina ya beto kele sadila bandinga yina.

Beto bakristo ke lombaka ve sambu Nzambi kunungisa beto, mpe nde Yandi kundima beto. Yesu Yandi mosi lenda kunungisa beto. Beto kele ve ya kulunga na ntwala ya Nzambi, sambu beto mene lomba Yandi na bandinga yina, kansi kaka menga ya Yesu mene sukula bantima na beto.

Tala na Kusonga 5:9 Na menga na nge, NGE sumbaka bantu sambu na Nzambi.

Kulomba na Nzambi ikele mpasi ve. Beto kele kwisa na Tata na zina mpe ya ngolo ya Yesu Kristo. Beto kele na kikesa na kutelema na ntwala ya Nzambi sambu na kusolula bamambu na beto yonso ya mpasi, beto kele kulomba pardo, beto kele kuvutula matondo ti na kukumisa Nzambi. Beto ke zabaka mbote-mbote nde Nzambi ke zolaka ntangu yonso kusadisa beto, mpe nde Yandi ta wila beto sambu na Yesu Kristo.

Inki kele mpila ya mbote na kuzitisa Marie, mama ya Yesu?

Inki mpila ya mbote ya beto bakristo lenda kuzitisa Marie, Mama ya Yesu Kristo? Beto yonso ke ndimaka nde Marie vandaka nkento yina Nzambi sakumunaka mingi, kuluta bayankaka. Nzambi pesaka na Marie inswa ti kiese na kuvanda Mama ya Yesu Kristo awa na insi-ntoto. Beto yonso bakristo ke ndimaka na kuzitisa Yandi. Beto tala yina ya Marie tubaka sambu na yandi mosi na Luc 1:48. Keti nge banza nde bantu tii bubuyai kele kuyindula mpila ya Nzambi sakumunaka Marie?

E, bakristo yonso ke monaka nde Nzambi sakumunaka Marie mingi kuluta bankento yonso ya nkaka, sambu na kati na bo yonso, Nzambi solaka Marie na kuvanda mama ya Mwana na Yandi. Beto kele mona nde Marie vandaka mbandu ya mbote, sambu yandi kwikilaka ndinga ya Nzambi, mpe yandi kudipesaka na Nzambi. Beto longuka mvutu ya Marie pesaka na wanzio na nima luzaisu ya songaka nde, "Nge ta buta Mesia, Mwana ya Nzambi. (Luc 1:38).



Marie tubaka nde yandi vandaka sielo ya Nzambi. "Mono ke sadilaka Mfumu Nzambi." Yandi mpe lemfukilaka Nzambi mingi. Yandi mosi kudipesaka ya mvimba na kusala konso yina ya Nzambi vandaka kuzola. Sambu na yai, beto bakristo yonso ke zitisaka yandi bonso bampangi ya nkaka.

Kansi malongi ya nkaka ikele nde beto BaProtestant fweti buya keti protester. Ya nkaka ke tuba sambu na Marie nde, yandi vandaka na masumu ve ata fioti, kansi kaka santu.

Beto Baprotestant zola kuzitisa Marie mpe, bonso mama ya Yesu, kansi mpila ikele ve na kundima nde Marie me konda masumu yonso. Tala na Rome 3:10-23. Inki Bible kele zola kutuba sambu na bantu yonso?

Beto yonso ikele bankwa masumu. Beto yonso me konda nkembo, mpe beto mene vila nzila ya Nzambi. Beto me sala ve mambu ya Nzambi ke zola. Bible ya mvimba kele katula kaka muntu mosi, Yesu Kristo, yina ya salaka ata disumu mosi ve. Beto ke mona yo no baverset yai: 2 Korinte 5:21, I Pierre 2:22, Ba-Hebreu 4:15, I Jean 3:5. Muntu mosi mpamba mena sala disumu ve. Nani yandi?

Bible ke tuba nde bantu YONSO me sala masumu, mpe yo ke katula muntu mosi kaka, yina ikele Yesu Kristo. Ebuna beto lenda tuba inki sambu na Marie, Mama ya Yesu? Keti Bible kele kundima nde Marie mpe kele na masumu ve?

Bible ke ndima mpidina ve. Marie zingaka na ntwala ya lubutuku ya Yesu. Bantumwa yonso zabaka yandi. Kana yandi vandaka na masumu ata fioti ve, sambu na inki bansoniki ya Bible vilaka na kusonga yo? Ve, yo fweti vanda nde Marie vandaka muntu ya masumu bonso beto. Marie yandi mosi ndimaka mutindu yina. Tala na Luc 1:47. Marie ke binga Nzambi inki mpila na verset yina?

Marie keke binga Nzambi "MVULUSI NA MONO." Kana muntu kutuba nde Nzambi ikele Mvulusi na yandi, ebuna yandi ke ndima nde yandi mpe salaka masumu, mpe nde yandi ikele na mfunu ya kuguluka. yo keke kieleka nde yandi keke muntu ya masumu. Yo ikele mpidina ve?

Na verset yina, Luc 1:47, Marie ndimaka nde yandi vandaka na mfunu ya muntu na kuvulusa yandi sambu na masumu na yandi. Yo yina Marie yandi mosi bingaka Nzambi "Mvulusi na mono."

Yesu longaka nde kaka Nzambi ikele mbote na mambu yonso. Tala na Marc 10:18. Nani kaka ikele mbote, ya kukonda masumu?

Kaka Nzambi keke mbote na mambu yonso. Kana muntu kutuba nde Yesu ikele mbote, yandi fweti bakisa nde yandi keke tuba nde Yesu ikele Nzambi kibeni. Beto lenda kundima nde, yo keke kiteso mosi kana kutubba nde Marie keke muntu ya mbote na mambu yonso, ebuna beto keke kutuba mpe nde yandi ikele Nzambi. Keti beto lenda kutuba nde Marie ikele Nzambi?

Ikele ve. Kana malongi fweti kutuba nde, Marie keke ata disumu mosi ve, yo keke kifu mosi ya nene. Mpe yo keke kusonga nde bo keke pesa lukumu ya Nzambi na muntu. Beto Baprotessant ke ndima na kuzitisa mama Marie na mpila mosi ya mbote, kansi beto keke kubuya mpenza malongi yonso ya keke tuba nde Marie keke na masumu ve ata fioti, sambu malongi yina keke kuyiba lukumu ya Yesu. Na kati ya bantu yonso, kaka Yesu mene konda masumu.

Bakatholika ke tubaka nde lufwa simbaka beto sambu na masumu. Sambu na yai, bo ke ndimaka nde Marie kufwaka ve na nitu, kansi bo ke longaka nde Marie tombukaka na zulu ti nitu na yandi ya kimuntu na ntwala ya Nzambi. Mpe, bo ke tubaka nde, kuna na zulu, Nzambi me pesaka yandi kisika mosi ya mfunu, kisika mosi ya lukumu, nde Marie mene kuma mfumu nkento ya zulu, mpe nde yandi keke kuyala kifulu mosi ti Yesu Kristo. Keti na luzingu na nge, nge me monaka kifwanisu ya Marie na bilele ti mpu bonso mfumu? Kifwanisu yina keke kutendula malongi yina ya beto mene kutuba. Beto baprotessant keke kutuba inki sambu na malongi yina? Tanga mbote na mukanda ya Jeremie 7:18-20.

Bana sosa nkuni, ye batata kutula tiya na yo, ye bamama sala mampa sambu na kupesa nkailu na mfumu nkento ya zulu, mpe na kulosa nkailu ya malafu na banzambi ya nkaka, na mpila nde bo kupesa Mono Nzambi makasi. Keti bo ke pesa mono makasi? Mfumu keke kuyufula. Keti bo keke kutula baluse na bo kisaka-saka ve? Yo yina Mfumu Nzambi mene tuba nde: Tala! Mono ta

losa makasi na mono na zulu ya muntu ti mbisi, ti bainti, ti bambuma ya kele kubasika na ntoto. Makasi na Mono ta vanda bonso tiya ya ke fwaka ve.

Mambu yai na kusamba Mfumu nkento ya zulu ikele masumu mosi ya ntama. Keti Nzambi vandaka na kiese na yo na ntangu ya Jeremie?

Nzambi vandaka na kiese na yo ve ata fioti. Yandi tubaka nde Yandi ta losa makasi na Yandi na zulu ya bantu yina sambilaka kiteki yina.

Nani ke yala na zulu bubuyai? Tala Filipe 2:8-11, Kusonga 7:10-11, ti 5:12-13 ti 22:1.

Nzambi me tula Mwana-Dimeme ya Nzambi Yesu Kristo na kuyala ti na kubaka lukumu yonso na zulu. Bible ke songa ve nde Marie ke yala sikamosi ti Yesu. Yo yina, beto zaba nde yandi ikele na kiese na kumona Mwana na yandi kubaka lukumu. Mpila ya mbote na kuzitisa Marie ikele na kuzitisa Yesu Kristo.

BETO BAPROTESTANTE KELE NDIMA NDE:

Yesu Kristo tombukaka na zulu na nima kutelema na Yandi.

Kaka Yesu Kristo kuvandaka ya kulunga, mpe kondaka masumu.

Yesu kele kuyala na zulu bubuyai tii bamvula na bamvula, ti yandi fweti kubaka lukumu yonso.

Beto fweto kuzitisa Marie bonso nkento ya lukwikilu mpe mbandu ya mbote.

BETO BAPROTESTANTE KELE BUYA NDE:

Marie tombukaka mpe na zulu. Marie fwaka ve.

Marie vandaka mpe ya kulunga, mpe kondaka masumu.

Marie mpe kele kuyala kifulu mosi ti Yesu, mpe yandi fweti kubaka lukumu.

Beto fweti kusambila Marie mpe kupesa yandi lukumu.

Yesu ikele Centre, Yesu ikele Nene!

Mono ke banza nde, nge keke ndima nde Yesu Kristo ikele Centre ya lukwikilu ti bisambu na beto Baprotellant. Beto keke ndima Bible, Ndinga na Yandi, bonso kiyeka mosi mpamba sambu na lukwikilu na beto. Beto keke kumona nde sambu na mambu ya kuguluka, nkailu na Yandi mene sumbaka kuguluka na beto ya kieleka. Beto ikele na kima ya nkaka ve ya beto lenda kusala. Yesu mene salaka yonso sambu na beto. Yo mene bikala na beto kutula kaka ntima na Yandi. ebuna beto kubaka kuguluka na Yandi, mpe moyo ya mvu ya mvu. Beto lenda kutala ve bisalu na beto ya mbote, kansi na zina ya Yesu beto keke na kikesa na ntwala ya Nzambi. Yo ikele sambu na bisalu na beto ve, kansi sambu na kisalu ya Yesu kaka.

Sambu na kusamba, beto ke pesa Yesu nkembo na mambu yonso ti na bampila yonso. Beto keke kundima Yandi bonso muvukisi mosi mpamba ya keke kuvukisa beto ti Nzambi. Muntu ya nkaka lenda kusala yo ve. Beto keke na kikesa ya kutuba nde beto bakristo me kumaka banganga-Nzambi ti basantu sambu na nkailu ya Yesu Kristo. Beto fweti kulomba na Tata Nzambi kaka na zina na Yesu kaka. Beto mpe fweti kundima masumu na beto kaka na Nzambi Yandi mosi. Beto fweti kuzitisa Yesu kaka bonso Mfumu yina ya keke kuyalaka na zulu. Yesu Kristo me manisaka bamambu yonso yina ya lendaka kuvanda mfunu sambu na kuguluka na beto bakristo. Yandi nungisaka beto na mpila yandi pesaka nitu na lufwa ya kulunsi bonso nkailu, mpe kutelema na Yandi. Beto zitisa Yandi kana beto kundima nde kisalu na yandi me lunga. Beto lenda kukwisa ve ti bima ya nkaka na maboko na beto sambu na kuyika na yina ya yandi salaka. Kana beto kuyika bamambu ya nkaka ya beto mosi, yo ikele kuvwenza yina ya Yesu kusalaka, sambu yo ikele kusonga nde, yina ya Yesu kusalaka keke ve ya kulunga. Kisalu ya Yesu salala ikele ya kulunga. Beto fweti kuzitisa kisalu na Yandi. Bika beto kuzitisa Yandi na bamambu yonso. Yai ikele kikuma na beto baprotellant

NSUKA YA MALONGI YAI



*Zitisa zina
ya Mfumu
Yesu!*

*Nkembo, nzitusu
kuvanda na
yandi!*



Decision na mono sambu na Yesu

KETI NGE LENDA TUBA MUTINDU YAI—

Ntangu mono tangaka mukanda yai, mono bakisaka ntete ve nde Yesu Kristo ta lunga na kupesa mono moyo ya mpa. Mono zabaka ntete Yesu ntete, kansi bubu mono kele zola kubalula ntima. Bubu mono ke zola kutula ntima na Yesu. Mono zola lomba mutindu yai na ntima na mono yonso:

"Tata Nzambi, mono zaba nde mono mene sala masumu mingi na ntwala na Nge. Mono kele mona nde mono ikele na mpila ve na kudigulusa mono mosi. Mono kele kundima na kubikisa sesepiyai mabanza na mono yonso, nde bisalu ya mbote ya mono ke salaka ta lunga sambu na gulusa mono. Mpe mona zola bika mabanza ya kulomba na Santu-Marie. Mono kele kutula ntima na Yesu Kristo, Yandi mosi, Yandi mpamba. Mono kele kwikila nde menga na Yandi mene lunga sambu na kukatula masumu na mono. Yesu Kristo, gulusa mono sesepiyai. Kota na ntima na mono sesepiyai, ti luzingu yonso na mono. Matondo sambu na ndolula ya masumu na mono. Na zina ya Yesu, Amen.

Zina na mono: _____

Kisika mono ke zinga ikele: _____

Mono ikele na mvula: _____ Nkento to bakala? _____

Mono ikele muntu ya dibundu yai: _____

Tinda mono malongi ya nkaka yina ta sadisa mono na kikristo na mono. Mono ikele na bangiufula yai sambu na malongi mono me tanga na mukanda yai:

(Sonika bangiufula awa)

Tinda na Maman Lorella Rouster,

Distribué par:
Ministères pour Chaque Enfant
mamalorella@yahoo.com